

ASO LULU, 18 IUNI 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: Ou te talitonu o lea ua malama i ulugalu ae ufitia i peau le malu o le Tapuitema i lenei aso fou. Ua totogo foi malama ma ua tatou taunuu i le amataga fou o lenei aso faaopoopo o a tatou galuega o lenei vaiaso. E momoli atu ai le faafetai ma le faamalo i le faamalolosi mai le paia maua o lo tatou Maota i ona tulaga faalua.

E le mafai lava ona faaititia le tatou faasaga ma le faapolo i le Atua ona o lo o tapuaaina pea lo outou soifua manuia ma lo outou soifua maua. E faafetai atu i le paia ma le mamalu maua o lo tatou Maota i lenei taeao ona o lea ua alafai mai i faguga lelei ma tatou tau mai i manu i lenei aso aua le faaauauina o a tatou galuega ua uma ona faataatia. Malo le onosai, malo le soifua manuia i lenei aso. Alo maia o le a fai le tatou galuega e pei ona faapolokalameina ma le talitonuga, o le a sao i matau mea uma ma tau i ataata o Taulelei ona o le alofa ma le faatasi mai o lo tatou Tapaau Sili i le lagi.

E le mafai foi ona faagaloina le tapuaiga a lo tatou atunuu. Samoa, faafetai tapuai, malo le tatalo. E talitonu o le taimi e lelei ai lau malolo, a o lo o taumafai pea lau Palemene e faaauau lo matou valaauina. E leai so matou aoga ae matou te tatalo ia ae ma le manuia faiva o lau Palemene ona o lau tapuaiga leleoa. O lenei aso o lea foi ua tatou faatasi ma le paia ma le mamalu i Faaluuluga o Matagaluega a le Malo i ona tupu ma ona ee, tamalii ma failauga, faletua ma tausii, saoa ma tamaitai, malo le onosai mai i le tatou Fono.

O le a faaauau a tatou galuega i lenei aso ma lo tatou faamoemoe i le Atua o le a au ma i tatou i mea uma.

TUUNA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.49, Tali atu a le Malo i le P.P.2013/2014 Nu.43, Lipoti a le Komiti o Ofisa o le Palemene i le P.P.2012/2013 Nu.18, Lipoti Faaletausaga a le Faalapotopotoga o Taui mo Faalavelave Faafuasei mo le Tausaga Faaletupe 2010/2011.
2. P.P.2014/2015 Nu.50, Tali atu a le Malo i le P.P.2013/2014 Nu.57, Lipoti a le Komiti o Galuega, Felauaiga ma le Siosiomaga i le P.P.2011/2012 Nu.60 & P.P.2011/2012 Nu.92, Faamatalaga o Sini Autu a le Faalapotopotoga o le Malosi Faa-Eletise mo le Vaitaimi

2012-2014 ma le Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe na faaiuina aso 30 Iuni 2011.

3. P.P.2014/2015 Nu.51, Lipoti Faaletausaga a le Ofisa o le Loia Sili 1 Iulai 2012-30 Iuni 2013.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2013/2014 MA LE TULAFONO TAU FAAOFI O
LE FAATATAUINA O TUPE 2014/2015 – felafolafoaiga faaauau i luga
o le faitauga faalua**

FOFOGA FETALAI: E tolopo a tatou Galuega i le Aso Fono ananafi o lo o saunoa le sui usufono mo Sagaga le Falefa. O le avanoa lelei lenei lau Afioga i le sui usufono, ou te vaai atu o lea ua uma ona e oo i faalagilagiga, o mamalu, o sa ma faiga o lo tatou itumalo, ae alo maia e amata aua o lea na maua sa e agai muamua i le Minisita mo Galuega, Felauaiga ma Atinae Eeseese a le Malo.

Tulai mai le sui usufono mamalu e toe faaauau le saunoaga.

Tofa TUISA TASI PATEA (Sagaga le Falefa): E faafetai atu i lau Afioga i le Fofoga Fetalai. E talitonu o lena ua uma ona e faalele le fulu i le vateatea, ua uma foi ona toto le taamu teevao i le va tapuia ma lo tatou Tapaau i le lagi, ua uma foi ona e lagopapae ma paepaeulufanua paia o le Maota nei i Tiafau. Ou te le toe seu tafilia la le naa ae na ona seu matatoaga aua e faigata le paia o lenei aso.

Lau Afioga i le Fofoga Fetalai, le Palemia ma lau Kapeneta i Alii ma le Tamaitai Minisita, aemaise foi Minisita Lagolago, lau Afioga i le Taitai o le Itu Agai ma le mamalu o le Maota. Ou te faatalofa atu i lenei foi taeao fou.

E i ai se mea na galo ia te au anapo ona ou te matau atu i lou itu taumatau o lea e taatia mai ai le teu fugalaau. E fia avea foi lenei avanoa ou te faamaise ai i le aiga, le faletua po o le tausii foi ma le nofo-a-alo ona o le tuua o le Malo e le uso a sui usufono, po o le tama, le Fetalai Tuiloa Anitelea aua o le lagia lava lea o Finao ma maota e fia aua Sao e Fa ma Aiga, a o se usugafono foi aua le Alii o le Itu, le Ati Pouniu ma le Faasau. Ia faamaise le Atua i le tina ma le nofo-a-alo aemaise aiga-na-lua, le nuu ma le itumalo.

Ona ou oo mai lea i le faaauauina o galuega fai a lenei itumalo. Lau Afioga i le Minisita mo Galuega, Felauaiga ma Atinae Eeseese, ou te talitonu o lena ua taatia i lau Afioga nisi o talosaga e pei foi ona savavali mai ai lou itumalo. Na ona toe faamanatu atu, tuitui atu ma ta le logo a Masefau aua a tatala mai le faitotoa, faafetai. E talitonu e le o le tausaga nei ona ua tatou pisi foi i le fonotaga, ae mo se tausaga o lumanai.

Lau Afioga i le Minisita mo Galuega, Felauaiga ma Atinae Eeseese, o se auala i Utumoa e pei ona avatu ananafi, e manaomia lava e le Ekalesia ona o nai tagata lotu e faaogaina lea auala agai atu e tau i AeLe.

O lou pitonuu i Levi i Saleimoa, faafaetai tele lava mo le auala, a o le suavai sa amata le tatou galuega ma e le i uma lelei le galuega. O le tala na aumai o lo o faatali a tatou paipa. O le mea lea e toe faamanatu atu ai faamolemole lava le Pulega, se i toe tagai ane lava po o ua taunuu mai a tatou paipa ona ua atoa le tausaga o oka faamolemole lava.

O lou nuu i Alamutu ona ua mavaevae foi pulega a lea pitonuu, o lo o manaomia foi le auala. E faapena foi i Lotosoa o lo o manaomia foi le auala galue. O Nonoa, o le tulaga lava lea e tasi. E faapena foi i Utualii ma Tufulele, o auala galue uma lava e manaomia. O le agaga ma le faaaloalo e tuitui atu ai foi ina ia alofagia nei fuafuaga mo nai tagata ua nofo a uta.

Ona ou oo atu ai lea i le Tala Faatatau o le Tupe mo lenei tausaga 2014/2015. E fia faamau foi le lagolagoina e lenei usugafono ma avatu le faafetai ma le faamalo i le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015 i lenei tausaga. Ua matau atu ma le totoa ua ave lava le faamuamua a lo tatou Malo i Aoga ma le Soifua Maloloina. E 33.7% ua faamatuu atu mo le Matagaluega o Aoga, Taaloga ma Aganuu ma le Matagaluega o le Soifua Maloloina. Ua faamalo faafetai, ae i ai foi le talitonuga ua tatau ma onomea aua e tatau ona aoaoina ma soifua maloloina o tatou tagata. E avatu ai le faafetai tele i le Malo e ala atu i lau Afioga i le Minisita ma le Afioga i le Palemia mo fuafuaga aua le faaleleia o ia Matagaluega. E avatu foi nai tuualalo e taatia ane i autafa o lau Afioga i le Minisita mo Aoga, Taaloga ma Aganuu.

O le tulaga i Pre-Schools po o le Early Childhood Education. O le agaga maualalo se i toe tagatagai ane i ai faamolemole. Ou te talitonu o aoga nei a tamaiti laiti e ese le taua i totonu o nuu ma alaalfaga aua a lelei aoga laiti faataitai, e umi foi ona nonofo tamaiti i primary schools, ona faaauu atu ai lea i luga i kolisi ma manuia ai a latou aoga. A o le tulaga lea e i ai nei i le tele – ou te talanoa au ona o le tulaga o i ai nisi o nuu o lo matou itumalo ma ou te talitonu foi e faapena le tele o nuu o nisi itumalo. Ona e le o i ai se fesoasoani tele a le Malo mo aoga laiti nei po o aoga faataitai, ae ese le taua aua a lelei ona fofoa atu tamaiti i aoga faataitai, e oo atu i luga i primary schools e umi foi ona nonofo. A o le tulaga lea e aliae mai, o nisi o tamaiti e oo ane i le Year 5 ma le Year 6 ua leai ma le primary school. O le fesili pe aisea. A o le tali, e le masani. E le lelei le preparation i levels ia e i lalo i aoga faataitai. Ou te talitonu foi mai nisi o i latou na lelei lo latou amataga mai lalo i aoga faataitai, e umi lava ona nonofo i lalo i primary schools ma lelei atu ai lava i isi level i luga atu. O le popolega o lo o i ai ina ne i t e i ua avea lea tulaga ma mea e faaletonu ai le lumanai o nei tamaiti, aua o i latou nei a toulu mai pe drop out mai primary schools ua leai ni aoga, o i latou lava nei o le a fai ma sasa ma ta i pulega mamalu a alii ma faipule i nuu ma alaalfaga, ma faaopoopoina ai foi le fuainumera o soligatulafono i totonu o faamasinoga ma alu ai tupe a le Malo. O le talosaga la se i toe tagatagai ane i ai ina ia mafai ona i ai ni fesoasoani tau tupe, e le gata o le faiga o faleaoga nei o pre-schools, a o le faatupeina foi i faiaoga ma i latou o lo o faatautaia.

Ou te talitonu o lo o faia le galuega lelei a le Early Childhood Council, ae i ai le talitonuga ia matua faatauaaina. O le mea lea sa fai e nisi foi o Ekalesia i aso ua mavae, ae e matauina lava ma le totoa ua faale o ano tele i ai. O le agaga se i alofagia, se i toe tagatagai tasi ane i ai.

E faatasi ai foi ma le popolega o lo o i ai a lenei usugafono ia i latou ua tuua aoga school leavers, o le tele o tamaiti e leai ni galuega, ae i ai se tuualalo lau Afioga i le Minisita mo Aoga, Taaloga ma Aganuu pe mafai ona tagai ane i ai pe mafai ona fai ni tatou community education centres, e mafai ona faipaaga ai le Malo ma nuu i tua, ina ia mafai ai ona aoao nei tamaiti ma toe up skill ai i latou ua matutua, o le aim lava ma le naunautaiga, ina ia mafai ona maua ni

galuega e le gata i totonu o nuu ma alaalfaga ni a latou pisinisi, i mea tau trades, handicrafts, so o se ituaiga matafaioi lava, ia ae o le a fesoasoani foi i le tamaoiaiga o le tatou atunuu.

Ona ou oo ane lea i le soifua maloloina, ia e faafetai atu foi i lau Afioga i le Minisita, ua maitauina lava ma le totoa foi le matagofie o le tatou falemai fou o lo o i ai, ae tele foi le suiga o le tatou customers service ua i ai i totonu o le tatou falemai. E avatu le faafetai ma le faamalo i faauluuluga, ae i ai lava ni nai tuualalo, ia o lo o maitau lava le tumutumu pea o le tatou ANE i le taimi e amata atu lava i le ao e tau i le po. Ona i ai lea o le fesili, pe aisea? Ou te talitonu, masalo po o le mumusu o tagata e o i le falemai ia po o le lelei foi ona faatotogaina ia ma vaaia falemai o lo o i tua, ae tulituli mai lava ia falemai i Apia. O le mea la ua tupu, ia ua i ai ma i latou foi ia sa tatau ona o e vaai a latou fomai family GP, ia ae ua taumafai lava e faaaoga le tatou falemai tele, ae o lo o toatele i latou o emergency cases foi ia e tatau ona faamuamua. O le tulaga lena o lo o i ai, e tatau foi ona tilotilo le Matagaluega i se isi faiga e faaleleia atili ai lea auunaga, ia a o mea uma lava, faamalo faafetai i lau Afioga i le Minisita ma le Matagaluega.

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Minisita i le mataupu leaga o lea ua taua le Matagaluega. Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, leai e saolele lava le saunoaga a le sui usufono mamalu, e leai foi se agaga e faalavelaveina ia lona alofaiva aua ia lona avanoa ua tuuina mai e lau Afioga mo lana saunoaga, ae pau lava lea ona o le mataupu foi lea e le o po se lilo o lea foi e tele ina aumai ai faitioga i tulaga lava lea i le Outpatient i le umi foi lea ona faatali o gasegase ia ma le tumutumu i ai. E tele lava ni mafuaaga i le taimi nei mo le vaega lea, ona o tulaga foi ia o lea e taumafai ai le Matagaluega ina ia foia. O le isi vaega lea sa taua e le sui usufono, ia o le tasi lena mafuaaga, o le tele foi o gasegase o tatou i aiga i tua, e oo lava i motu i Savaii, e mananao uma lava e fia omai i le falemai tele i Motootua, ma o le ala foi lea o lea e le o agai i ai taumafaiga a le Matagaluega e faaleleia a tatou falemai ia e i tua, ma faasoa atu ai auunaga lea o lo o faatino i le falemai tele ina ia mafai ai ona taofiofia ia le autovaa mai o le atunuu i le tatou falemai tele i Motootua.

O lona lua pei ona silafia i le taimi nei, o lea o lo o faagasolo le galuega mo le ANE e faapitoa lava mo gasegase foi ia faafuasei ia ma gasegase tigaina, ma o lo o i ai le faamoemoe i se taimi a maea le faagasologa o le galuega i le phase two lea o lo o faagasolo nei i le taimi nei, o le a mafai ona tuu eseese ia le ANE faapitoa lava la mo gasegase ia faapitoa tigaina ma gasegase faafuasei, ma le Outpatient. A o le taimi nei o lo o alu faatasi le Outpatient ma le ANE, a oo la ina o atu gasegase e le tigaina tele po o le flu le tale po o isi mafuaaga a o feagai ma le toai atu o ni mai tigaina po o ni mai fatu po o a lava ituaiga mai, po o le stroke po o le a, ia ona agai uma lea o le aufaigaluega e faatino muamua i latou ia ua tigaina, ona taofia ai lea ma mafua ai la le back log lea o le vaaiga o gasegase tausavali po o Outpatient, ma le mafuaaga lea e tele ina poloka ai le galuega i uta i le tatou falemai tele i Motootua. Ia o tulaga la na o lo o i ai nei le faagasologa o galuega e talia ai le maea o le faatinoga o le tatou falemai fou lea e i ai ma le faamoemoe o le a

foia ai la le faafitauli lea pe a mafai loa ona tuueseese auaunaga ia o le Outpatient ma le ANE, ina ia aua ai ne i poloka le faagasologa o gasegase e autovaa atu i le tatou falemai i Motootua. Lau Afioga ia o se faamalamalamaga puupuua lea mo le faafesili a le sui usufono.

FOFOGA FETALAI: Malo. Faafetai faamalamalama i lau Afioga i le Minisita mo le Soifua Maloloina. Ia tulai mai le sui usufono e faaauau mai le saunoaga.

Tofa TUISA TASI PATEA: E faafetai atu i lau Afioga mo le faamalamalamaga foi o lea mataupu, faafetai tele.

Ona ou oo atu lea i nisi foi o Matagaluega le Pulega o Tagata Asiasi Maimoa Mai Fafu, e pei foi ona taua e nisi o sui usufono o le Maota, ia o le agaga foi lea e talitonu o le tele o i latou e omai i totonu o le tatou atunuu e mananao ia umi ona nofo iinei, ia ae e toatele lava nisi fai mai e le o tele ni mea e fai, ae talitonu e manaia ae se i toe tagatagai ane i le tele o mataaga, o le isi lava mataaga pei o Mount Vaea lea e lagomau ai le susuga ia Robert Louis Stevenson, ia o le isi lona mataaga lelei, ae manaia foi i se faataitaiga pe a fai se tatou cable car foi lele, se taavale e alu agai i luga, ia e o ai ia tagata asiasi maimoa mai fafo e tafafao. O le isi mataaga o le mataaga o lo matou nuu, o lea ou te tilotilo atu, o lea ua avea ma logo o le tatou Ombudsman, ia a o le tala foi lea i le tama o Poluleuligaga, ou te le iloa po o fesiligia matou, aua o matou e ona le mea lona, ae ui o lea, o le auga o le faamatalaga e manaia ae fai faalelei ia ni mataaga faapena ma document faalelei ina ia malamalama lelei ai ia tatou tagata asiasi maimoa mai fafo ma umi ai le latou tafaoga. O le faataitaiga lava o lo o tupu i Fiti, a e alu atu i Fiti, e ave oe i le vaa i le isi itu o le isi island ona e alu lea e te tafao i ina pe uma lava le aso o e i ina i le tele o activities na e fai i ina, ia e i ai foi nai islands ia e i tai o tatou, e manaia foi ae faapena foi ona fai, ina ia faamanaia atili ai tafaoga.....

FOFOGA FETALAI: Malie le sui usufono, se i fai atu le saunoaga a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai, ia e faasaoina ia nisi foi o saunoaga, o mea uma lava ia o lea e taumafai e fai, e leai lava se mea o mea uma nei o lo o lau mai nei e fou, o mea uma na o lea e taumafai ia le Faalapotopotoga e uunai. Ae e faavaatua lava a tatou fuafuaga nei ona o ala o femalagaiga.

Pe a manatua e lau Afioga, o lea ua agai ina na o tagata asiasi maimoa mai fafo lea e omai lava i alavaa, Niu Sila, Ausetalia ma iinei e faapena Fiti ma iinei. Talu mai ona faamuta le faigamalaga lea i le 2011 lea sa malaga sao ai le Air New Zealand i le va o Apia ma LA, ua tele lava le aafiaga o le tagata e malaga maimoa e omai mai Europa ma Amerika, ae ua atili taugata ai ona o nisi e fia omai e tataua ona lele i lalo i Niu Sila, ae manatua foi o le vaa e lele atu i luga o Apia o lea e tatou te faalogologo i isi po o uu ae i o tatou luga, ona lele lea i lalo i Niu Sila, a toe fia sau la iinei, ona toe lele mai foi lea iinei, a toe fia foi i Amerika, ona toe lele foi lea i lalo i Niu Sila toe lele mai ai i o tatou luga toe alu i Amerika, lona uiga, ua atili taugata pasese. O le tulaga

la lena o lea e faigata tele ai mea nei. E le o vavau na o lo o outou fai mai e fia omai ai, e tumutumu mai ai. A o le tulaga o le muamua aumai, ae tele foi la galuega ua fai, o mea uma lava ia e saunoa mai ai sui usufono, o la ua document uma ia mea na. E i ai foi le faaeteetega i mea ia o tala foi ia o le vavau lea e ai tagata ai o tatou tagata, ia o mea na e le fiafia ni tagata asi maimoa mai fafo e omai i ai. Ae o tulaga o lea e taumafai i ai, o le ala foi la lena o lea sa taumafai i le tatou vaalele e fefefe, e fefefe tele e toe amatalia se flight lea i le va o tatou agai i Amerika, ona o le tuugamau ia o le tele o vaalele lea foi na lavea ai ma tatou, o le alavaa lea ua fai ma fanuatanu o le tele o vaalele. O lea la ua mafua ai ona toe fai le isi taumafaiga na faatalanoa ai ma le Kamupani Vaalele lea a Fiti, afai lava e alualu lelei taumafaiga na, o lona uiga e ono i ai ia ni faigamalaga mai iinei agai i Amerika i le tausaga fou.

O taumafaiga la na o lea e taumafai ai, ua ala ona ou fai atu ona o mea uma ia o lo o outou saunoa mai ai, se o mea la ua uma ona tuu i totonu o le video o mea e tataua ona fai, ae ala lava ona tuai ona fuafua isi vaega, ia o mea tau seleni, o le gaioiga foi o lo o fai e le tagata asi maimoa mai fafo, e masani ona faamatala, o le keke lea tatou te faasoaina, e alu atu ai ma le fasikeke a le tagata asi maimoa mai fafo, e le o se keke e femeiai, afai lava o le lapotopoto lea e na o le pau lava lea o le keke, e pau lava lena o le tatou keke e faasoa. O lona uiga la a tele mea i le isi matafaioi, ia ua memei loa le isi matafaioi, ua laitiiti le fasikeke a le isi Matagaluega ma le isi Faalapotopotoga. O le mea la lea, o lea ua ou tulai atu ai ona ou te matauina, o lea e tagatasi lava saunoaga i mea ia, e leai lava se mea o outou taua e fou, o mea uma na o la ua uma ona faamaumau i lalo ma agai i ai faatalanoaga i auala eseese e mafai ai ona faatino ia mea ia. A na faapea e mafai ona fausi mai ni tagata asi maimoa mai fafo, e le afaina, pe omai i ni paopao, a o le mea lea e tupu e faalagolago i vaalele a papalagi, a le lele mai lava la le vaalele, e tuusao i se tau e talafeagai, ia o faigata na e feagai ma tatou. O Fiti, o Fiti o le way boat, o lona uiga o lea mea o i lea e taulai i ai ia femalagaiga a vaalele ma femalagaiga a vaa a lalo. O se ala foi la lena o lea e taoto ai a tatou fuafuaga tetele lava ia e lua, e le mailoa pe afai e faataunuu fuafuaga ia e faatalanoaina nei ona amata ia le tatou faaleleia atili o le malae vaalele i le faaiuga o le tausaga nei po o le amataga o le tausaga fou, faatasi ai ma le fale faaee pasese e two storey e i ai ma mea foi ia osooso ia e fa mo auala e build in, na ona e savali ese lava ma le vaalele e savali mai ai loa i totonu i i e aunoa ma le toe lavea o oe i se tulaga lea o le susu, ia po o le toe lavea i le mea valea lea na fai e le tama lea na fai talu ai i le lele mai o le vaalele o Key, ae alu atu ma lana sitepu tu atu poloka i lalo ua le alu, ia ona tutu ai lava lea o si Palemia, ae ua leva ona nofonofa ma faatalitali le vaalele o le a sau, ae o atu poloka le mea i lalo ua u i lalo ua le agai i luga. Ia ou te talosia taofi ai i i ia mea. O lea e sauni nei ia le fonotele o le a usu mai iinei, ae a alu atu ma poloka soo faapena, ia o lona uiga e suigi mai ave ni maea e suigi mai ai tagata mai luga agai i lalo.

O tulaga la na o lea ou te faasilasila atu, e leai lava se mea fou o fuafuaga uma ia e aumai e outou, o lea ua uma ona faamaumau uma i lalo, ua uma ona tuu i totonu o plans a le tatou Faalapotopotoga mo le uunaia o le atinae tele lea, o le atinae lea aupito sili ona tele e toatele tagata faigaluega o lo o galulue ai, e aupito sili foi ona tele atu le tupe e maua mai ai, toetiiti faasefuluina le tupe lea e maua mai i tupe faaagaaga e oka ai tatou oloa nai loa oloa ia e

mafai ona avatu i fafo i le tulaga o faatoaga. Ma o le taua o le manatu lea e aumai e le sui usufono, e sao ia i le itu lea o le uunaia, ou te faamoni atu foi i sui usufono na muai saunoa mai, o le atinae lenei e iu ina faalagolago tasi i ai le atunuu lenei i le lumanai, aemaise lava o tagata e toatele e omai, ona maua ai lava lea o maketi o tatou talo ma tatou fai ma tatou ia iinei lava i Samoa, e le tau tīgaina e ave i fafo. Aua afai e oo le aofai o tagata i le 500,000 i le tausaga, na o le 135,000 tagata ia e asiasi mai i Samoa i le tausaga. Ae a magamaga ae oo i le 500,000 i le tausaga, e alu uma lava i ai a tatou mea ia e mafai ona maua i a tatou faatoaga, tatou te le toe mananao e ave i fafo, o le a maua ai lava le maketi iinei, aua o le a le toe o tatou e sue tagata e taumafaina fa'i ma i'a, a o lea o le a omai lava tagata ia i Samoa. O tagata na e tatau foi ona taumamafa ma agai uma mai i ai taumafaiga a le aufaifaatoaga.

Lau Afioga i le Fofoga Fetalai, o lou tulai atu lena e faamalamalama atu le mea lea ua ou maitauina, pei lava e lima ea lauga na agai lava i le mataupu lea e tasi.

FOFOGA FETALAI: Malo. Faafetai saunoa faamalamalama i lau Afioga i le Minisita mo Tagata Tafafao Maimoa mai Fafo po o lau Afioga i le Palemia. Ia, tulai maia le sui usufono e faaauu mai le saunoaga.

Tofa TUISA TASI PATEA: Faafetai atu i le faauilavea a le Afioga i le Palemia. Ia, o le agaga lava ia o le fia fesoasoani atili aua le uunaiga atili o tatou tagata tafafao maimoa mai. Ae o le a le toe oo foi la i ai se faamatalaga. Na pau lava le agaga, faafetai atu o lea ua maitau atu o lea e taatia le tatou submarine cable mo tagata tafafao maimoa mai, aua o le tasi lea mea aupito i sili ona taua i tagata nei o le alu i tua e tafao a ii le matafaga, ae mafai ona taaloalo i le internet e tali ai uo la e faatali mai i o latou atunuu.

O le customer service, faafetai lava i le Matagaluega o Aoga, o lea ua maitau atu o lea ua toe oo le tatou atunuu, le latou cultural festival lea e tauanau e faalogologo atu foi i le TV, o le aim atoa o lenei mea ina ia toe taumafai ona toe tapue tu ma aga faa-Samoa, aua o le customer service a Samoa e base i luga o le aganuu faaaloalo, e iloa ava i tagata ma mea faapena. E pei o le mea lena ua tau misi, ae faafetai i le Matagaluega o Aoga, o lea ua amata ona laga mai i le level lea, e oo ae i luga i le taimi e faigaluega ai, ua masani atili ai.

Ona ou oo atu lea i le tatou returning residence and remittances. E i ai le talitonuga e fia tuualalo atu ai foi i le tatou Malo, o a ni polokalame ma ni promotions e encourage ai i latou nei ina ia toe foi mai i le tatou atunuu, aua o latou nei o lo o maua tupe e mafai ona tala a latou super iinei e omai e aumai tupe i totonu o le tatou atunuu aua ni a latou pisinisi e fesoasoani ai foi i le tamaoaiga o le tatou atunuu.

Ona ou oo atu lea i le tatou SROS, e avatu le faamalo tele i le tatou Matagaluega ona o le tele o nisi o fua o faaeleleaga ma fua o faatoaga ua mafai ona tapena lelei, ua maua foi faamaumauga o le a mafai ona fai i ai nisi o pisinisi, pei o le avoka ma le suauu e maua mai ai, o le ulu, o le koko, popo ma le talo, faamalo faafetai. O le tuualalo i le tatou Malo, e manaia ae i ai foi se fesoasoani a le tatou Malo, ou te talitonu o lea ua amata, e fai paaga ma le private sector ona faamatuu loa lea i ai, pe a oo i le taimi e mafai ai e le private sector ona faatinoina nei atinae.

FOFOGA FETALAI: Toe lua minute o le sui usufono.

Tofa TUISA TASI PATEA: Ia, o le manuia lava ma le agai i luma o le tatou tamaoaiga e maua ai galuega a o tatou tagata. Toe lua ou minute, ae faafetai atu i lau Afioga i le Fofoga Fetalai. Ona ou oo atu lea i le Matagaluega o Faamasinoga, faamolemole, le Lands and Titles, e i ai lava nai faamasinoga a si ou itumalo o lo o i ai lava foi le talitonuga pei lava foi ona avatu i nisi o Fono a le Palemene, ua tataua lava ona i ai nisi foi i totonu o le taitaiga o faamasinoga a le Land and Titles e lava le silafia i le Tulafono po o le district court judge, ona e iai lava nai faaletonu o lo o tulai mai pea ua uma foi ona avatu tusi, ae oo mai lava i le taimi nei e le i tali mai lava tusi a nisi o lou itumalo na avatu e tali mai ai i mataupu e pei ona avatu. O le agaga lena.

Ona ou oo mai ai lea i le Electoral Reform, ia lau Afioga i le Minisita e maitau atu o lea o le a sui foi si a matou mulumulugaveve o le a i ai, ona o Aelee, sa i lalo o le sui usufono mo Samoa Atoa, ae maitau atu o lona uiga o lea o le a i lalo o Sagaga le Falefa, ma nisi o matou e faapena foi ona i ai le tulaga lea o le...

FOFOGA FETALAI: Se i tuu atu le avanoa ona o lea ua e taua le sui usufono mo le Au Palota Taitoatasi. Tulai mai se tasi o sui usufono mo le Palota Taitoatasi, Afioga Maualaivao Pat Ah Him.

Afioga Maualaivao Pat Ah Him (Palota Taitoatasi): Lau Afioga i le Fofoga Fetalai, faafetai lava mo le saunoaga. Ou te talitonu e le tataua ona oo i le vaega lea, aua o lea e le i mautinoa. Ou te talitonu lava o lea e fefulifulisai lava le tulaga lea. Ou te iloina lava e oo i se tulaga lelei, ae faafetai lava, o lagona vaivai na e faaali atu ai ma le agaga faaaloalo.

Tofa TUISA TASI PATEA: Only if, pe a oo i ai lau Afioga i le sui usufono mamalu, aua a oo i ai, ona faateleina ai lea o le matou lola. O lona uiga o le a ova ma le 6,000 le aupalota a si ou itumalo. O le agaga la e avatu i le tatou Minisita aemaise foi i latou o lo o faatinoina lenei Tulafono, ina ia toe tagatagai ane i ai, ua tataua foi ona lua sui usufono mo Sagaga le Falefa.

Ia, o sau toe soso atu lea, faafetai tele lava i lau Afioga i le Fofoga Fetalai, ona ua uma foi lou taimi. Ia alofagia e le Atua le Maota, alofagia i tatou uma aemaise Ofisa Sili o Pulega ma Pule Sili o Matagaluega ma Faalapotopotoga a le Malo, o lo o lima ma vae i ai le tatou Malo. Malo le galulue faamaoni i o outou tofiga, o le manuia lena o Samoa. Ia manuia Samoa atoa. Faafetai.

FOFOGA FETALAI: Malo faafetai saunoa i le sui usufono mamalu mo Sagaga le Falefa. E manatu ua faafofoga le tatou Maota e tusa ai foi ma le tuleiga ma le saunoaga i lenei vaega o le taeao. O le a lafo le tatou lauga i lea Itu o le Maota ona oo atu ai lea i Salafai.

Tulai mai le sui usufono mo Siumu.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai. Na o le tolu lava minute o lau lauga, leaga o lea faatoa maea atu nei lava le saunoaga manino a le Palemia, o mea uma ia ua taumafai atu ai lauga a sui usufono, o la e ua uma ona faamaumau ma tuu i totonu o plans a

Matagaluega taitasi. Ma o le tulaga la lea lau Afioga, o le a le tae otaota le lauga a Tuuu.

O lea la lau Afioga i le Fofoga Fetalai, ou te muai faatalofa atu i le faafogafoga tapuai mai a Samoa, le tapuaiga leleoa a Lana Afioga Mamalu O Le Ao o le Malo ma Lana Masiofo, lau Afioga i le Sui o le Fono a Sui Tofia, aemaise lau Afioga i le Faamasino Sili ma le mamalu i alii ma tamaitai o le Faamasinoga.

Ou te faatalofa atu foi i le tapuaiga a Faauluuluga o Ekalesia i so o se fatafaitaulaga o feoi o le Talalelei o e o lo o latou semaina se nogamanuia mo Samoa ma lona Malo tauatia. Ou te ofo alofa atu la i lau Afioga i le Fofoga Fetalai, faapea foi lau Afioga i le Palemia ma lau Kapeneta, lau Afioga i le Taitai o le Itu Agai ma le paia maualuga o sui usufono o le Maota Fono o Samoa. O le paia lava lea aua Aiga ma latou Tama, o Tama foi ma o latou Aiga, tainane le aufueta ma le aufueloloa i le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga i le Faigamalo a Tutuila ma Manua i le afio o le Kovana Sili, le Lutena Kovana, le Peresetene ma le Maota maualuga, faapea foi lau Afioga i le Fofoga Fetalai ma le Maota o Sui. O le paia lava lea i le afifio o Faasuaga ma le Fetalai i Tama Matua ma upu i le Faleagafulu, le afifio o Alii Faatui ma le afifio o Alii, le Laau Amotasi, alaalatai Tootoo o le Faleula ma upu i le Manuatele.

Ou te fia faatalofa atu foi i le tapuaiga a si ou itumalo i le paia ia Sa Asomua ma Aiga e Lua, lau Fetalai Tuuu ma lo outou Aiga Sa Tuuu, le Falelua o Tulafale, le Fofoga o Alataua, Utaileuo ma le mamalu i le Faletolu. A o se tapuaiga mau foi i le Afaigaluega Paia a le Atua o lo o faafalelemalu i totonu o le tatou itumalo aua se manuia o le tatou afioaga. Ia, le paia e ia Sa Asomua ma Aiga, tapuai maia ma le manuia ae se i fai lava sina sao puupuu i le Tala Faatatau o le Tupe e pei ona lauiliuina i totonu o le Palemene.

Lau Afioga i le Fofoga Fetalai, o le Tala Faatatau o le Tupe leni, o le Tala o le Tupe a le Malo, o le Tala o le Tupe a le Afioga i le Minisita o Tupe, le Afioga i le Palemia, le Sui Palemia, le Kapeneta ma Minisita Lagolago. E leai la se isi e faasala ese ai, e matua lagolago uma i ai le Malo. Lau Afioga i le Fofoga Fetalai ua ou tulai atu ma lou faaaloalo....

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai o se mea e fia faasao.

Tofa Hon TUUU ANASII LEOTA: E fia faaalua ua matua lagolagoina le Tala o le Tupe leni.

FOFOGA FETALAI: Malie le sui usufono mamalu se i tuu atu le avanoa i le mea e fia faasao e le Taitai o le Itu Agai. Tulai mai lau Afioga i le Taitai o le Itu Agai.

Afioga Hon Palusalua Faapo II: Ou te le fia faalavelave i le saunoaga matagofie a le sui usufono, ae na pau lava le mea e fia faasao, o le Tala o le Tupe o le Tala o le Tupe a tatou uma. O le ala lea o le aumai i le Palemene e pasia atu ai, ona o le Tala o le Tupe a le Palemene, a o outou na e faatinoa. E pei o le mea lea e fia faasao ne i te i ua aveese matou faapea matou te le i ai i le Tala o le Tupe, a o le tulaga lena e faasao ai le saunoaga.

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga o lea e sao le Taitai o le Itu Agai i le taimi e pasia ai, a pasia loa faatoa tau o le tatou Tala o le Tupe. A o le taimi o lea e aumai ai, o lea e tau lava o le Tala o le Tupe a le Malo. Ae ana faapea e aumai loa le Tala o le Tupe tutu mai loa latou uma pasi loa e aunoa ma le tetee, semeamanu e amata mai lava i le amataga o le Tala o le Tupe a le Palemene, ae o lea e le i oo i ai o lea lava e faalogologo. A alu alu loa ua io i ai i latou, ona faatoa tau loa lea o le Tala o le Tupe a le Palemene atoa. O la e la e sao le saunoaga a le Minisita Lagolago. O le sui usufono foi o lo o saunoa nei, o le sui e malamalama ona sa Minisita, o le Taitai foi o le Itu Agai, o la e foi e malamalama, a o uiga lava ia o la e foi e fai le latou pitolaau.

FOFOGA FETALAI: Ia, tulai mai le sui usufono mo Siumu e faaauau le saunoaga.

Tofa Hon TUUU ANASII LEOTA: Faafetai i lau Afioga i le Fofoga Fetalai. O lea ua saunoa manino le Palemia e tali ai le faauilavea a le Afioga i le Taitai o le Itu Agai.

Lau Afioga i le Fofoga Fetalai, ua ou tulai atu e faaalua lou matua lagolagoina o le Tala o le Tupe, leaga o lea ua saunoa le Palemia, leaga e ese le manatu lea e i ai le Taitai o le Itu Agai. O le manatu o le Taitai o le Itu Agai ia aua ne i ou tulai e pasia le Tala o le Tupe.

Lau Afioga i le Fofoga Fetalai, o lea na saunoa manino ananafi le....

Afioga Hon Palusalua Faapo II: Lau Afioga i le Fofoga Fetalai o se mea e fia faasao.

FOFOGA FETALAI: Ia, leaga o lea ua e taua le suafa o Palu Taitai o le Itu Agai. O i ai se mea faapea i lou finagalo Palu?

Afioga Hon Palusalua Faapo II: E leai se agaga ia te au, o latou lava, ioe. O latou lava. O lea ua tuuaifuaina lenei Itu aemaise o au, e leai, e lagolago le Itu lenei i le tatou Tala o le Tupe. Na o fautuaga o lea e avatu e faaleleia atili ai, ae sese lea saunoaga faapea o lea ou te manao e aua ne i... O latou lava, ma lou faaaloalo.

FOFOGA FETALAI: O e fautua lelei ia Tuuu Palu? O lea e maua lava na o le lua fuifuilua i mea uma, fuifuilua i le lotu, fuifuilua i faafiafiaga, fuifuilua i maliu.

Ia, tulai mai Tuuu e faaauau mai le saunoaga.

Tofa Hon TUUU ANASII LEOTA: Faafetai. Ia, o lea e molimau lau au lakapi aua o au e kapeteni. O le saunoaga a Palu, o le mafuaaga o le tatou au lakapi, ia soloia, aua ne i pasia le Tala o le Tupe.

FOFOGA FETALAI: E leitioa la outou faiaina ona o le mafuaaga lena. E le lelei le faavae na outou o ai tou te taaalo, ma ua tapu ai foi i i ona toe fai ni tatou au lakapi. Ia, tulai mai le sui usufono mamalu e faaauau le saunoaga.

Tofa Hon TUUU ANASII LEOTA: Lau Afioga i le Fofoga Fetalai, o lea na saunoa manino le Afioga i le Minisita o Tupe i le aso ananafi i le mafuaaga o le pau po o le faaitiitia o tupe maua ma tupe faaalu o le Tala o le Tupe i lenei tausaga faatusatusa i le Tala o le Tupe lea ua faaiuina nei. O lea la ua fofola mai, e matua leai lava se vaega e atagia ai se tulaga faaletonu o le tatou tamaoaiga i lenei foi vaiata.

Lau Afioga i le Palemia po o lau Afioga foi i le Minisita o Tupe, aua ne i te i le uluuluga i lau Afioga i le faatusa o lea o le a ou faatusaina atu ai le Tala o le Tupe lenei, leaga o lau uluai Tala o le Tupe lenei faa-Minisita o Tupe, ioe. I le maitau atu, e sau lava le fuauli ia e toa le moa, ioe. Na o viiga lava o le Tala o le Tupe lea ou te tulai atu ai. O lea ou te faatusaina i le manu foi lea o le ostrich po o le ositaliki. O le manu e tino lelei e pei o le moa ae uumi ona... ae ola tele i le toafa lea i Ausetalia. O le manu foi la e pei e matafefe, a vaai i se tagata ona sue loa lea o se mea e mau ai ae aliali uma mai vaega foi nei o le manu. O le mea lea ou te taua ai le vaega lea, e le o se tala aveane ai lau Afioga i le Fofoga Fetalai, ae ua faali manino mai ai i le Tala o le Tupe lenei le taufaaso ma le faaso pototo a le Malo, e leai se mea o tau faapogisa, e leai se mea o faanefu ai fuafuaga faataatitia a le Malo. E ui lava ina utiuti seleni o lo maua e le Malo, ae o lo o taumafai pea i le faaso aua atinae talafeagai e manuia ai Samoa, e aofia ai ma auala galue ia o lo o tagisa ai sui usufono o le Maota lenei.

Ou te fia muai momoli lau faafetai ma lau faamalo i le Afioga i le Palemia ona o le talia o le talosaga a lenei itumalo lea ua fausia ai e Saina le matou faleaoga. Faafetai tele i lau Afioga o lea ua muta lenei fesoasoani mo faleaoga, a o lea ua amatalia lo matou faleaoga. Ua faafetai atu o lea ua avea lenei itumalo ma aoga ua faamuliai fesoasoani a le Malo i tulaga o aoaoga.

O lea la e faafofoga mai lou itumalo, le paia e ia Sa Asomua ma Aiga, ia sagai ane ai o le tai, tatou aeaie ia lea manu ua ulu, ia viia le Atua. Faafetai i le tatou Malo aemaise foi o le agalelei mai o le Malo o Saina ua mafai ai ona faatinoina lenei faamoemoe aua le aotauina o alo ma fanau o si o tatou itumalo.

Lau Afioga i le Fofoga Fetalai, masalo o lena e te molimau, talu lava ona amata le Paeaiga lenei, na pau lava le mea ou te lauga ai, o auala galue o si ou itumalo. O le auala lea i Maninoa lau Afioga i le Minisita faapea foi i Saaga. O le Tala o le Tupe lava i tausaga taitasi ou te lauga ai lava i totonu o le Palemene lenei ma lagalaga matou auala nei, e lagaia foi i a matou faafaletui. Ua ave foi tusi talosaga i le Afioga i le Minisita, ua uma foi ona faatalatalanoa. E pei ua foliga mai ua le sao le fetalaiga a le tatou Alii Faaola lea o lo o faapea mai, “O le tuitui e tatalaina mai.” E foliga mai ua....

FOFOGA FETALAI: Malie le sui usufono se i tuu atu le avanoa ona o lea ua e tapa le Afioga i le Minisita ma le Matagaluega. Se i tulai mai lau Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese): Lau Afioga i le Fofoga Fetalai, ou te iloa e

saolele lava le sui usufono mamalu e lagalaga lava, so o se mea lava e fetai ai ma fai ai fonotaga. A o au e i ai lou tofi i le matou Ekalesia, e amata mai lava la i Falealili, Siumu ma Safata. O le tasi lea o mea e taulai i ai le faafetai a Siumu, aemaise lava o matai o Siumu, o le faafetai i le galuega lea sa fai i Tiavi, leaga e silia ma le \$12miliona le tupe sa faatino ai le faaleleiga o auala ia. O le latou faafetai lea. O le latou tuualalo, se faauma le latou auala. O lea la ou te maitauina pei e feteenai le finagalo o alii ma faipule ma le finagalo o le sui usufono mamalu. O lau faasilasilaga lea ma le agaga faaaloalo.

FOFOGA FETALAI: Ia, tulai mai le sui usufono mamalu e faaauau le saunoaga.

Tofa Hon TUUU ANASII LEOTA: Lau Afioga i le Fofoga Fetalai, faafetai i le Afioga i le Minisita mo le faauilavea. O ananafi na saunoa ai le sui usufono mo Samoa Aoa ma taua le auala lea i Tiavi. Na ou taumafai e tulai atu e faafetai i ai, o lea la ua manino mai o le auala lea o le auala o Samoa Aoa e le o se auala na o Siumu. O le auala lea e fesootai ai sauté ma matu, e faaoga e Samoa atoa lau Afioga i le Fofoga Fetalai. Ae faafetai i lau Afioga i le Minisita, ae ou te talitonu lava o lena e i ina le faimea.

FOFOGA FETALAI: Ia, se i tulai mai se tasi o sui usufono mo le Palota Taitoatasi, Afioga Maualaivao Pat Ah Him.

Afioga Maualaivao Pat Ah Him: Lau Afioga i le Fofoga Fetalai, ma le faaaloalo tele ou te tulai atu ai, e leai o auala ia sa ou taua, o auala mo Samoa atoa, o Samoa uma, ioe. O lea e ui atu i i, ae faafetai i le sui usufono o lo o saunoa, o lo o faafogafoga mai o lo o taua auala nei, ae o auala nei e aoga mo le atunuu atoa, e i ai foi le auala lea i Tiavi, ae faafetai mo lea galuega tele. Malo lava faafetai.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo o le mataupu lena o le mataupu ou te fautuaina sui usufono uma ia e agai atu ai auala i totonu o latou afioaga, aua le tuutuua i lalo le taua o auala nei mo outou lava. Ia outou faataua. Ae a uunai loa auala ia o Samoa atoa, o lona uiga, ua outou nonofo lava outou ma tau atu i o outou itumalo, e le taua auala ia, a o la e faataua e tagata o itumalo. O lona uiga la, a saunoa atu loa le Minisita, faitau ane ai ma auala ia e \$12miliona, ia o mataupu na e tataua ona... ua outou faalogo i ai, ua tele le mea lea ua sau ia tatou. Aua le tetee esea mea ia, leaga e tumau lava le tulaga o le aoga o auala nei. O lau upu foi lena na fai i le isi sui usufono mo Falealili ina ua matou o atu e tatala le latou auala. Na faafetai mai lava lea o le sui usufono mo Falealili faatoa fai lea o se auala. Ona ou faamanatu lea i ai, Alii e, o le auala lea e sau mai Siumu e tau i Lotofaga, o le auala uma lava o Falealili atoa, aua foi o le nuu o Falealili sa i tai, a o lea ua sii mai uta. O le auala lea e nonofo ai, e le gata o le auala o le auala o le Malo, a o le auala galue foi aua ua manuia latou o lea ua nonofo tonu i luga o mea o lo o tutu ai a latou faatoaga, e sili atu i tulaga o le latou tamaoiga ua i ai, e le faatusalia i nuu ia e pei o nuu la e oo mai nei o la e tumatafaga fale, e tau o i uta omai i

tai, o i uta toe omai i tai. Se i vagana la le taimi lenei o lea ua o ai auala i uta ua tala i ai nisi o afioaga nei. O la e la ua atili faaopoopo atu i ai le manuia.

A o le tulaga lava o auala nei, a ta faalogo mai loa ua alu atu, manatua ane auala na o lea e lavea atu ai ma lou itumalo, ona aua lea ne i tetee fua, aua e o loa tagata o la e elieli lou tuugamau. O tatou uma lava lea e i totonu i inei, ia tatou manatua, o faatumutumuga tofiga nei tatou te umia, e fia omai uma lava i ai tagata o tatou itumalo. E ta te nonofo lava la i inei, ae i ai foi isi o la e elieli malie lou tuugamau. O lena e te nofo lava oe ma tuu i lalo le taua o galuega tetele nei, e le na o le itumalo e manuia ai, e manuia atoa ai le atunuu atoa. O lona uiga ua e nofo lava oe ma eli lou tuugamau, ua faaoloataua ai ma i latou o lo o faifili mai ia te oe.

Lau Afioga i le Fofoga Fetalai, pei o sau faaopoopoga lena ona o le tu soo mai o le sui usufono lea mo Samoa Atoa e tuu i lalo. O i i totonu o le taulaga, i totonu lava o le taulaga, e amata mai lava i Vailele e alu i talaatu o Toamua, o galuega uma lava nei, o galuega o lea e manuia ai sui usufono nei Palota Taitoatasi. O le mea la lea, oulua ia o lo o lua i totonu o le lio lea, a oulua faafofoga mai lava ua alu atu lua tutu ae, faafetai i le Minisita, faafetai i le Minisita, ia faafogafoga mai pea tagata o lea e te lua manogi atu ai ma oulua i i. Ae afai soo se mea ma oulua tutu mai fai mai e leai o Samoa Atoa, e le toe omai oulua i le isi faiga palota.

FOFOGA FETALAI: Malo. Ia, se i tulai mai se tasi o sui usufono mo le Palota Taitoatasi, Afioga Maualaivao Pat Ah Him.

Afioga Maualaivao Pat Ah Him: Faamalo i le saunoaga a le Afioga i le Palemia. Ia, o le faafetai lea i le Afioga i le Minisita mo Galuega i galuega o lo o ua matagofie ona fai mo le matou itumalo, malo lava le galulue, faafetai.

FOFOGA FETALAI: Ia, tulai mai le sui usufono mo Siumu e faaauau mai le saunoaga.

Tofa Hon TUUU ANASII LEOTA: Faafetai i lau Afioga i le Fofoga Fetalai, leai o lea ua saunoa manino foi le Afioga i le Palemia i auala ia, leai e faatauaaina foi e lou nei sui usufono. Aua o lo o faapena ona aoga tele foi i lou itumalo le auala lea e ui atu i Tiavi e agai i tua, ae pei o le talosaga i auala galue ona e i ai tuamaota ma eleele o lo o faapea ona fia agai i ai lenei itumalo ae le o talafeagai auala.

Ae ui i lea lau Afioga i le Fofoga Fetalai, e le mate ai lou faamoemoe. Ou te talitonu ua matala ia Sega se finagalo o le Afioga i le Minisita, masalo o le a faia pea lou auala lea ou te tagisa atu ai, ou te manatu ua manatu tele mai le Afioga i le Minisita mo Galuega, Felauaiga ma Atinae Eseeese i le ma va nonofo ai, aemaise o le ma tafatafafuga ia Safata ma Siumu o le tama o le fale o le Tuamasaga i sauté. Lau Afioga i le Fofoga Fetalai, o le mafuaaga lea o le malosai mai o le Taitai o le Itu Agai o lou saga nofo pea i le HRPP ae le o faia ni ou auala, ae tolu ona auala tutua la ua uma ona fai, o le mea lena lau Afioga i le Fofoga Fetalai, ou te faafetai ai i le Afioga i le Minisita i le faasoa, faasoa tatau, ae o lea foi ua sau ai ma le auala galue o Sataoa i le lisi lea o auala galue o lea e faataoto mai mo le Tala o le Tupe lenei.

FOFOGA FETALAI: Malie le sui usufono o lo o saunoa, lea o lea na e taua le tuuaiga lea i le Taitai o le Itu Agai, se i tulai mai lau Afioga i le Taitai o le Itu Agai.

Afioga Hon Palusalue Faapo II: Ioe lau Afioga i le Fofoga Fetalai, ou te nofo ae ou alofa i lou uso a sui usufono vaeatu le Afioga i le Minisita, e faamulimuli lava le ma itumalo, o lea lava e faasafua ia Samoa, e na o le tasi lava le auala o Safata. O le mea lea e iloa ai le lē.... fai faapito, ae afai o le a outou lauga faapea, ona ou fai atu lea i le Afioga i le Minisita, tautuana ane le auala o Sataoa, le auala o Lotofaga, le auala o Nuusuatia ma auala uma o le ta itumalo.

FOFOGA FETALAI: Ia tulai mai lau Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, leai na ona faasao lava, e talitonu o lea e sese le mau.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neiote Sailele Malielegaoi: Lau Afioga i le Fofoga Fetalai, ana ou Taitai i le Itu Agai, ou te tu ae loa ou faapea i le Minisita, tautuana ma oe auala uma o le matou vaega ae aua lava le faia sou auala. E sao lelei le saunoaga a le tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi i le aso ananafi, o le e faasoa mea lelei e faamuliga ia te ia po o le matua leai lava o se mea. Ae ana faapea o au o le Taitai o le Itu Agai ou te faapea mai i le Afioga i le Minisita, fai muamua le auala o le sui usufono mo Vaimauga Sisifo o le tatou vaega, o Saleaula, ia faasolosolo ane lava i o, a leai loa se tupe e totee, e le afaina leaga o au o le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, se o le mea e fia faasao, leaga o lea e saunoa le sui usufono ua afaina atu ai au aemaise le Afioga i le Minisita i lo ma itumalo, o lea lava e faamulimuli, o lea e molimau mai lo matou itumalo atonu foi, o la e taumafai lo matou itumalo i le Minisita ina ia fai a matou auala, a o se tulaga i lenei vaega, o lena ua avatu talosaga ae leai ma se mea o faia, na o mea o lo o fai faapito a le Malo i a latou auala, a o lenei e tatalo. Po o matou ea e le o ni Samoa e le o se Malo o Samoa, ae o lea ua le faia auala i lenei itu. Ma lou faaaloalo lava.

FOFOGA FETALAI: O lea ua maua Palusalue, o lea foi o le a e agai i le isi itu o lea e molimauina e le Maota tatou agai foi ma tatala lou auala galue e umi lava, ia e uso lava le mulimuli ma le muamua. Ae tulai mai le sui usufono mo Siumu e faaiu mai le saunoaga o lea ua toe lua ou minute.

Tofa Hon TUUU ANASII LEOTA: Faafetai i lau Afioga, o le a ou le finau ma le Afioga i le Taitai o le Itu Agai.

Lau Afioga i le Minisita mo Galuega, Felauaiga ma Atinae Eseeese, aua ne i lilifa lava sou finagalo i le tuualalo a le Minisita mo Punaoa Faalenatura ma le Siosiomaga pe a faapea o i ai se, e leai e, lau Afioga i le Minisita mo

Punaoa Faalenatura ma le Siosiomaga fesoasoani ane i lau talosaga ma lou faaaloalo.

Mo le silafia e le mamalu o le atunuu o lo o faafogafoga mai, aua tou te tau le pua ma lafo mai i tofi o outou itumalo, aua ana faapea e fai i le mea e finagalo i ai manao o outou sui usufono, ia ua leva ona uma, ae paga lea e leai se mea e mafaia a outou sui usufono, e pule lava le Afioga i le Minisita mo Galuega, Felauaiga ma Atinae Eseeese i lana faasoa amiotonu mai lea taimi i lea taimi. E pau lava le matou matafaioi o le tuitui, faamanatu, faaoioi, ae pule lava Sitafune ia i le la o lona vaa.

Lau Afioga i le Fofoga Fetalai, faafetai mo lou avanoa, manuia le Fono.

FOFOGA FETALAI: Malo faafetai saunoa i le sui usufono mamalu mo Siumu. E talitonu ua faafogafoga ma le totoa lo tatou Malo e ala foi i talosaga, timaiga ma fautuaga foi ua tuuina mai, malo fetalai.

Ia tulai mai lau Afioga i le Tamaitai tasi o le motu, lau Afioga i se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow o lea ua maua le avanoa o le sui usufono mo Faasaleleaga Nu. 1.

Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1): Faafetai lava i lau Afioga i le Fofoga Fetalai mo le avanoa o se tasi o sui usufono mo Faasaleleaga Nu. 1, e fai atu ai foi se manatu e tusa ai foi ma le Tala o le Tupe 2014/2015.

Ae muamua lava ona ou piiama atu lau Afioga i le Fofoga Fetalai i le taulaga faafetai ua e siitia i lenei aso, e tusa ai foi ma le agalelei ma le alofa o le Atua ua tatou toe potopoto manuia mai ai i lenei taeao, e faaauuina a tatou galuega ma fonotaga e pei ona fuafuaina.

Ou te muamua ona ou faatulou ma faatalofa atu i paia ma faiga o le Maota nei, le afio o lau Afioga i le Fofoga Fetalai, afio foi lau Afioga i le Palemia, Sui Palemia ma lau Kapeneta, aemaise foi le mamalu o Minisita Lagolago. E faapea foi lau Afioga i le Taitai o le Itu o lo o agaia le Malo ma le mamalu o lena Itu o le tatou Palemene.

Ou te faatalofa atu i le tapuaiga a Samoa mai i ona mauga tetele seia oo i ona mauga iti, le afio o Lana Afioga Mamalu, O Le Ao o le Malo o Samoa, le Afioga i le Tui Atua Tupua Tamasese Efi ma lau Masiifo Filifilia. Afio foi le Sui o le Fono a Sui Tofia le Tama Aiga lau Afioga i le Tuiaana ma lau Masiifo. Le tapuaiga i lau Afioga i le Faamasino Sili faapea Peresetene o le Faamasinoga o Fanua ma Suafa, aemaise o le nofo a too o alii ma tamaitai Faamasino o Faamasinoga eseese.

E faatalofa atu i faauluuluga o ofisa o atunuu ma faalapotopotoga mai atunuu i fafo o lo o faapea ona tatou galulue faatasi ma fesoasoani mai aua le tau atiaaina o Samoa, e faatalofa atu i faauluuluga o Matagaluega ma Faalapotopotoga Tumaoti a lo tatou Malo, ae tainane foi le Failautusi ma le afaigaluega a le Palemene o lo o vae ma lima i ai le tatou galuega.

Ou te fia faatalofa atu i le Afaigaluega paia a le Atua i fata faitaulaga e fia o lo o tatalo ma faanonomanu, aua lava se manuia o Samoa ina ia uli ma sao i manu faiva o lo o aloaia ai taitai o Samoa. Ou te faatalofa ma faatulou atu i le faafogafoga tapuai mai a lou itumalo le Faasaleleaga Nu. 1, o le paia lava lea ia Tia ma Luamanuvae, Sua ma Tinousi faapea le Malelega a Malietoa. Le mamalu i le Falefia ma le Falesalafai i le lologa Pule ma le Faitoaga, le Laveimanino ma le Laveiaava ma upu ia oe Salelologa. Le paia aua Sua ma

le aumaga, Tusani ma le aiga sa Tusani, faapea foi le Taofia ma le Taomaopu. Saleleama ma Leitualasa ma le mamalu ia te oe sa Silafaiga. Le paia i le aiga Salevalasi faapea Tofilau ma le matua ia Asomua. Lau fetalaiga Leauanae ma le nofo ituaiga ia Sasulu. Le paia i alo o Letagaloa a Aitutagata ma Fofoga Fetalai faapea le mamalu ia Safune ma Taulauniu. Le afio i le Tamaitai Gatoloaifaana ma le falefa o Tuilagi ma le aiga sa Gatoloai, faapea Taito ma le Usoalii ma lo latou matua ia Tauvasamanaia. Afio le alo o Tamalelagi ma le Tuainafo...ma Tuioti, afio le gafa ia Soanai ma Patane, susu le Usoalii o Malietoa lau susuga Tuilaepa, le mamalu ia Safuamua ma le nofo ituaiga faapea le Tapaaufanua ma le Faleono, ma le mamalu ia Salemuliaga.

E faatalofa atu foi i le tapuaiga a faletua ma tausi, saoa ma sao aumaga, e faatalofa atu i le tapuaiga a lau susuga i le faifeau toeaina, lau Susuga Solomona Tuatagaloa ma le tina ia Aneli, ae tainane le mamalu o le Aufaigaluega paia a le Atua o lo o faafalelemalu i totonu o le tatou itumalo ma tatalo mo se manuia o lo tatou itumalo. O la outou tapuaiga ma talosaga o lo o maua ai se manatu e maua ai foi se agavaa a le auauna vaivai, a o alofaiva faatasi ma le Afioga ia Magele Mauiliu e fai ma sui usufono o lo tatou itumalo i faiga upufai a Samoa. Faafetai tele lava tatalo, faafetai tapuai mai.

Lau Afioga i le Fofoga Fetalai, o lou tulai atu i lenei taeao, na o le agaga faafetai lava ou te fia faaleoina. E muamua lava ona ou faafetai i le Atua ma Lana foai, aua a tepa i tua ma tomanatu i taimi ua tuanai, le leai o ni seleni se tamaoaiga e tagolima i ai Samoa. Ae ua a nei? O lenei toeitiiti a tatou oo i piliona, ua uma ni tai selau, tea atu ni tai afe, uma miliona, ae o lenei ua toe o ni piliona tatou tagolima, o le foai alofa lea a le Alii ia Samoa ou te fia avatu ai lava le agaga faafetai i le faafogafoga mai ma le silasila mai a le tatou Atua Silisiliese o lo o Faavae ai Samoa i Lona agalelei ma Lona alofa, e aumai ai pea faamanuiaga mo lo tatou atunuu.

E faapea ona ou faafetai lau Afioga i le Fofoga Fetalai, i le Afioga i le Palemia ma le Kapeneta, ma o upu tuusao foi lau Afioga i le Fofoga Fetalai, ou te faafetai i le Faigamalo a le HRPP, aua e moni lava e pei foi o upu ua faalogo ai i lenei taeao, e muliai ona ioeina i totonu o le tatou Palemene ia se Tala o le Tupe e tuuina mai ia a o le lufilufiina o le tapenapenaga ma le faaso, ia ua uma lea ona alofaiva i ai le Afioga i le Palemia ma le Taitai foi o lenei Itu Faa-Upufai, le Kapeneta ma le Malo. O lea e avatu ai le agaga faafetai i le lufilufi lelei, le faauta lelei ia ma le tofa loloto e faatino ai le Tala o le Tupe i lenei tausaga. Ou te faafetai atu foi i le Afioga i le Taitai o le Itu Agai, ia faapea foi Taitai o Itu Agai uma i taimi ua tuanai, aua e moni lava, o la outou foi fesoasoani mai, timai mai, luilui mai, e tapena ai foi ma nofo uta i ai le Faigamalo ina ia atoatoa ma ia lelei galuega faatino aua lava le manuia o Samoa, po o le a lava, e tatou te autasi lava, ia manuia lo tatou atunuu o lo o faapea ona aumai lo latou faatuatuaga e tatou te taitaia le Faigamalo i lenei foi vaiata ua tatou tutu mai ai.

Ou te faafetai lau Afioga i le Fofoga Fetalai i le Afioga i le Minisita o Tupe le Afioga i le Palemia, e le galo foi ia te au lau Afioga i le Fofoga Fetalai, e ao pea ona ou taua le Afioga i le Alii Minisita sa i ai, Afioga Hon Faumuina Tiatia Faaolatane Liuga. O a foi ni faaletonu, o a ni le atoatoa, ae ou te talitonu sa lotolotoi ai foi o ia i totonu o le sauniga ma le tapenapenaga o

lenei Tala Faatatau o Tupe. E faapena lava ona fai ma le atoatoa le auunaga i lea taimi ma lea taimi, ae e le faagaloina ai le aoga ma le lelei o le tagata.

E faafetai atu i le Matagaluega, le Pule Sili ma le Matagaluega o Tupe faapea foi le Tamaitai Pule Sili o le Matagaluega o Tupe Maua ma Matagaluega uma ma Faalapotopotoga a le Malo, aua o outou lava o lo o i ai le mafai ma le atamai e faamaopoopo ai le tamaoiga o Samoa ina ia mafai ai ona maua ni seleni e atiae ai lo tatou atunuu - malo lava fai o le faiva, ua faamalo le tautua.

E le mafai ona ou laaloa e aunoa ma se faafetai i le Taitaifono o le Komiti o Tupe Maua ma Tupe Totogi a le Malo aua lava timaiga matagofie e pei ona faitau atu i ai i le latou Lipoti, e fesoasoani ai foi i le aufaigaluega ina ia aua ne i faatamala ina ia o latou silafia, o lo o tulituliloaina lava galuega e pei ona latou alofaiva i ai.

Lau Afioga i le Fofoga Fetalai, e pei lava ona ou amata atu i le amataga, na o le agaga faafetai lava ou te fia faamauina. E faapea foi ona ou faafetai atu i lau Afioga i le Minisita mo Galuega, Felauaiga ma Atinae Eseeese i le tali leleia foi o le talosaga na tuuina atu mo nai galuega i totonu o lou itumalo e pei ona faatino ai le oo atu o le eletise i nisi o lo matou alaafaga i uta. O i latou lava ua naunautai e gagauina le vaomatua aua lava le atiaeina o aiga, nuu aemaise lo tatou atunuu lautele. E faafetai atu i le eletise ua oo atu i nisi o aiga i uta i lo matou pitonuu i Vaiafai. Ona pau lava o lea, a tau ane ai i lou finagalo o lo o taatia foi talosaga aua le suavai, po o le toe faaopoopo foi o lo latou auala galue aua toe tasi lava se kilomita lau Afioga i le Minisita ona ua uma ona ou savalia ma ou fuaina, ua toe tasi lava sina kilomita ona aofia uma loa lea o nai aiga ua aumau ai i uta i ina, a o lo o galulue uma, e leai ma se mea o avanoa o lo o taufai galulue aua le laueleele.

E faafetai ona ua matauina pea le faaleleia o auala i totonu o lo matou itumalo aua le fegasoloai o le paia ma le mamalu o Samoa. O lo o faalauleleia pea ia tulaga, e viia ai pea le Atua aemaise le agalelei mai o lo tatou Malo.

Lau Afioga i le Fofoga Fetalai, toe tasi lava le vaega lea e fia faaleleia aua o se manatu maualuga, o lo o malosi lava le atinae lea o tagata tafafao maimoa mai fafo e fesoasoani malosi i le tamaoiga o lo tatou atunuu. O le isi lava lea mea o lo o aumai ai pea faasea ma tuualalo a nai sui tamaitai o lo matou motu i Salafai ona o le faaletonu lava lau Afioga i le Minisita mo Punaoa Faalenatura ma le Siosiomaga o le tulaga lea i le aoina o le lapisi, tulou lava le mamalu o le Palemene ma le faafogafoga mai a Samoa. Talu ai o lea ua toe amatalia le tausaga fou, masalo o lo o faapea foi ona toe tapena ni konekarate aua foi ia fuafuaga mo le faaleleia o le siosiomaga aemaise le faamatagofieina o lo tatou atunuu i le toai taunuu mai o i latou e asiasi maimoa mai. O se vaega taua lena e ao ai ona toe tagai pea i ai, faamolemole o lo o tasi lava le aso o lo o aoina ai le lapisi i le itu atu lea i le Faasaleleaga i le Itu o Tane ma alu atu ai i Asau. O lo o faaletonu pea ma e ui lava o lo o avatu pea tusi a le Afioga i le Minisita mo Tina ma Tamaitai, Atinae o Nuu ma Afioaga ma Agafesootai faapea foi le mamalu o le Matagaluega, a o lo o faapena lava ona faaletonu lea tulaga lau Afioga i le Minisita.

Ou te piiama atu foi lau Afioga i le Palemia i le saunoaga ma le tuualalo e pei ona saunoa i ai se tasi o sui usufono mo Faasaleleaga Nu.2, masalo o le agaga foi lena o le tele o sui usufono mai Salafai ina ia atiae lelei ina ia mafai ai ona taofia tagata o lo matou motu o lo o autovaa mai pea i inei aua sailiga manuia mo aiga. E tele lava nai faafitauli i nei vaega, ae ona o le tamaoiga

ua motusia ai mafutaga ma aiga, ae a faapea lava e maua ni nai atinae e pei ona taua le falei'a, ou te tatalo atu lava i lau Afioga i le Palemia.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E taua lava le finagalo lea ua faaalua ma o le ala foi lena na fai ai le tatou Taulaga i Salelologa ona o le taumafai e uunai atu le atinae i Savaii e lelei e tele le laueleele. O le mafuaaga foi lena ou te manatu ai e pei e le itiiti ifo i le faalima ona omai savali a fale tuuapa ia i Amerika Samoa ma tutuli lava i Savaii. E pei o mea ia sa masani ona fai o le o i Savaii ma o i Fagaloa, ona o Fagaloa e taua le tele ma le loloto o le taulaga toe lata i Tutuila. O Savaii o la le e tele lava le Taulaga i Asau ma e laitiiti foi le galuega e toe fai i ai e faapea foi ma Salelologa. O le tulaga sao lava lena, ana faapea e mafai ona omai loa ma faatu i Savaii meamanu ua matua manaia tele.

O le faalavelave o atinae nei, o le mafuaaga e omai ae vaai i auala e taugofie ai mo latou ina ia tele ai a latou tupe mama e maua. O le ala lena e omai ai lava ma fanati mai iinei i Apia. E tiga lava ona fai atu e o i Savaii, ae agai mai lava i tulaga e tulata i le mea e taunuu mai i ai vaa ma toe aveese atu ai. Aua afai e faalele i Amerika, e lata mai le malae vaalele e ave i ai i'a nei ma laitiiti ai le tau mo i latou, ae a ave nei i Savaii ua atili ai ona faulai tau ma atili ai lava ona le fia omai i Samoa.

E lua la Kamupani I'a ia e faatalanoa i le taimi lenei, a faapea e taunuu i se manuia, e faaono amata i le amataga o le tausaga fou. E amata i le faatauina o i'a a o tatou vaa laiti. O lea ua uma ona fai feiloaiga a se isi Faalapotopotoga po o le Asosi o Vaa Laiti nei, e amata i ina po o le amataga o le tausaga ae e tataua ona oo atu i le faaiuga o le tausaga ua amata loa le latou loia operation, o le vaega lea e tuu eseese ai aano o i'a ma faalele loa i Amerika.

E pei la o le tulaga i le tuuina i lalo o le tau, o le ala lena e faigata tele ai ona uunai i Savaii atinae ia, a o le mea moni lava lea e aumai e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow ma le sui usufono mo Faasaleleaga Nu.2, o le mea tonu lena o lea e i ai le agaga o le Malo ia tatala atu i tua atinae nei, ae fai fuafua foi i lo latou talia ma le faafaigofie aua o le iuga o ni feutagaiga e faamalosi e tatou o le o atu ma ninimo atu ai lava ma o e le toe omai. E lelei la le i ai o sina fasi falaoa e tusa lava pe na o se pau falaoa, a o lea e maua sina mea tatou te lamulamua nai lo le o ma o atu ai lava e le toe oo mai, ae lelei ona taatia mai le fautuaga ona e tele isi atinae o lo o faatalanoaina, ae ou te faafetai atu i le mataalia o a outou afioga i sui usufono i le laga mai pea o le tulaga lea ona o le mea moni lena o lea o lo o i ai i lo tatou Malo. Mai lava i le taimi na tulai mai ai le Tootoalii, o le agaga lava lea e tasi o le taumafai e uunai ma tala atu i tua atinae aua o le faigofie foi lena mo lo tatou Malo.

FOFOGA FETALAI: Malo faafetai saunoa. Tulai mai le sui usufono e faaauu le saunoaga.

Afioga Hon GATOLOAIFAANA AMATAGA ALESANA GIDLOW:

Faafetai tele lava i lau Afioga i le Palemia mo le faamalamalamaga manino ua maua ai foi le mafanafana o le mafaufau ma e faamautuina ai foi le mau o lo o fai ma manulauti a lenei Vaega Faaupufai o lo o taitaia e lau Afioga i le Palemia, o le mea e lelei i Upolu e faapea foi ona lelei mo Savaii, ae faafetai mo le matupalapala.

Lau Afioga i le Fofoga Fetalai e pei lava ona faaalua muamua atu, o le agaga faafetai lena e avatu ina ia silafia ai foi e le Palemene aemaise le faafofoga a Samoa, e matua lagolagoina e lenei sui usufono mo Faasaleleaga Nu.1 le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015 ua folasia nei i malae aemaise lava ou te iloa o lo o lotolotoi ai i totonu se tasi o sui usufono o lo matou itumalo, Afioga i le Minisita mo Aoga, Taaloga ma Aganuu i le faafoeina ma le tapenaina o lenei Tala o le Tupe.

Tau ina ia alofa le Atua ia faamanuia i lau Afioga i le Fofoga Fetalai aua le faafoeina o le Fonotaga, ia faamanuia mai foi i le Afioga i le Palemia ma le Kapeneta ma le mamalu o le Palemene, soifua.

FOFOGA FETALAI: Malo faafetai saunoa i se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow, o se tasi o tamaitai tasi o le motu. E manatu o lea ua faafofoga le Malo e ala i la tatou talosaga ina ia tautuana lo tatou motu aua ni galuega mo alo ma fanau a le atunuu aemaise le tamaoiga mo Samoa atoa.

O lo o maua pea le avanoa mo se sui usufono e fia saunoa. O lea ua tulai mai le sui usufono mo Faasaleleaga Nu.3.

Afioga PESETA VAIFOU TEVAGA (Faasaleleaga Nu.4): Faafetai tele i lau Afioga i le Fofoga Fetalai - faafetai ua sosoo le fau ma le fau. Ua uma ona saunoa se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow, ae faafetai i lau Afioga i le Fofoga Fetalai ona ua maua le avanoa e taumafai atu ai se sao o lou itumalo.

E muamua lava ona ou faafeiloai atu ma faatulou atu i le tapuaiga a lo tatou atunuu i le afio O Lana Afioga Mamalu, O Le Ao o le Malo ma lau Masiofo, afio lau Afioga i le Sui o le Fono a Sui Tofia ma le Masiofo, afio lau Afioga i le Faamasino Sili, le mamalu i Tamaitai ma Alii Faamasino o le Matagaluega o Faamasinoga o Fanua ma Suafa.

E faafeiloai atu foi i lau Afioga i le Palemia, le Sui Palemia ma lau Kapeneta faapea foi le la Itu o le Malu i le afio o lau Afioga i le Taitai o le Itu Agai ma le mamalu i la outou Vaega Faaupufai, faapea foi le mamalu o le Palemene ua potopoto, le susu o Alii ma Tamaitai o Faauluuluga o Matagaluega ma Faalapotopotoga Tumaoti a le Malo. O lenei la avanoa a o le i tuuina atu se sao o lenei sui usufono, ou te fia oo atu e faafeiloai i lou itumalo pele o Faasaleleaga Nu.4.

Lo tatou itumalo ou te faatalofa atu aua e faigata le paia ia te oe Satuala, o oe o le Aiga Faalagilagi e masaesae ai le lagi ia te oe. Lau Afioga i le Fofoga Fetalai ma lo tatou itumalo, o le a ou le oo lava i paia ma mamalu aua e uma lou avanoa e le i uma ona tolaulau ma talatala atu mamalu o lo ta itumalo.

Lau Afioga i le Fofoga Fetalai, ou te faafetai ona o le Tala o le Tupe i le utiuti o le faaso. E pei foi ona saunoa nisi o sui usufono mamalu ua pau le Tala o le Tupe i lenei tausaga, a o lau matau ma lou molimauiina, e ese le taua

o lenei Tala o le Tupe. A pau le Tala o le Tupe, e tau mai ai i ina le sologa lelei o le tamaoaiga. O lea tatou te vaavaai i le tulaga ua i ai taumafa i totonu o lo tatou atunuu, o lo o tofua lava le afioaga ma le maketi e faatauina atu ai le tele o faaeleleaga. O si o tatou atunuu pei ona taua e se tasi o sui usufono mamalu, e soifua lava Samoa ia i lana aganuu. E mafai ona savalivali atu i le tuaoi, e faapena le sue mea faatasi. E tele lava mea e maua ai seleni e soifua ai le tele o matai o nuu ma afioaga, o maliu, o matai ma mea tutupu i lea afioaga, e tele lava vaega e maua ai nisi o faamanuiaga e soifua ma ola ai lo tatou atunuu. O lea la ua tatou vaavaai i le Tala o le Tupe i lenei taeao, e faapena se lagona ma se manatu o lenei itumalo. O lea tatou te silafia lelei e le o tele se tamaoaiga ma tatou oloa e auina atu i fafo, ae a tatou molimauna le tele ma le anoanoai o taumafa, faafetai i lau Afioga i le Minisita mo Faatoaga ona ua ese lenei vaitau. O lea ua tele foi o nisi lava o le toatele o le atunuu ua tele ina agai i faleoloa, ua fesuisuia i latou taumafa i le araisa, o le falaoamata, ua fiu foi latou e fiu i le taumafa ona ua anoanoai talo ma fai ma ulu ma mea faapena. O i ina e molimauna ai le lelei o le tulaga o lo o i ai le tamaoaiga o lo tatou atunuu. E momoli atu ai le faafetai i lau Afioga i le Minisita ona o tulaga lelei ia e le o fia aai si o tatou atunuu. E moni lava foi i tulaga o mea tau tupe, ua tatou masani foi, o lo o maua foi le tele o....

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie le sui usufono o lo o saunoa se i tuu atu le avanoa i le Taitai o le Itu Agai.

Afioga Hon Palusalua Faapo II: E faamalulu atu i le saunoaga matagofie a le sui usufono. Na pau lava le mea se i faamanatu atu, na o au lava le mea lea e ai e le atunuu lenei, na o le moa lava, ia ma nai eleni e maua mai i faalavelave, e ui lava ina expire le eleni ae ai lava. O le mea lea e faamanatu atu i le sui usufono, na o le moa lava lea, ua uma ituaiga kuka ae na o le moa lava. A o se isi mea e pei o mamoe, povi, ma tulaga faapena, e leai lau Afioga i le sui usufono mamalu.

FOFOGA FETALAI: Ia, tulai mai le sui usufono mamalu mo Faasaleleaga Nu.4 e faaaau le saunoaga.

Afioga PESETA VAIFOU TEVAGA: Faafetai i le faauilavea a le Afioga i le Taitai o le Itu Agai. Ai o galo i le Taitai o le Itu Agai ua uma ona tuumatamaga meataumafa a le lalolagi lenei, ae taumafai e faaitiitia. Le health promotion lena o lea e saunoa soo i ai le Minisita mo le Soifua Maloloina, aua le matele e taumafa i mea ia o povi, o puua ma mea faapena, o mamoe, ae toaaga e taumamafa i le moa ma le ia. O le mea la lena o lo o taumafai ai e faamalamalama atu e lagolago atu ai i le finagalo o le Minisita mo le Soifua Maloloina i le faataua o le health promotion lea e pei ona taua. Lau Afioga i le Fofoga Fetalai....

Afioga Hon Tuitama Talalelei Tuitama: Lau Afioga i le Fofoga Fetalai....

FOFOGA FETALAI: Ia, o lea la o le a faamalamalama le eseesea o meat. Se i tulai mai le Afioga i le Minisita mo le Soifua Maloloina, e taua lou tulai mai e faamalamalama le tulaga lea ona e fia tausami mamoe lava le Taitai o le Itu Agai i taimi uma.

Afioga Hon Tuitama Talalelei Tuitama: Ou te masalo ai ua galo i le Taitai o le Itu Agai le tatou Tulafono foi lea e faasa ai le siusiupipi, ona o le tulaga o le le agavaa mo le fofoga taumafa talu ai ona o le faatupulaia o le tino puta. E tasi lea togafitiga, o lea e sao lelei lava le saunoaga a le sui usufono, o le ala tonu lava lea e agai i ai tatou taumafaiga o le health promotion o lo o taumafai nei, ina ia taofia le soona taumafa i taumafa le talafeagai o lea o lo o faatupulaia ai le tino puta, suka, le toto maualuga ma le mai fatu.

O le tulaga foi i le aano o le moa, o le tasi lea aano e sili ona lelei mo le taumafa, e le gata e lelei lona tofo, e mama foi lona tausiga, faigofie ma e le gata foi i lena, e le manaomia le matua vevela tele o le ogaumu, e sefe ai foi mea tafuafi, faapena foi ma mea o suauu ma penisini ma kesi, aua o le moa e le manaomia le selau tikeri. O le selau tikeri lea e puna ai le vaipuna, e le manaomia le oo i le selau tikeri e lelei ai le aano o le moa, e 75 tikeri ona vela lelei lea o le aano o le moa. O le mea lea, e tele le anoanoai o le aoga o le aano o le moa, ma o lau foi fautuaga, toaaga e tausami le moa, aua le toe tausamia le mamoe ma le povi aua o le mea lena e tele ai le gao. Ma le faaaloalo i lau Afioga.

FOFOGA FETALAI: Malo. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea sa saunoa le Minisita mo le Soifua Maloloina i le moa foi lea e faavela, ae tasi lava le vaega lea sa agai i ai. Pe mafai lava ona oo sau faamalamalama i le lelei o isi ituaiga kuka e tai pei o le moa tunu ma le moa saka, aua na o le pau lava le mea lea na ou faalogo atu i ai na o le moa falai. E lelei foi lou faasilasilaina ia Palu ina ia taumafa ai i moa sao, aua o lea ou te faalogologo atu pei e fialia i le mea lea o le ai moa, a o au lea ou te faalogologo i le mea lea, e tau le matala lau faalogo ona o le sela tele o le Taitai o le Itu Agai. A o lona uiga o lea ua maua nei e ai moa le Taitai o le Itu Agai. O le a le ituaiga kuka e lelei?

FOFOGA FETALAI: Ia...

Afioga Hon Palusalue Faapo II: Lau Afioga i le Fofoga Fetalai, o se mea e fia faasao la?

FOFOGA FETALAI: Ia, o le a le mea e fia faasao o oe na e tuuaia na e saunoa mai e tuu le ai moa?

Afioga Hon Palusalue Faapo II: Ia, a sela o soo le paka o ou taalo ai i le Aso Toonai? E leai ma se sela. E uma lelei le taimi o la e ou te taalo. O le mea lena e fia faasao. A o le moa, ae le i saunoa le Afioga i le Minisita o le Soifua Maloloina, na ou matamata i le TV i documentaries foi nei i le fafagaina o moa nei, e tatui i tui ina ia vave ona lapoa le moa. E tolu aso ua

taumalua le moa, ua tau le mafai ona savali i le lapoa o le moa. A o lea e fai ane suesuega, e le ai ma se polotini e maua mai i le moa ona o tui ia ua tatui ai. O lea la ua faatau ma iiinei ona o le taugofie, aua na pau lea o le mea e gafatia e o tatou tagata o le moa gaoa lea e saunoa i ai le Afioga i le Palemia, po o le a le kuka e fai, pe saka, pe tunu pe falai, e gaoa lava le moa, ioe. E mamai ai si o tatou atunuu.

FOFOGA FETALAI: Ia, o lea ua maua le finagalo o le sui usufono mamalu. Malie la lau Afioga i le Minisita se i tuu atu le avanoa i le Taitaifono o le Komiti o Tupe Maua ma Tupe Totogi.

Susuga Hon Papaliitele Niko Lee Hang (Palota Taitoatasi): Faafetai lava i lau Afioga mo le avanoa, a o se mea e fia faasao lau Afioga ona sa tuai atu le Afioga i le Palemia e maimoa i le taaloga lea. Sa ou matamata i le taaloga, na uu lava le puimanava ma savalivali solo i totonu o le malae i le taaloga atoa le Taitai o le Itu Agai. Faafetai.

FOFOGA FETALAI: Malie lau Afioga i le Minisita mo le Soifua Maloloina o le a tuu atu le avanoa pe a tatou foi mai i le tatou taimi malolo ona faaauau lea o ituaiga kuka eseese e talafeagai i le moa.

Ou te faasilasila atu o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa mo lana malologa masani i le itula e 10.45 i le taeao ma toe faaauau i le itula e 11.24 i le taeao.

FOFOGA FETALAI: Malo. O sui vaaia ia o le foi o le malosi i le tino, ua maea ona tali le sua ma maua le faamalositino aua le paia o le tatou Maota. E momoli atu le agaga faafetai tele i le paia ma le mamalu i lenei itula o le aso. E talitonu o lea ua tatou taunuu i le maea ai o le tatou malologa muamua aua le faaauauina pea o le tatou polokalame e pei ona faatulagaina.

E faia le tatou malologa o lo o faapena ona tuuina atu le avanoa i le Afioga i le Minisita mo le Soifua Maloloina a o tulei saunoa le Afioga i le sui usufono Faasaleleaga Nu.4 ona o le faatauaina o le soifua maloloina i ona vaega eseese i le faatauaina o taumafataga e maua ai le soifua maloloina o le tatou atunuu.

Tulai mai lau Afioga i le Minisita ona tuu atu ai lea o le avanoa i le faaauauina o le saunoaga a le Afioga i le sui usufono mo Faasaleleaga Nu.4.

Na toe faaauau felafolafaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

Afioga Hon Tuitama Talalelei Tuitama: Lau Afioga i le Fofoga Fetalai, e le alu loa foi so matou taofi, e ao lava ona momoli atu le agaga faafetai tele i lau Afioga ma le mamalu o le Ofisa o le Fono i le tapenaina foi o le faamalosiaga o le tino aua sui usufono mamalu o lenei Fonotaga. O lea la ua palega auu le taliga o le sua ma ua sao i alo foi se taumafataga i sui usufono

mamalu, ua toe amatalia galuega pei ona tofia i ai tatou i lenei aso. Ua ou tulai atu la lau Afioga ona o lo o i ai le manao o lea ua lafo mai, ma o tulaga e aafia ai le soifua maloloina aua lava le tulaga o taumafa. E pei lava o le fili numera tasi lea o lo o feagai nei ma le tatou atunuu ma le tele foi o isi atunuu o le Pasefika, o tulaga lava ia i le taumafa, aemaise ai la Samoa, aua e le o na ma se laina le silafia o le tatou atunuu e leai se isi o toe matelaina i se fia taumafa, ua fau ma soloi le tamaoaiga i meataumafa eseese. O lea ua tatou saoloto ai i lenei vaitau. O le ala foi lea o le filifili o le tatou iloiloaina o meaai nei tatou te aai ona ua tele naua meaai. Aua ana faapea na o le tasi lava se taumafa e tatou te aai ai, atonu o i ai ni tulaga moomoo a mea la ia maua lea ma lea ma lea. O lea la ou te le faasaoina ai le taofi o le Taitai o le Itu Agai o lea e faapea mai na o le moa moa moa. Ae ia manatua e i ai le upu foi lele, “Moa moa lulu.” A ua fiu i le moa, ia liliu ane i le lulu.

Lau Afioga i le Fofoga Fetalai, o le tulaga lea e maitau atu i saunoaga foi ma fetalai ma le la Itu, o lea e agai le latou tilotilo i taumafa mai fafo. O le faamaoniga o lenei mau, o lea e le i mamao atu nei sa saunoa le Afioga i le Taitai o le Itu Agai, o moa e tatui e faapepeti ai ma taumalua mai se moa, e tumu i le gao ma tulaga uma faapena. O lea e agai lava lona mafaufau i moa o lea e aumai fafo. A o le tulaga lea matou te talanoa atu ai, o tatou moa lea e iinei i Samoa o lea e fafaga, tino lelei, leai ni gao. Afai la o le ituaiga moa lea mai fafo lea e agai i ai le saunoaga e pei ona mafua ai le talanoaina o le mataupu i le moa. Mo le silafia o le faiga o le moa lea e le aumai loa faaaoga faapena. E aveese muamua pau o le moa ma vanevane ese gao po o mea lololo o le moa ona faaaoga lea na o le aano. E iloagofie lava la i latou o lea e taumamafa i pau o moa, e saunoa mai e pei e sesela.

O le tulaga la lau Afioga i le Fofoga Fetalai i le faaaogaina o moa ma mea nei o tui, e le o toe ano i ai tatou. Aua foi afai o lea tatou te aumai taumafa mai fafo, o le auala lea o lea e fai nei i fafo ina ia faatino lelei ai moa, e faamatagofie ma vave ona taulia ai lea e mananao atu i ai tatou. E le na o le moa la, e tui foi povi, e tui foi aano o le anoano o manu ia tatou te faaaogaina. O le mafuaaga lea, o tui na e fai, o isi o tui na o mea nei o antibiotic. O le mafuaaga foi lenei o lea e agai i ai taumafaiga a le Soifua Maloloina ona ua tele le faaaoga e le aufai lafumanu.....

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai.....

FOFOGA FETALAI: Malie le Minisita se i tuu atu le avanoa i le faauilavea.

Tofa Lealailepule Rimoni Aiafi: O le mea e fia malamalama ai ona ua saunoa le Afioga i le Minisita a aumai le moa ia aveese le pau. O le a la le mea ua le ave ai sana fautuaga e oka mai ni moa e leai ni pau lau Afioga i le Fofoga Fetalai? Ia manatua o le pau le isi mea e aoga uma lava i le tino, ae afai la ua finagalo o le pau o le mea e le fetai mo tatou, e tatau la ona ave i ai se fautuaga ia aumai na o moa e leai ni pau.

Ma le faaaloalo lava.

Afioga Hon Palusalue Faapo II: Lau Afioga i le Fofoga Fetalai ona o lea e agai mai ia te au le saunoaga, ae ina ia faasaoina le taimi o le saunoaga matagofie a le Afioga i le Minisita.

FOFOGA FETALAI: Ia, malie lau Afioga i le Minisita.

Afioga Hon Palusalue Faapo II: O le upu moni lava, o le taimi lenei i nai aiga, o lea ou te talanoa atu i mea o lo o tutupu i aiga. E taugata le soifuaga ma taugata le moa. O le a tipi ese la le pau ma le gao o le moa a o le a le mea o le a ai e le aiga? E pei o le mea lenei, aemaise la o le aano o le moa lea e tui i ai le vailaau, e tusa lava la pe aveese le pau ma le gao a o la lava e i ai le vailaau lea e faaletonu ai ma mamai ai tatou, a o le faalavelave lau Afioga i le Minisita e leai se isi mea e mafai ona faatau e nai aiga, na o le moa lava.

FOFOGA FETALAI: O lea ua maua atu lau Afioga i le sui usufono mamalu. O lea o le a uma mai le faamalamalama leaga o lea o le a alu le taimi o le sui usufono e ana le lauga a o lea o le a faauma mai le faamalamalama ona toe faaauau ai lea o le saunoaga.

Afioga Hon Tuitama Talalelei Tuitama: E aoga foi le pau i le transportation aua a aumai le moa e leai se pau, e oo mai iinei ua malepe. E le o aumaia la le pau e taumafa, a o la e aumai e faamaopoopo ai le tino o le moa ina ia taunuu mai iinei o la e ato le moa, a o lea ua aumai ai e tatou pau.

Lau Afioga i le Fofoga Fetalai, o le tulaga la lea ua i ai ua le o toe alo ese ai tatou mai le tulaga lea aua foi e le o faia e tatou? A o le mea tonu lava lea o lea e uunai atu nei e pei ona i ai le tatou Health Promotion lea e taumafai atu nei. Ia o e fafaga moa aua e taugofie le penu nai lo le tau o le moa lea e aumai i fafo. Na ona togitogi lava o nai penu omai moa ai, oo i lea vaiaso faalalo le moa e fai ai le mea tausami. O le faamatalaga lea i le moa, ae se i ou oo atu la i le kukaina lau Afioga i le Fofoga Fetalai.

FOFOGA FETALAI: Ou te faamalulu atu i lau Afioga i le Minisita, o le a ou tuuina atu le avanoa i le kukaina o le moa leaga o lea e tele nisi o mataupu, ae faafetai tele o lea ua manino ma malamalama.

Afioga Hon Tuitama Talalelei Tuitama: Faafetai, o lau Afioga lava, ae a finagalo i ai e augofie lava ona e anoanoai faiga i le kukaina o le moa o lea e le i avatua.

FOFOGA FETALAI: O le a taatia le kukaina o le moa se i aulia le taimi e tali ai lau Afioga i le Minisita.

Tulai mai le sui usufono, o lea ua lagalaga le Maota talu lou laga o le moa Peseta, ae tulai mai e faaauau le saunoaga.

Afioga PESETA VAIFOU TEVAGA: Faafetai i lau Afioga i le Fofoga Fetalai. Masalo o le a ou alo ese ma le moa aua o lona uiga e uma lava lou taimi o faauilavea le Taitai o le Itu Agai faapea foi le Minisita mo le Soifua Maloloina.

Silasila foi lau Afioga i le Fofoga Fetalai, ua ou le agai lava i paia o lou itumalo ona o le manumanu i le taimi. O si ou itumalo e sili ona pele ia te au; ua taoto ona paia ma ona mamalu ona o lou manatu ia aoga uma lou taimi e avatu ai gai mea ga mafua ai oga ou seei i le gofoa legei. O le mea lea lau Afioga i le Migisika, lau Afioga i le Fofoga Fekalai, masalo o le a ou agai aku loa i nai mataupu sa taumafai i ai lou itumalo na mafua ai ona latou filifilia au i lenei nofoa.

Lau Afioga i le Minisita mo Galuega, Felauaiga ma Atinae Eseese, e momoli atu le faafetai a lou itumalo. E ui lava ona e le i faatinoina le fausiaina o le auala galue, ae ou te faafetai i lau Afioga i le Minisita ona o lea ua ou vaai i le lisi nei i le taeao o lo o i ai le auala galue o Puapua.

O le tasi lenei afioaga talu lava ona faavae Samoa i le 1962, o lea faatoa mafai ona maua le avanoa e fai ai lona auala. O le agaga fiafia lea ia te au aua ua leva foi ona seei nisi o faipule ma Minisita o lou itumalo mai le afioaga o Lano, ae momoli atu lau faafetai ona o lea faatoa toe oo mai lea o se Puapua i lenei nofoa i le Maota, faafetai o lea ua talia le talosaga a lou nuu, ae toe pau lava le talosaga a Puapua o lona taligalu. Ou te manatu o le tulaga lea o lea ua i le Minisita mo Punaoa Faalenatura ma le Siosiomaga. O le agaga lea e momoli atu ai le faafetai i lau Afioga i le Minisita. O le tele ia o le sao o le afioaga lenei o Puapua i lo tatou Malo ma le motu tele i Savaii. Sa faamatuu atu e Puapua ona eleele ma ona mauga e faaogaina e fausia ai aualatetele ia e amata atu i le uafu e tau i le Itu o Tane, e faapea foi i le auala lea i Vaiaata e tau atu i Patamea. Ina ua tulai mai le Afioga i le Tootoalii, le Palemia o Tofilau i lenei vaitaimi, o le faatoa maua lea o le avanoa e toe faamatuu mai ai eleele o Puapua ma ona mauga i lo matou nuu. E pei o le tulaga lenei e momoli atu ai le agaga faafetai i lau Afioga.

Ia, e le o se tau, atonu o lea e seei mai le Afioga i le Minisita mo Fesootaiga ma Faamatalaga Tekonolosi sa seei i le nofoa o le Minisita mo Galuega i lenei foi vaitau sa feiloai foi ma lou nuu, ia o nisi foi o galuega ma atinae ina ia mafai ona uia ia eleele o lou nuu nisi foi o mafuaaga – ma o lea na tatala atu ai foi e lenei nuu le lagolago a lou nuu, lau Afioga i le Minisita mo Fesootaiga ma Faamatalaga Tekonolosi, o la lava o lo o tele lava mauga maua i Puapua, e tasi lea fesoasoani malosi o lo o lelei atu ai le TV agai i le itu o Tane ona o pou malolosi maua i Puapua, e faigofie lava lo matou nuu. O le mea lea e momoli atu ai le faafetai i lau Afioga i le Minisita mo Galuega, Felauaiga ma Atinae Eseese, ona o lea ua maitau atu o lea ua maua le avanoa e fausiaina ai le auala o lou nuu. E momoli atu ai le faafetai i lau Afioga ma le Matagaluega.

Ona ou oo mai ai lea i le Minisita mo Punaoa Faalenatura ma le Siosiomaga, e momoli atu le faafetai, e pei lava foi ona ou oo atu i lau Afioga ona ua taofia le galuega a se tasi o ou nuu o lou itumalo i Asaga ona o le fale komiti sa fausia, peitai sa taofia e le Matagaluega, ia o nisi foi o tulaga lava tau tulafono ma taiala o le tatou Malo na mafua ai, e avea ai au ma sui o lou nuu e momoli atu ai le faafetai i lau Afioga ona ua maua le avanoa e toe faaauau ai lenei fale komiti e tua i ai tina ma tamaitai o lou nuu.

Lau Afioga masalo o lenei ua e silasila i se tasi o tulaga pagatia i le taligalu i i Puapua, o lea ua leai le malumalu o le Ekalesia Mamona ona na osofaia e le i mamao atu e galu malolosi, o le taimi nei masalo a e afio atu i Puapua, o lea ua tala ese uma le malumalu ae ua see atu agai i uta. Masalo a ou fua i ai i

le va o le auala ma le sami, masalo po o se mea o le 50mita i le 60mita e va ai le aualatele ma le matafaga ma le sami i le taimi lenei. O le mea lea e avatu ai le talosaga i lau Afioga, sa ou tatalo muamua atu foi i le tausaga na tea nei i le vaega tonu lava lea o lo o i ai le falesa Mamona, a lea ua tulai mai ai se faalavelave e le i mamao atu ma ua leai le falesa, a toe afio atu lau Afioga ma le Matagaluega, ua ese le mea la ua ave i ai le falesa o lea ua fausia nei i o agai i le vaotele, ma lou faaaloalo lava. E faapea foi ia talivai foi nei isi ou nuu i Asaga, o lo o i ai ia faafitauli foi na tulai mai ona ua oso mai le vai oso i le isi itu i le mea tonu lava lea ua fausia ai le fale komiti, e avatu atu ai le tatalo i lau Afioga, afai e talafeagai le faaso a le Matagaluega, se i toe silasila ane lava i le auala lea isi ou nuu.

Lau Afioga i le Minisita mo Aoga, Taaloga ma Aganuu, ou te talitonu ua nofo malamalama ia nisi foi o le tatou atunuu nisi foi o saunoaga a sui usufono mamalu ananafi ona o tulaga nei tau faleaoga, pei foi ona silafia e lau Afioga sa tuuina atu lava le talosaga a lou nuu o Asaga mai le tausaga 2011 e ala atu i le tatou Malo i le fesoasoani foi lenei a Saina, ae peitai, ona o tulaga lava e faapena e fesuisui ai lava tulaga o mea e tutupu i lea taimi ma lea taimi lea ua mafua ai ona le toe i ai se lagolago mai a le Malo tele o Saina i totonu o faleaoga a lo tatou atunuu i le taimi nei. Ae peitai, ia ua uma ona faalele isi ou itumalo, o taimi uma lava ou te lauga ai ma tau atu isi ou nuu o Asaga, o lea o le a fai le faleaoga. E ui o lea, leaga e faamoemoe lava le tatou Malo i nisi foi o fesoasoani mai fafo. O le mea lea le tatou nuu e i Asaga, a faapea o outou faafogafoga mai, ia aua tou te popole, e amata lava le tatou faleaoga ia Ianuari i le tausaga fou.

FOFOGA FETALAI: Malie le sui usufono mamalu, se i tuu atu le avanoa i le Afioga i le Minisita mo Aoga, Taaloga ma Aganuu.

Afioga Hon Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai, ona o lea ua taua mea ia o faleaoga fou ma faleaoga e fia lipea, o le toafa ai lea o sui usufono ua saunoa i ai, ia e le taumate foi e i ai nisi o sauni mai e saunoa mo mea o faleaoga. Na ona ou faamanatu atu o faiga faavae a le Malo ua leva lava ona i ai i mea o faleaoga, o le matafaioi lava lea a nuu ma afioaga aemaise o komiti, e i ai lava taimi e maua mai ai nai fesoasoani foi ia i faleaoga, ae o faleaoga fou lava ia ma le tausiga o faleaoga, o mea na e fitoitonu mo komiti o aoga. Pau lava le fesoasoani a le Matagaluega, ia o le fesoasoani atu e avatu se tusi e lagolago a outou talosaga o lea ua aumai e lo tatou Malo ia nisi o paaga mai fafo e ala mai ai ia talosaga. Ou te manatu o se aoga foi lea o tatou o sui usufono e tatou te o e faamaopopo ma tusi talosaga e fesoasoani i a tatou komiti, faafetai.

FOFOGA FETALAI: Malo. Tulai mai le sui usufono e faaauau le saunoaga.

Afioga PESETA VAIFOU TEVAGA: Faafetai lava i le faamalamalama o le mataupu lea i lau Afioga i le Minisita. E pei lava ona ou avatu, e leai e le o i ai se agaga e taufaaleaga ai i le Matagaluega ona o le tulaga ua tulai mai, ona o le lagolago ma le fesoasoani lava a nisi foi o atunuu ma malo tele mai fafo, na mafua ai lenei fesoasoani, peitai, ou te faafetai foi i le tatou Malo leaga o lea e faalogologo mai lou nuu, o lea ua uma ona ave i ai lau folafolaga

o le tausaga fou e amata ai le matou faleaoga, ae ui o lea lo tatou nuu, ia o lea ua aumai e le Malo le isi auala, e le afaina e leai se mea e popole ai lou nuu, a o le tatou galuega, ia e amata lava i le tausaga fou o le a taumafai lava lo outou sui usufono o le a lava se tulaga ma le lagolago a lo tatou Malo ia e faatino ai ia le faleaoga o alo ma fanau a lo tatou nuu.

E toe pau lava o lau talosaga i lau Afioga i le Minisita mo Galuega, Felauaiga ma Atinae Eseeese ua misi lava le mea taua lea, o le auala sima foi lea i Lano lau Afioga, ona o le faafitauli lava lea o alo ma fanau o lou itumalo o aoga. Ona silasila foi lau Afioga, a oo ina tafe e le mafai ona aoga ia alo ma fanau o lou itumalo, ona o le vai lenei o lea ua talia le...ua fofou lo tatou Malo o le a fau le auala laupapa tele i Maliolio, faafetai foi mo lea lagolago a lo tatou Malo. A o le faalavelave o le vai lea e i Lano, o le tasi lea maga o le Maliolio, a oo ina tafe le Maliolio e tafe foi i. A faapea o le a se tofa i lau Afioga, ia aumai lava sina faatagaga ou te iloa lava e i ai ni nai paipa ma nai mea ou te lagona e le tele lava sina tupe e toe fausia ai lea auala, e avatu foi le lagolago a lou nuu ma lou itumalo e tatou te galulue faatasi ina ia mafai ona maua se avanoa e fesoasoani ai i alo ma fanau, e le gata foi i lea, a o le mamalu foi o le atunuu e femalagaai i lea auala.

Ona ou oo mai ai lea i lau Afioga i le Minisita mo Faamasinoga ma Pulega Tau Faamasinoga i lau Afioga i le Sao Faapito. E momoli atu le faafetai a lou itumalo, ona ou te manatua i le tausaga na tea nei, na ou talosagaina ai lau Afioga ma le Matagaluega mo ni laau foi nei e faamaumauina faamasinoga, aemaise lava gafa ma tala o faamasinoga, ona e i ai le talitonuga, atonu o se tasi lea vaega e le o mausali ai faamaumauga a alii ma tamaitai Faamasino, e le o maua atoa e nai tamaitai faigaluega le faamaumauina o tala o faamasinoga. Peitai, e momoli atu le faafetai i lau Afioga ona masalo pe lua masina talu ona uma le Fono ae valaau le faamasinoga a si ou aiga. A o i na ou mautinoa ai, o lea ua i ai laau pueleo nei, ae pau lava le tatalo i lau Afioga, atonu e i ai nai nisi potu faamasino, ae atonu lava o le utiuti o lau faasoia ma le Matagaluega, ae ese le taua o lenei tulaga. E momoli atu ai le faafetai tele i lau Afioga i le Tamaitai Minisita.

Ona ou oo atu ai lea i lau Afioga i le Minisita o Tupe, ona o au o lea ou te lagolago i lau Afioga, e momoli atu ai le faafetai tele i le Tala o le Tupe e pei ona faataatia. E moni lava lau saunoaga, afai foi ua maualalo le fuainumera o le tupe i lenei tausaga, ona e mafua mai ua malupuipua ma manuia si o tatou atunuu. Aua pei lava e mafua le oso o fuainumera ma tupe i luga o le feagai ai o Samoa ma mala faanatura ma mea faapena. O lona uiga o i ina foi o le a tele mai ai nai fesoasoani mai fafo ma faapea ai ona maualuga le Tala o le Tupe. O lea e avatu ai le agaga fiafia ma le agaga faafetai o lou itumalo e lagolago ai le Tala o le Tupe.

E momoli atu ai le agaga faafetai i lau fetalaiiga Lavea, o oe o lo o faasinotonu i ai ma faaululu i ai le Matagaluega o Tupe ma nisi foi o faaululuga uma lava o le Matagaluega o Tupe i la outou galuega ma le tapenaina lelei o le Tala o le Tupe e pei ona faataatia i luga o le Laulau a Fono.

Ia, a o le i faaumaina se faamatalaga a lenei itumalo, ia, e molimoli atu le faamaisega a si ou itumalo i se tasi foi o se sa avea ma sui usufono o le itumalo po o le afioaga i Safotu, le Afioga Tuiloa ona e faigata foi ia te au ona afai o faafogafoga mai oe le faletua ma le tina ma le fanau, ia avea ai au ma sui o le tatou nuu i Puapua, leaga o oe o le Puapua, e avatu ai lau

faamafanafanaga e ala atu i le tatou Palemene i lenei aso, ioe. Afai lava o le a le tulaga ua i ai le tapenaina o le faalavelave ua ou le auai, ou te faamalulu atu ia te oe le tina, ona o lo o feagai foi au ma nisi o faalavelave ae tuu atu i le Atua ina ia maua se nofoaga mau o le Afioga i le faipule.

Lau Afioga i le Fofoga Fetalai, o se leo vaivai lea o lenei itumalo e momoli atu ai le faafetai, ia faamanuia le Atua i lau Afioga ma le Palemia ma le Kapeneta, faapea foi le mamalu o le Palemene i Ofisa Sili o Pulega o Matagaluega a le tatou Malo, aemaise o le tapuaiga a si o tatou atunuu ma si ou itumalo. Ia manuia le Fono.

FOFOGA FETALAI: Malo faafetai saunoa i le sui usufono mamalu mo Faasaleleaga Nu.4, malo tulei saunoa i lenei aso. O le a avatu muamua le avanoa i le sui usufono o lea Itu o le Maota, le sui usufono mo Anoamaa Sasae, ona sosoo ai lea ma lea Itu, o le a sooula ai le Itu lea i toaina matutua ia.

Tulai mai le sui usufono mo Anoamaa Sasae leaga o lea ua muamua e tulai mai ona avatu ai lea o le avanoa i le sui usufono mo Faasaleleaga Nu.3.

Tofa ALO FULIFULI TAVEUVEU (Anoamaa Sasae): Ou te muamua lava ona ou faatalofa atu i le paia o le Maota. Faafetai foi mo le avanoa ua tuuina mai e lau Afioga mo le sui usufono mo Anoamaa Sasae. O paia lava ma faigata o le Maota, ou te faatulou atu i le paia i le afio o lau Afioga i le Fofoga Fetalai, lau Afioga i le Palemia, aemaise foi o le afio o le paia ma le mamalu o le Kapeneta. Ou te faatulou atu foi i le afio mai o lau Afioga i le Taitai o le Itu Agai, aemaise foi o le afio o Sui Minisita o le Maota, aemaise foi o sui usufono mamalu o le Palemene.

Ou te faatalofa atu foi i le paia ma le mamalu i Ofisa Sili o Pulega o Matagaluega ua mafai ona tatou faatasi i lenei itula o le aso. Malo faafetai, e talitonu ua leai lava se isi o lenei Maota e le o silafia la outou galuega taua o lo o lagolago ai i le tatou Malo. Malo.

Ou te faatulou atu foi i le paia o le tapuaiga a Lana Afioga Mamalu O Le Ao o le Malo ma lau Masiofo, afio foi le Afioga i le Sui Ao ma lau Masiofo, afio le Faamasino Sili ma le vasega o Faamasinoga, aemaise foi o le tapuaiga mamalu a le tatou atunuu ia Tumua ma Pule, Ituau ma Alataua, Aiga i le Tai ma le Vaa o Fonoti, tulou. Ae le faagaloina lava le tapuaiga a si o tatou atunuu i le nofo a faafeagaiga failotu i totonu o le atunuu, ou te talitonu e le o mapu lo outou tuu atu i le Atua, a o alofaiva le tatou Palemene mo le sailiga o se manuia mo le tatou atunuu. Malo le faitatalo. Ae talitonu lava o manuia mai la outou galuega tapuai mo se manuia o le tatou atunuu.

E avefa foi lenei avanoa ou te faatalofa atu ai i lou itumalo pele o Anoamaa Sasae. O le a ou le tolaulauina outou paia ma lo outou mamalu, e talitonu, e leai ua taoto a o se alaoo. E talitonu foi e leai se lagona o le a taea i sou manatu faatauvaavaa outou sa ma outou faiga. Tulou, tulou, tulou lava.

Ou te fia tautala muamua ma ou faaleoina le agaga faafetai o lenei itumalo ona o le galuega tele sa feagai ai ma le Afioga i le Palemia ma le Kapeneta aemaise o Ofisa Sili o Pulega sa feagai ma le fuafuaina o le Tala o le Tupe ua i luma nei o le Palemene. Ou te talitonu e le faigofie lenei galuega, ae ua atagia mai, ua oo mai i se tulaga matagofie i le vaavaai atu ona ou te iloa ua tulaga manuia le savaliga a le tatou atunuu i lenei tausaga faaletupe.

Lau Afioga i le Fofoga Fetalai, e lagona le agaga faafetai pe a vaavaai atu i le tatou Tala o le Tupe i lenei tausaga, ona o le faatauaina o mea nei e pei o aoaoga. E talitonu le taofi, o le tasi lea alagamanuia o le tatou atunuu mo le lumanai. A le lelei le aoaoina o alo ma fanau a le tatou atunuu, atonu o le a le manuia foi le faamoemoe mo se manuia o le atunuu. Toetoe lava a le toetogia aoga a le fanau, tasi lea tulaga taua i totonu o le tatou Malo ma le fuafuaga mo le manuia o le atunuu. O le tuu atu o le malosiaga e faamalosia ai matua ina ia ave fanau i faleaoga, ae paga lea, o lo o vaai foi le faigata o lea tulaga, o lo o i ai lava le tele o matua e faatamala i lenei avanoa taua ua tuuina atu i le tatou Malo. E tele pea fanau o lo o vaai pea e le aoga i totonu o nuu ma alaafaga, ae talosaga atu i le tatou atunuu pei lava ona talanoa atu, o le agaga faafetai ma le fiafia ona o lea ua vaai atu, o le ioimata lea o le tatou Malo mo le lumanai. Ae a faaletonu le tausiga a matua i fanau, e talitonu lava le taofi, o le a le manuia foi le faamoemoe mo le lumanai o le tatou atunuu.

O le seleni lea ua faatulagaina mo aoaoga, e \$84miliona. E le laitiiti lenei seleni, aua e talitonu, o se tulaga lelei lea mo le faamoemoe o le tatou atunuu mo le lumanai. E le gata i lea, o le vaavaai atu i le tulaga faatuatua o le soifua maloloina ina ia maua le soifua maloloina i totonu o le tatou atunuu. E talitonu le taofi o se tasi lea vaai mamao a le tatou atunuu. Ua maitauina se tulaga faigata pe a le faatauaina le soifua maloloina o se atunuu, aemaise foi lava o le tatou atunuu i le tulaga o lo o i ai nei. Ua maitauina le tele o le seleni e faaalu e le tatou Malo pe a le tausia ma savavali i le tulaga o le soifua maloloina aua le lumanai o le tatou atunuu.

O le isi tulaga faatauaina ou te fia tautala i ai, o nisi o tulaga o lo o fesoasoani ai i nuu ma alaafaga aua talosaga a sui usufono, e pei lava ona silafia, toetiiti lava leai se sui usufono e leai se talosaga, toetiiti foi soo Samoa o fai lava le tulaga o le faaleleia o mea e talosaga atu ai sui usufono. E ui lava ina i ai nai isi alaafaga e i ai lou nuu e le i oo i ai sina fesoasoani a le tatou Malo, a o lenei lava e lototele le sui usufono. E talitonu pei lava ona saunoa i ai le Afioga i le Palemia, o lea lava e tele le taimi i le lumanai. Ae tatalo atu ma le faaaloalo, ia outou alofagia lau Afioga i le Minisita le talosaga a lenei itumalo.

Lau Afioga i le Fofoga Fetalai, o manaoga o si ou itumalo, e ao lava ona toe faamanatu atu. Mo le silafia e lau Afioga i le Minisita mo Galuega, Felauaiga ma Atinae Eeseese, toetiiti lava uma ona faataunuu le faamoemoe o le faaauauina o le toe faamalosia o le eletise i totonu o si o matou nuu i le alu agai i uta i le auala galue. E i ai le mea ua tupu, ua atoa nei le lima vaiaso ae ua le toe faaauauina lea galuega. Ua uma ona toso le uaea, a o lo o alu pea le laina i le transformer tuai. Ua i ai le transformer fou, ae le i oo i ai le uila, e le o i ai le malosia faaletise. E le i mautinoa lelei po o le a le mafuaaga ua le faaogaina ai le transformer, a ua uma ona faapipii le transformer, ua uma foi ona toso le laina, o la e alu lava le laina tuai ma pou fou ae le i faaogaina le transformer fou lea o lo o i ai nei. E le gata foi i lea, o moli o le auala, e pei lava ona logo mai foi ina ua avatu le talosaga e le Matagaluega, o lo o i ai moli e ono, ae oo mai i le taimi nei, e le i faapipiina lava ia moli. Ia ai ona o le tulaga lea, e le i faamaeaina le galuega e pei ona i ai lea faamoemoe. Ae toe talosaga atu i lau Afioga se i e tagai ifo po o i ai se mafuaaga ua mafua ai ona toe poloka lea galuega.

E le gata foi i lea mo lou silafia, o lenei ua taoto atu foi ma toe faamanatu atu le auala galue o lenei nuu o Falefa, e pei lava ona e silafia, e le i i ai lava se

nuu o lenei itumalo ua faia se auala galue ae ono nuu o le itumalo. E tatalo atu i lau Afioga, se i e tagai ifo i lenei lua tausaga e totoe o lenei Paeaiga, e tatalo atu ma le faaaloalo se i tagai ifo i auala galue o lenei itumalo. A o lena ua taoto atu le talosaga ma ua matou talia foi, ona o lea e alo nei le tatou atunuu mo le tatou taligamalo.

Ona oo atu lea i lau Afioga i le Minisita mo le Siosiomaga. E leai o lena lava ua e silafia le matou talosaga foi sa talatalanoa i ai ma avatu ai se talosaga i lau Afioga, o le vai i Lalomauga, o lena ua uma ona e silasila i ai, faatasi foi ma le ... o le vai lava lea o lo o fai ma faafitauli, aemaise le feagai ai ma le faleaoga fou lea o lo o i ai i lo matou nuu o Falevao. Ae talitonu ua uma foi ona i ai le fuafuaga a lau Afioga ma le mamalu o le Matagaluega ina ia foia ai lea tulaga.

E le gata i lea a o taligalu o si o matou nuu e pei lava ona avatu i le amataga o lenei Paeaiga, o lo matou nuu ua leva ona faaalu i leitio ma nusipepa taligalu o lenei nuu, ae tei lava ua faafuasei ona toe aveesea a ua uma ona lau maa. A ua matou le iloa po o le a le mafuaaga ua mafua ai ona le faataunuaina lea vaega. Sa talosaga atu foi ae oo mai nei lava e le i oo... O le taligalu mo lou silafia lau Afioga, o taligalu na faia muamua a ua matua leaga faia lava i le malosi o le galu, ona o taligalu ia na o le lafo lava i ai o le maa e oo mai lava i lenei taimi. Ae tatalo atu i lau Afioga, o le matou nuu faatasi ai ma nai nuu laiti o le matou itumalo o Sauano ma Saletete, ae o lo o manaomia lava. E pei lava ona silafia, o nei alaalfaga e tua i le papa ma le moana, e leai lava se alofaga pe a oo mai faafitauli pei ona silafia.

Lau Afioga i le Minisita, e tuu atu pea i lou finagalo ina ia fai i ai se fuafuaga i nei tausaga o lo o totoe po o lenei vaitau foi mo se talosaga pei ona tuu atu i lau Afioga.

I le paia ma le mamalu foi o lenei aso i le paia o le Maota, lau Afioga i le Fofoga Fetalai, e avea foi lenei avanoa e momoli atu ai le faafetai tele i lau Afioga i le Palemia ma le Kapeneta aemaise le mamalu tele o le Komiti sa fuafuaina le 52 tausaga o le tatou Malo. Faafetai i lo outou amanaia o lenei nuu o Falefa. O le upu moni, e pei lava ona aumai i le pese a lenei nuu, masalo po o le 70 tausaga faatoa toe o lava lea o le nuu lenei i se valaaulia. O le mea lea e lagona ai le faafetai. Na pau lava le mea sa tau toia ai, ona ua i ai foi ni faitioga i le pese a le nuu lenei ma taua pei o se pese lotu. Sa ou faapea o le tatou atunuu o se atunuu lotu, e alu lua lava mea uma, o faafiafiaga ma mea faaleagaga. O le ala foi lea na taua ma ai lea vaega, ae talitonu le taofi, e le o lena. O le talitonuga ua i ai le agaga fiafia ua oo i le tatou Komiti aemaise foi i latou sa fuafuaina le tatou aso, ona o le matagofie o lenei aso aemaise foi fuafuaga sa feagai ai ma lenei nuu ma le valaaulia. Faamalo faafetai mo le faaaloalo ma lo outou manatu atu i lenei nuu o Falefa. O le upu moni, e tele le alolofa na alofa atu, ua laitiiti le fesoasoani ma le alofa atu o le tatou Malo a ua tele le foai atu o tagata ona o le fiafia ma le matagofie o le pese a lenei nuu na feagai ai ma le tatou aso faatulagaina.

Na pau lea lau Afioga i le Fofoga Fetalai, tau ina ia alofagia e le Atua ia faamanuia tele le faamoemoe o le tatou atunuu i lenei tausaga fou faaletupe, ia manuia foi le faamoemoe o Afioga nei. Soifua.

FOFOGA FETALAI: Malo faafetai saunoa i lau Afioga i le sui usufono mo Anoamaa Sasae mo le sao taua foi o le tatou itumalo o Anoamaa Sasae.

Tulai mai le sui usufono mo Faasaleleaga Nu.3, o lea ua avanoa le Maota mo lau saunoaga.

Tofa TUILEUTU ALAVAA VOI (Faasaleleaga Nu.3): Ua uma ona fili le tupetua ma le manoa ua avage le fau i le fau, sosoo le fau ma le afa, o lea ua tofo i tino matagi lelei, ua uma foi ona sua le tuli pei o le mavaega nai Pulotu ina ua faga le u i le vateatea, ua faafofoga le Atua i le taulaga ma le viiga ua tapena ma saunia, aua le usugafono a Samoa i lenei lava aso. Ua ave ave taunuu i le nuu o Ape e pei o lenei taeao ma le aso ua sola seia oo mai i lenei foi aso. O Tiafau o le malae o Malo, o le faautugatagi a Samoa, o le taunuuga lea aua Samoa ma ona upufai.

I lenei la taeao lau Afioga i le Fofoga Fetalai, le paia o le Maota nei, e muamua lava ona ou tapui le tapu a Tupolesava ma ou faatulou atu i le paia mauuluga o le Maota o le Malaefono a Samoa, i le afio o lau Afioga i le Fofoga Fetalai, e faapea foi le Afioga i le Palemia, le mamalu o le Kapeneta ma Sui Minisita, faapea foi le paia o lenei Itu o lea e afio foi le Afioga i le Taitai o lenei Itu, a o le mamalu tele o sui usufono o le Malaefono aua sui usufono tofia o alii ma faipule o Samoa i lenei taeao na lua.

E muamua foi ona ou faapai malu ma faatalofa atu i le tapuaiga a Samoa i ona malaefono ma ona tupua tausii, i ona tuaoi mai Manua e oo i Falealupo, e le toe gaganaina i se upu aua e tumau e le suia, aua le afio o Lana Afioga Mamalu O Le Ao o le Malo ma le Masiofo, e faapea foi le Afioga i le Sui o le Fono a Sui Tofia ma le Masiofo, Faamasino Sili faapea foi le Aiga Faamasinoga.

Le paia aua Aiga ma Tama, o Tama ma Aiga, Aiga e fia, Aiga o Nofo, Aiga o Papa, Aiga na Tafaifa, o Aiga o le Foe, o Faleupolu Tofia, o Faleupolu o Papa aua le la usoga a Tumua ma Pule, Aiga i le Tai ma le Vaa o Fonoti.

O lenei taeao, e muamua foi ona ou faatulou atu ma ou faatalofa atu i lou itumalo tapuai i le paia o oe le Taulagi ia Vaafusuaga ma Toleafoa ma le Nofo a Ituaiga aua le ta itumalo i le faletolu, Saipipi, Saasaai ma Faga. Le paia o le Taulagi na potopoto, e Taulagi i mea uma, e Taulagi ou maota, e Taulagi ou malaefono, e Taulagi ou talaga, e Taulagi mea uma, ou te mitamita ai ia Samoa. I le afio o lenei itu le afio o Tofa ma le Aiga Sa Tofa, tulou Talitaliaai, afio foi le Maopu o le Taulagi i lau Susuga Sua i Ogevasa o lo o e afio ma susu ai, ae faapea foi le afio o maota e fia ma tupua e fia e afio ai Usoalii ma Alo o Vaafusuaga faapea foi oe le Falefitu e te tausii aua Salemuliaga, e vaatele ia Tofa, o Sua lenei.

E faapea foi Faleloa o le malae ma le tupua o tua o Fuifatu e afio ai lau Afioga Vaafusuaga, faapea foi le suafa o Tea, Aiga ma Usoalii, le falelua ma e na paea le aufono, Segi o oe le Matua Fetalai, lau pule Leuu e tumau. O Salemuliaga lenei.

I le tatou nuu i Faga i le nofo a Ituaiga i le Falelima, afio Alii o le Toaono i lo outou fagaoneone aulelei matagofie, afio o Toala faapea foi Unasa, afio Ufagalilo faapea foi Nonumalo, afio Lefinealii e faapea foi le afio o Sooaemalagii. O lo outou Toaono, o mata na o le tao e tumau. Le nofo a Ituaiga aua oe le Salemuliaga, le igoa o le Faleaana e faigata lo outou Toafa, o Pini ma Vaisau, Laufiso ma Tapuala, o oulua tagata o le aava, o tama Tuileutu ma Taua. Le paeaiga o le tatou nuu, Fanuatanu, Malaefiliga, Feagai e faapea foi le Vaiolealii ma Siufaga. Mai i ina e tau i Ogevasa, o paia na e le toe suia.

O le upu masani na fetalai i ai lo tatou Alii, “E le sili le auauna i le Matai, e le sili foi le na auina i le ana le feau.” O lo outou nofoa lea, o lo outou pale lea e susui. Faafetai. O le la ua avea ai au ma outou sui i lenei vaitau na outou filifilia ma tofia aua taualumaga ma faigamea aua le Malo ma ona upufai. O lenei foi taeao e le tele lava se tala po o se upu e uiga i le lauliuina o le Tala Faatatau Faaopopo po o le Tala Faatatau o le Tupe mo lenei tausaga 2014/2015, aua o i tatou uma taualoa e mau tofi o tagata tetele tagata iloga latou te faia pea le tala na fetalai ai lo tatou Matai, ‘o i tatou tagata maualuluga latou te faia lelei uma ma faamaoni ia latou galuega, ae le o i latou uma e faatuatua. O lenei la aso e avatu ai le agaga faafetai ma le faamalo aua o le aso ma le filiga, o le tai ma lona ta, o lea ua manutaupae fetalaiga o le taeao pei o upu i lea itu, ina ua taulau ma ua taunuu mai i le Fonotaga a Samoa pei ona i ai lenei taeao ma le faamoemoe ua atofa i lenei masina. O le agaga o lou sui usufono e momoli atu le agaga faafetai tele, e le tauilo le maelega ma lo outou fita aua o le mea moni lau Afioga i le Tama o le atunuu lau Afioga i le Palemia faapea foi le aiga Kapeneta, a outou Afioga e faapea foi la outou fitaituga ma le mafatia ma le...aua upufai a le atunuu ma le teuga o le vaiaoa aua Samoa ma le manuia, o lea ua mataitu ua tatou talafulu i le ala pei ona moe ai le tamaitai ma le tama. Faafetai tele, faafetai tele i le tapenaga ma mea uma, e le o i ai i se faamatalaga i le Tala Faaopopo o le Tupe, e momoli atu le faafetai, faafetai. E leai foi se tasi e taumafai na te faia se mea le lelei, se i vagana le le faamaoni, ona le atoa lea o le mea faamaoni. Faafetai atu, e manatu foi o le agaga lea ma le faamoemoe lea o i tatou uma. Le paia e o le Malo ma lena itu lau Afioga i le Tama, leai, o le atunuu, ia faamalo fai o le faiva. O lea foi agaga e pei ona matou soso atu ma tau atiae tulaga o le tatou o aitalafu, o le upu moni lava, o aitalafu o le fasi pepa, loan is not a problem, o le faaso. O le mea moni lava lena, a tatou tilotilo foi i trillions la e fai e Amerika ia Saina, o le mea tatau. Samoa e le i atoa se kuata miliona, tatou aitalafu, e le o se faafitauli le aitalafu, o le faafitauli o le faasoasoa i so o se atunuu ma so o se Malo ma tagata uma. E momoli atu le agaga faafetai, faamalo ua i le laulau ma ua taoto foi i paga folasaga ma matou vaai ma silasila i ai, tatou fai o lea, o le matou agaga lea, o le matou taofi i lenei taeao, ia, e a i le ano nisi ae o le puna nisi. Muamua ona ou faafetai atu i taualumaga ma aiaiga faavae ma tulaga tausi i lea tausaga ma lea tausaga, pei ona ua aumai foi i lenei tausaga aua le Tala Faatatau o le Tupe ma le faaso, faafetai tele i lau Afioga i le Minisita mo Galuega, Felauaiga ma Atinae Esee, o lena ua taoto mai ma ua vaai foi i le faaso utiuti, a o le faaso tatau ma le faaso...lea ua...faafetai atu e tusa foi ma o matou foi auala galue, pei o lena na folasia foi i se taimi ua mavae i lenei tausaga, ia e le tauilo, o le alofa e iloa i galuega, a o galuega foi e momoli e matagi. Faafetai atu, manatua Pule ae galo Faalaeo i la outou faasoasoa ae faapea foi i le tele o atinae o lo o taumafai, ae le uma ai aua e oso pea le la, e le uma ai aua e timu pea, o le aso e lelei ai ma le aso e leaga ai, e talosaga pea i taimi uma. Lou itumalo, ua ou vaai atu o lena o lo o laualuga se tasi o tatou auala i le faaso o lenei tausaga 2014/2015, e momoli le agaga faafetai i lau Afioga i le Minisita. Pau o lea e le uma ai le matou soso atu ma le agaga faaaloalo, ia e moomia pea, e toe tolu lava mea tutua la e totoe toe o Sapini, Luua ma Malaefiliga, o nai auala e teuteu o auala foi o auala malosia sa fausia e le Ekalesia Mamona i aso ia i le 1950 auala tanu la na ona teu lava, o lo o i ai e alu atu i Faga e tau i Tapueleele ma Vaiola, e faapea foi le la itu e faapea

foi i Luua ma Sapini faatasi ai ma nai moli auala o lo o ua tele lava ina pepe le tele o moli, e momoli atu ai le agaga faafetai. E ui o lea, ia e le oo atu so matou...o lena o lo o i ina le Tagaloatusi i lau Afioga faapea foi le Matagaluega, faafetai faamalo.

O nisi mea e tau vaai i ai pei ona...i lea aso ma lea aso, o tatou aualatetele, e manaia fausaga o auala e manaia foi, pau o lea e manaia o le isi ta la e molemole ae manaia foi le isi ae faale-manaia le isi ta lea pei e sau le maamaa tau i le tioata o le isi taavale. E ui o lea o le faasoava, e faafetai atu. Ae pau lava o lea ona ua oo mai le matutua e tele foi nisi o tatou o le au middle ages o tatou lea ua tai 40 agai i le...e le lelei le vaai i le auala, e lelei lava le laina lea e i totonu le laina paepae, a oo ina...e oo foi na saunoa foi le isi sui usufono, o moli o taavale o le isi lava e tiga lava ona fai atu ia ae faapupula mai lava moli o taavale, aemaise lava le mea lava lea e tausisia ia te au ia ma lou lagona, o le laina paepae foi, guide line na e alu sao, o le toeaina e vaai lelei lava aemaise o aso timu ma aso pogisa e tausisi lava, e faapea foi i hump na o isi hump ua le...te i lava ua puna le taavale i luga, pei o nai fatufatuga manatu e avatu pea, faafetai i mea uma.

Ona oo mai lea...ia ua alagatai foi pei ona saunoa se tasi o sui usufono i le taimi ua sola e uiga i le siitia lea o le tatou Matagaluega o le EPC i uta i Vaiaata, ia e saolele lava. O le aafiaga o le suavai, e manatua foi o lau lava tilotilo ma lau sailiga pei o le itumalo o Faasaleleaga, Itu o Tane ma Palauli pei e tafola e tele i le vai, o le vai foi lea o lo o tele ina soifua ma manuia ai itumalo lenei, ona e taoto i gataifale e taoto lelei e level ma le sami, e lelei le vai, na o le pau lava lena o le mea ua lelei o lea i lau lava...o le mea lea e fai pe a tusa ai, le tatou Solar lea paoa, ae manumanu i le siosiomaga ae le tetele foi le laufanua agai i uta e faapea e i le uta ma le avagato o lo o galulue ai ma faapena, aemaise lava o le pueina o le suavai ae toe faaleaga e nisi o fuafuaga ma atinae lelei, o atinae lelei, ae avea foi le naunau i atinae lelei e aafia ai le siosiomaga ma nisi o le soifua manuia o tagata.

Ona oo mai lea i nisi o...e le tele ni...se i vagana ia o lo o manuia foi ma ai lava o lo o sologa lelei le tele foi nisi o Matagaluega, leai e le faitio foi lenei itumalo, pau lava lea o le agaga e lafo atu aua e leai se faiva e asa ma le maumau. Ae o se mataupu lea ou te avatu pea i luma o lau Afioga i le Tama o le Atunuu lau Afioga i le Palemia lau Afioga i le Minisita o Tupe, e ui lava sa i ai le agaga o lea o lo o afio foi le Afioga i le Minisita a o le mea e fitoitonu i le afioaga lenei o Faga ma le toatuga o lo o aliali mai ai, ou te faafetai atu ma faamalo atu, e ui lava ina ua soloa ma ua mavae atu se tasi foi o tamalii sa nofo i le nofoa aua le Minisita o Tupe, a o lea ua feauga ma palega tutusa ma se lagona e ui ina faaeteete le taofi e momoli atu i totonu o le Maota, a o se oa o le ta i aiga ma le nuu lenei ona o le faleaoga, e momoli atu le agaga faafetai o lea ua to mai le pule, ua o se vaega po o se portion o le fanua ua fai mo le nuu. A o se isi vaega ia ua tuu atu i le Matagaluega, e moni le tulaga e pei ona aliai mai i se tasi foi o tamalii ma le feeseeseaiga tulai mai i le afioaga ma le nuu ma le malae lea i Taitaialofa, e le oo i ai sou taofi e i ai se taimi ona tolaulau lea, a o le agaga o aoga o le fatu lea o atunuu, o le lima taumatau lea o le atamai ma le malamalama ma le iloa e maua i atunuu manuia, o le ala lea ua matou valu ai aa o le laau, e avea ai lou sui usufono faatauvaa e talosaga atu ai ona o le toatuga ma le faafitauli pei ona silafia na savalia ai foi lau Afioga i se taimi, o lenei la ua ou faaleo atu ma le agaga maualalo, ia e toe talosagaina lau Afioga i le Tama o le atunuu le o lo o feagai ma le

Matagaluega ona o le faleaoga, e le talafeagai le afa lea e tasi ma le afa eka le tele i Taitaialofa, o le fanua o le nuu mai anamua, ia ua faatonufalea ma o le la ua matou.....

FOFOGA FETALAI: Malie le sui usufono o lo o saunoa, leaga o lea ua e taua le saunoaga a le Afioga i le Palemia, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ua tau le mataupu o lea foi ou te malamalama, pei e manaia le tatou feiloai foi i se taimi o i luma, e lelei lena e uma le feiloaiga ma fai ai a tatou tonu, ae aua ne i iloa fua e i latou o lo o nonofo i ou autafa ia la outou mataupu, o la outou mataupu e faigofie, ae o le mea sili ona taua o la ua faafogafoga mai le itumalo, o lea lava ua tau le ai, ae sema se taimi o i luma ona tatou feiloai lea. O le fautuaga lea i lau Afioga e faigofie ai ona fai faaiuga nai lo i le faatulai mai i le aso, ou te savali atu loa i fafo o le faitotoa lea, ona galo foi lea, ae lelei lava ona e manatua foi e selau ma le afe isi mataupu o lo o faatali mai, e faigofie lava ona toe see malie atu ai lau mataupu ona tulaga mulimuli foi lea, ae lelei lena e sema se taimi i lea vaiaso, ia ona tatou feiloai lea.

FOFOGA FETALAI: Malo. Ia tulai maia le sui usufono mamalu, e manatu o lea ua tau ai o taulafoga o lea ua saunoa atu le Afioga i le Palemia ua talia la outou talosaga.

Tofa TUILEUTU ALAVAA VOI: Faafetai. Ia ua lagona lava le agaga fiafia faafeai tele foi o le a le masalomia se tulaga pei ona e saunoa, a o lea lava ua avatu i lumamea, ia o le agaga faamalo ma avatu le agaga faafetai tele i lau Afioga i le Tama o le atunuu lau Afioga i le Palemia ona o le lē talitua lima e tusa ma le finagalo ma se faatalauula vaivai a le afioaga ma le nuu nei, e i ai se taeao o muamua.

O le agaga lea e pei ona matou soso atu. Lau Afioga i le Fofoga Fetalai faapea foi le mamalu o le Fono, e le toe i ai se isi mataupu. O le agaga lava ia o le sui usufono e avatu lava ma le agaga mauualalo. O a foi mea ua faailoa atu, o le agaga lea tatou te auaufau uma i le agaga e tasi, tatou te fia sailimalo i itumalo, nuu ma afioaga aemaise o le tatou atunuu i atinae eseese. Ae le uma ai le talosaga e pei foi o lenei itumalo, e talosaga atu ma le agaga o a foi mea ua paopapa foi i se faafogaga ma ua le tautamalii, ia e leai o aga lava o Fono. O lenei la taeao o matou toe upu, ia alofa mai le Atua aua taualumaga o le Fono a le atunuu.

Lau Afioga i le Fofoga Fetalai faapea foi le mamalu o le Fono, e momoli atu le agaga faafetai tele, ae le uma ai foi le faafetai tele i Ofisa Sili o Pulega ma Matagaluega, faafetai tele i lo outou lagolago, o outou lava o aao o le Malo.

E momoli foi le faafetai tele i le tapuaiga a si ou itumalo, aemaise lava ua pau ia te au ona faailoa lau Susuga i le Toeaina Faatonu Kaleve Leifi faapea foi le nofo a faafeagaiga mai Saipipi seia oo lava i Faga, o outou lava o lo o faanonomanu ma faafalepaulia aua se tauamo o se manuia o Samoa ma si o tatou itumalo. E momoli atu le agaga faafetai i la outou tapuaiga ua manuia ai faiva. O lenei la taeao o ni a matou upu, tau ia ni ao lealea ma ni tuataafalu, ni laumeatoli ma ni laumeatoenuti, ia mama le lagi i lena itu o le malae, ia alofagia le Afioga i le Palemia faapea foi le mamalu o le Aiga Kapeneta, o

outou mama na, o outou faiva na aua se manuia o le tatou atunuu. Ia faapea foi lenei Itu i le Taitai o le Itu Agai ma le mamalu tele o sui usufono o Samoa, ia alofagia lau Afioga i le Fofoga Fetalai. Tau ina ia alofa le Atua ia tumau le la ma utupupu pea le agaga ma le tofamamao ma le tofa alualumamao ma le faautaga loloto aua le Malaefono o Samoa ma si o tatou atunuu. Ia alofagia le tapuaiga, aua ne i gasolo ao pe taape papa pe to le timu, tafea le tauofe i tupu ma ee, aemaise o faleupolu, ia maua la outou lauga aua le tatou atunuu faatauvaa, o se atunuu tauatia. Ia tumau Samoa i le fealofani. Manuia le aso.

FOFOGA FETALAI: Malo faafetai saunoa i le Afioga i le sui usufono mamalu mo Faasaleleaga Nu.3. Ou te talitonu o lea ua faafofoga ma le manino le tatou Maota i lenei vaega o le aso.

Ia tulai mai Auimatagi, o lea ua maua le avanoa o le tatou itumalo o Sagaga le Usoga, ona sosoo ai lea ma Falelatai ma Samatau. Tulai mai le sui usufono mamalu mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Ia, e momoli atu le faafetai i lau Afioga i le Fofoga Fetalai mo lou avanoa. E muamua foi ona faatalofa aloaia atu i le Maota nei i le afio o lau Afioga i le Fofoga Fetalai, afio lau Afioga i le Palemia ma le Kapeneta, afio lau Afioga i le Taitai o le Itu Agai, afifio Minisita Lagolago ma sui usufono mamalu uma o le Palemene. Afifo foi Ofisa Sili o Pulega o Matagaluega eseese o lo o tatou faatasi i lenei taimi o le aso.

E faatalofa atu foi i le tapuaiga mamalu a Lana Afioga Mamalu O Le Ao o le Malo ma Lana Masiofo, faapea foi le Sui Ao i le Tuiaana, le Afioga i le Tuimalealiifano ma le Masiofo, le aufaigaluega paia a le Atua i so o se fatafaitaulaga e fia o lo o faanonomanu aua se manuia mo Samoa, le afioga i le Faamasino Sili ma le Vasega o Faamasinoga. O le mamalu lava lea ia Tumua ma Pule, Ituaa ma Alataua, Aiga i le Tai ma le Vaa o Fonoti. E le alu loa foi se upu e tau ina ou oo atu i lou itumalo o Sagaga le Usoga, e amata mai ia Saena ma le Aiga Sa Saena, afifio o Tuitea ma alo o Fuatino, le mamalu ia Tupalesa ma le mamalu i le Afu o le Alataua. Afifio le paia o le Aiga Sa Gauifaleai, le Vagana i Tulafale, lo oulua Toalua Fata ma Maulolo ma le mamalu ia te Oe Tuisamau. Afifio Maualaivao ma le Aiga Sa Maualaivao, afio Faamausili o le Matua, afio Seiuli, Taito ma le Foealii, pou e fitu o le Fale o Malietoa ma upu ia te oe Auimatagi.

Ua maua foi lenei avanoa lau Afioga i le Fofoga Fetalai e momoli atu ai se faamaisega i le tuua o le Malo e le Afioga i le faipule ia Tuiloa, le tina faanoanoa ma le nofo a alo ma aiga, Patele ma Patele ma Patele ma Taupousa e fia o le aiga o le afioga i le faipule. O se uo mamae ia i tatou uma i totonu o lenei Maota, o le a misia le toaina faafiafialoto i le tele o taimi e sausaunoa ai foi. Ia, tau ina agalelei le Atua ma faaii ma le manuia uma fuafuaga o toe sauniga o le tama ia Tuiloa.

Lau Afioga i le Fofoga Fetalai, e lagolagoina e lenei sui usufono le Tala o le Tupe ua opea i le Maota nei. E momoli atu ai foi le faafetai i le Afioga i le Palemia, o le Minisita foi lea o Tupe ma le aufaigaluega e tusa ai ma le galuega e talitonu e le faigofie sa feagai ma i latou. E lagolagoina tele foi le faafetai atu i le Komiti o Tupe Maua ma Tupe Totogi sa feagai ma le

tapenaina o le Lipoti o le Tala o le Tupe, ma ua faitau foi ma le totoa i ai, o lo o tele lava ma anoanoai fautuaga lelei o lo o tuu mai i totonu o lenei Lipoti. Ma e lagona foi le fiafia o lou sui usufono, ona o lo o ave le faamuamua a le Malo i vaega taua ia e lua o le soifua maloloina ma aoga. O lo o maitauina lava e ui lava ina utiuti le faasoa, a o lo o talafeagai le Tala o le Tupe, a o lo o ave lana faamuamua i mea taua nei. Ma o lo o aumai ai foi i vaega eseese ia pei o le soifua maloloina fautuaga a le Komiti. Ia, masalo o lena ua tofu uma tatou ma le Lipoti, e le oo tele i ai se matou faamatalaga i fautuaga. Na pau lava o le mea o le faafetai i le Komiti i le mataalia ma le tilotilo totoa i tulaga ia ma aumai i totonu o le Maota fautuaga lelei, aua foi mea lelei ma faafitauli o tulai mai i lea taimi ma lea taimi e tusa ai o auunaga foi, e leai lava se isi e i ai se atoaga pe i ai foi se sao. Na pau lava lea o le mea, a i ai ni faaletonu tatou te toe tilotilo i ai ma toe faalelei ma faasaosao ma toe auli lelei aua le sologa lelei o galuega.

Ou te fia talanoa foi lau Afioga i le vaega lea o tagata tafafao maimoa mai fafo. Masalo o le Afioga i le Palemia lea e feagai ma le vaega lea, ona e taua ona ua mautinoa o i lea e talitonu lou sui usufono o se atinae e ono manuia ai Samoa ma tele ai se manuia, aua ua o faalogologo ma le totoa i nisi foi o sui usufono i le laititi o le atunuu lea o Cook Island, a o lea e milionea lava i tagata tafafao maimoa mai. Ou te manatu foi, a lelei ona tapue ma faatino le tatou galuega i tagata tafafao maimoa mai fafo, e leai foi se mea o le a le mafai ai e tatou ma tele ni a tatou tupe maua mai i lenei atinae.

Lau Afioga i le Palemia, manaia tala ia e maua e te naunau e fai se tatou matafaga iinei i le taulaga. E pei o atunuu uma lava tatou te asiasi i ai e pei o Hawaii, o Cook Island, New Caledonia ma Tahiti, o atunuu uma lava ia e malolosi i tagata tafafao maimoa mai, e foliga mai e i ai a latou matafaga i le taulaga. E pei a manaia lava Apia, e pei lava foi lele a ta oso lava i le pasi tietie mai i Apia, leai se mea e faia, e pei ua manaia lota aso. Na o le tietie mai lava eva solo i le taulaga, masau solo, toe oso i le pasi toe alu, ua malie lava lota loto na pau lena o le mea ta te faia, ae matua malie lava lota loto. E pei o le mea fiafia lena i isi tagata, na o le omai lava i Apia talatalanoa ma ai le aisakulimi toe o i le nuu, ia o la e foi e faaturisi solo lava ma faapisi ai Apia. Ou te talitonu la, a manaia le tatou taulaga, e moni lava e fia o tagata tafafao maimoa mai i tua, ae fai foi si mamao. E augatata foi tagata e o e tietie taavale, ua fai foi si mamao.

Lau Afioga i le Minisita mo Tagata Tafafao Maimoa Mai Fafo, o le manaia ia o le sau lea agai mai i le Tanoa agai mai Mulinuu pe a i ai se town planning faapea e faaagaaga le auala lenei e sau ia tatou i Mulinuu na o hotel lava faamolemole, e pei o le mea la e tupu i Hawaii, e te savali savali uma lou fia savali ae le uma hotels. A o le mea lea e i ai nei, e sau sau lava hotel uma, tau mai i le fale kesi, tau mai i fanuaoti, tau mai i le mea e alu ai le otaota faalautele, tulou, tau mai i le HRPP. Ia o na mea uma lava a faa-hotel, ma gatai i Mulinuu, e tea mai le Fale Faamasino, a faa-hotel uma lava iinei, ailoga, oka, e matautia. A o le talosaga, faamolemole e fai semeamanu o lea tatou te feola. A umi foi ona ola, o isi tagata ua le manatua ni mea ua leaga faiai ua maua i le alzheimers. E leai foi se taua o lena mea, e fai ifo nei fuafuaga e talosaga atu ai, ia...

FOFOGA FETALAI: Ia, malie le sui usufono se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malilegaoui: Lau Afioga i le Fofoga Fetalai, o le faamoemoe lea e i ai, e le i faia na ona e tietie mai i le pasi ma e matamata ma e toe alu i tua. Alu oe i tua i le tou matafaga. A o le matafaga lea, e fai o e lava e fia auau ai, ona o lea e auau ai, e sefe ai le faaalu o le tupe i le mea o le vai lea e totogi. Ona e auau ai lava lea, auau e alu i le fale, moe lelei ma lou tino ua oneonea ma ua pisisamia foi, e fesoasoani e tape ai le mau mai lea e mamai ai tagata, le mea o le mai o le pau. Ae tasi lena mea, masalo e le i taele ai le sui usufono i aso la, e o atu ai fomai e fai o latou taotoga. O mea muamua lava ia, tasi lena mea ua le toe faia i aso nei. E uma loa ona faamama tatou o tama tane ona o loa lea e taele i le sami. Ona pau lava le mea e popole ai ia aua le soso tele i tai i maua oe e se avaava. O le fesoasoani atu lena, a o le mea lava lea o le oneone e fai mo taelega ina ia fesoasoani e faamama ai le tau o le soifuaga lea e popole i ai Palu, ae e fai foi i le tatou taimi. O lea ua uma ona i ai le time plan e faatino ai le faamoemoe.

O nei i le aoauli o le a silasila i ai le Kapeneta i le mataupu lea. O lona uiga la, aua e te popole a oo i le taimi lena ae gasegase ai le sui usufono i le gasegase lea na ia taua, ae ua tapena uma mea e fesoasoani ai ia te oe. O le faamalamalamaga lena o a tatou fuafuaga mamao.

Afioga Hon Palusalua Faapo II: Lau Afioga i le Fofoga Fetalai o se mea e fia malamalama ona na taua lou igoa.

FOFOGA FETALAI: O le a le mea na taua ai lou igoa? E le o le matafaga lea na taua ai lou igoa a o le tau o le soifuaga.

Afioga Hon Palusalua Faapo II: O mea uma lava na lau Afioga. Silasila, e manaia tele le faamoemoe lenei e fai lelei se tatou matafaga ma se tulaga faapena, ae pau lava le mea ua ou fesiligia ai le fuafuaga alualu mamao a le Palemia, o le falei'a lea o le a fai i Matautu. O lona uiga e tutuli uma turisi i le manogi o le tatou taulaga. O le mea la lea e fautuaina ai lau Afioga i le Palemia e ave le falei'a i Savaii pe ave i tua i Aleipata, a o le matafaga ia saogalemu lelei ma mama aua turisi.

Susuga Hon Tuilaepa Fatialofa Lupesoliai Aiono Neioti Sailele Malilegaoui: Lau Afioga i le Fofoga Fetalai...

FOFOGA FETALAI: O lea ua maua le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malilegaoui: Sa avatu na o le afa muamua o le faamatalaga o le falei'a, ae e le i avatua le afa lona lua.

O le vaega muamua la e leai se manogi, a o le vaega lua e ave la i uta e vaai se mea i uta e lata i le lapisi e faatu ai. O i ina la e faagaoioi ai le vaega lea e sau ai le manogi. E leai se mea e te popole ai, e lua vaega o le falei'a lea. O le vaega e i ai le manogi ma lalaoa ma le vaega lena e i ai le manogi e pei ni fagu sausau e le uma ai lou fia latalata i ai i le falei'a.

Lau Afioga i le Fofoga Fetalai, o le faamalamalamaga atoa lena.

FOFOGA FETALAI: Tulai mai le sui usufono mamalu mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM: Faafetai i lau Afioga i le Fofoga Fetalai. E talitonu ona o lea foi ou te tilotilo i le taimi, o le a vavae foe ona ou toe foi mai ai lea i le mataupu lea i turisi.

Ona ua galo ona avatu muamua manaoga o lou itumalo, ae ne i t e i ua pisa, pisa foi le Taitai o le Itu Agai ma le Palemia uma lou taimi ae e le i momoli atua manaoga o lou itumalo. E sili la le momoli muamua atu ona fai ai lea o finauga a le vaega lea. Ina ne i mulimuli ane e faapea mai ua toe lua ou minute, ae leai se mea ua avatu ona ua galo.

A o faafogafoga mai lou itumalo e amata mai i Tuanai, lau Afioga i le Minisita mo Galuega, Felauaiga ma Atinae Eseeese faafetai tele mo le matou auala i Malie ua fiu timuga e talepe ua le toe ila le auala. Ou te le iloa pe ni uamea le ta la na fai ai, o le matua manaia lava o le matou auala. A o Tuanai, lau Afioga sa ou lauga ai foi muamua i le mea lea, ae manaia lava le faamanatu ma faamanatu atu, ae pule lava lau Afioga aua e le o se faitio, ae avatu lava i ina e fai i ai lau filifiliga faa-Kerisiano. Ona pau lava le mea la e mananao i ai Tuanai ia tau le auala galue i uta i Aleisa. Ia au foi ma toso le moli a le EPC, ia e tele foi nisi tupe e maua mai i le power pe a oo i uta i Aleisa le auala i le ui atu i Tuanai.

Ua vaايا ma le faanoanoa le auala i Tuanai, ua tele ina tau le mafai ona o ai taavale, ua matua manaomia lava le toe faaleleia lau Afioga i le Minisita. Sa ou tietie atu foi i Afega ma ou tilotilo i le auala i uta e tau i Aleisa ua matua leaga lava, e manaomia le toe tapue ma toe faata le auala lea i se tulaga faafaigofie ona feoai taavale,. O le taimi lenei e sili ai lou oso i lalo e tamoe i le alu a le taavale i le auala lea i Afega. Ma le faaaloalo lava e fia faaleleia le auala lea lau Afioga, faapena foi ma le tolotolo i Afega, ua tele ina tumu i omoomo se i tulou, e fia faaleleia lea lau Afioga.

Ia ona ou oo mai lea i le matou nuu i Malie, se i vaai i ai e faigofie lava mea e mananao ai lenei itumalo, na o le toe faiga lava o nai auala e feoai ai. O le auala i Vailoa, ua tumu i le aufaifaatoaga lau Afioga. E fia faaleleia ma fai le auala galue lea i Vailoa e faapea foi le matou auala i Lalau. A o le matou auala na faatino e lau Afioga ma le mamalu o le Matagaluega, e pei sa tatalaina i le tausaga ua tuanai atu, faamalo faafetai ua matagofie lea vaega.

Ia, ona toe oo mai ai lea lau Afioga i le Pulega o Tagata Tafafao Maimoa Mai Fafo, lau Afioga i le Palemia. A e silasila i ai i le Tanoa ma le Hotel a Elisa, tasi lea hotel manaia ma le Amanaki, o lo o manuia latou i le tatou paka lea e i luma o le latou fale. E pei o le agaga lena sa tau molimoli atu, faapaka uma mai lava tai i mea na e tau mai i Mulinuu, ona sosoo ai lea ma se matafaga foi lele e volipolo ai ma taalo ai, ona sosoo ai lea ma le mea lea o le seawall e savalivali ai tagata ma o atu ai i lalo o se fasitepu e taelele ai i le sami la lea e taua e faapepe ai ni faamai ma ni mageso ma ni tulaga faapena. Ae manaia lava le faataatiaga lea ua faataatia mai i luma o le tatou paka lea ua fai nei pei se public park, ina ia faasoo ai luma, aua e sau sau lava le paka gata, ona ogasima loa lea o le mea e savalivali ai tagata ma le aualatele.

Ia pei o nai fautuaga e manaia ai le tatou taulaga ma faaosofia ai le fia tafafao mai o tagata tafafao maimoa mai, aua o le a avatu nei ata, aua o le mea moni lea e i ai, a leai lava nai matafaga la e i tua, e leai – na pau lava le

mea lea e latalata mai o Aggie Grey la e i le malae vaalele. Ae a misi loa ma i ina, e tuli lava Lalomanu ma tua i isi vaega ia i tua i Saanapu ma tulaga faapena i mea e tafafao ai nai o tatou tagata.

FOFOGA FETALAI: Ua ou vaelupeina le saunoaga a le sui usufono mamalu ona o lea ua tatou taunuu i le tatou taimi malolo. O le a faaauau lau saunoaga pe a tatou talii mai le tatou malologa masani o le 1:00. E faafetai atu i le paia ma le mamalu o le tatou Maota i lenei vaega o le aso, e talitonu o lea ua tatou taunuu mai i le tatou malologa i le afa o le tatou galuega. Malo le onosai. E talitonu foi o lea ua tapena e le tatou Ofisa se faamalositino e ala i le tatou lunch. O lea foi ua tapena atu le taumafataga mo lau Afioga i le Palemia ma le Kapeneta pe a faapea e i ai sa outou fonotaga mo lenei aoauli. Ae talo faaaloalo atu ia tatou faatasi i le tatou Fonotaga i le itula e 3:00 e faaauau ai le tatou galuega pei ona faatulagaina. E i ai le talitonuga o le a maua se faiga malologa aemaise o se taligasua ona tatou toe potopoto mai lea i nei i le itula e 3:00 pe a taitai i ai lo outou soifua manuia i le alofa ma le agalelei o le Tapaau Sili i le lagi.

Ou te faasilasila atu o le a tolopo Taulumaga a le Fono Aoa mo lana malologa masani ma tatou toe talii mai i le itula e 3:00 i le aoauli nei.

Na faataatia ese Taulumaga a le Fono Aoa i le itula e 1:00 i le aoauli.

Na toe faaauau Taulumaga i le itula e 3:00 i le aoauli.

**TULAFONO TAU FAAOFI O LE FAATATAUINA O TUPE
FAAOPOPO (NU. 2) 2013/3014 MA LE TULAFONO TAU FAAOFI O
LE FAATATAUINA O TUPE 2014/2015 – felafolafoaiga i luga o le
faitauga faalua**

Na toe faaauau felafolafoaiga.

FOFOGA FETALAI: Ou te faasilasila atu ua toe amataina nei aualumaga a le Fono Aoa Faitulafono.

Ia e i ai le agaga ma le talitonuga ua tatou toe potopoto i lenei itula o le aso, ua maua lo outou faasiliga malosi aua le tatou malologa puupuu sa tatou feagai ai, ua maea foi ona tali le sua i le taumafataga o le aoauli, ma e talitonu ua lava atoatoa lo outou malosi i le paia maualuga o le tatou Maota e tauave ai le tatou galuega, seia aulia le itula e 7:00 i le afiafi nei lava.

E faia le tatou malologa o lo o saunoa le Afioga i le sui usufono mo Sagaga le Usoga, tulai maia le sui usufono mamalu e manatu ua atoatagi lau saunoaga i le taeao analeila, ae faaiu maia le saunoaga o lea ua lamalama faaiu lou taimi. Tulai mai le sui usufono mamalu.

**Afioga MUAGUTUTAGATA FAAMAUSILI AUIMATAGI PETER
AH HIM:** Faafetai i le Afioga i le Fofoga Fetalai, e toe faatalofa atu foi i lenei itula o le aso i le paia ma le mamalu o le Maota Fono o Samoa, atonu ua maua se faasiliga malosi i sui usufono mamalu.

Lau Afioga i le Fofoga Fetalai pei e uma le taimi analeila o tau faauma atu sa matou tala i le tulaga o tagata asiasi maimoa mai fafo, e pei o le agaga lena lau Afioga. Lau Afioga i le Palemia ma le Pulega o Tagata Asiasi Maimoa Mai Fafo, ia o le faanaunautaiga lava ina ia manaia ae ave foi le tatou faamamafa i le atinaeina o mataaga ia po o tulaga foi i mea tau faletalimalo i le tatou taulaga, ona o le taimi nei, pei o lo o ave lava le faamuamua i matafaga i nuu i tua ma tulaga uma faapena, ae tatou tilotilo i le tulaga lea e i ai Fiti tai pei o i ina i Nandi i Tanerau, ia e leai se beach o i ai i le mananaia o faleoloa ma faleaiga na e i ai, ia ae tumu loaloa ma tata ma musika i le po, e tumu loaloa ia lena foi nofoaga i Fiti i tagata asiasi maimoa mai fafo, e toaitiiti lava nai vaega e mananao e uma lava le lua vaiaso o nofonono i le matafaga i tua, e toatele lava ē e fia tataa mai i Apia mai, e talitonu o lena ua i ai fuafuaga a lo tatou Malo e lagolagoina foi e lenei sui usufono le tulaga faataatitia a lau Afioga ma le Matagaluega, e momoli atu ai le faamalo ma le faafetai.

Ona ou oo mai lea i le Matagaluega o le Soifua Maloloina, faafetai i lau Afioga i le Minisita ua matagofie le tatou falemai, ua maua foi se avanoa e oo atu ai e vaai le fomai ma fai le siaki masani o le tui o le toto ma vaai po o maua i le totomauuluga ma tulaga uma faapena, ia e maitauina le matagofie o le falemai, e maitauina foi le lelei o le auunaga, e vave ona maua ia faaiuga o blood test ma tulaga uma faapena. O lo o i ai foi fautuaga i totonu o le Lipoti a le Komiti o Tupe, ia silasila ane i ai lau Afioga i lena tulaga, a o tulaga uma lava, ia faafetai i le Malo o lena e lua ituaiga mea na e lavea ifo ai le soifua maloloina, o le auunaga, soifua maloloina ia toe alu ifo ai i lalo ma le isi...ma le auunaga, ia e le o ni tamai tupe ia le \$81miliona ia ma le isi e \$73miliona o lo o faamatuu atu e le Malo e fesoasoani i le tatou galuega faa-soifua maloloina.

E faapea foi le Afioga i le Minisita mo Aoga, Taaloga ma Aganuu, o lea foi ua faamatuu atu e le Malo se tupe tele aua foi fuafuaga a lau Afioga ma le Matagaluega, faafetai i le Malo o lena e ave lava le faamuamua i aoga aemaise foi le tulaga o mea tau soifua maloloina. Sa ou faalogologo totoa lau Afioga i le Fofoga Fetalai i saunoaga foi ma saunoaga a le Afioga i le Minisita mo Faatoaga ma Faigafaiva, ia faafetai i le Afioga i le Minisita mo Faatoaga o lea sa maua ina ua fesiligia e se tasi o sui mai le Vaimauga o lo o taumafai lava ana alu atu i le Ofisa e matamata i finauga la e fai ma talanoaga, a o le agaga foi lena o lenei sui usufono, se i silasila ane i ai e sao, ae ia faafaigofie mo nai o tatou tagata ia nei fesoasoani e maua mai, ae faafetai o lena e maua atu, ia e faapea mai le Minisita, ana se i alu atu i le ofisa se i e matamata i matou finauga ma le World Bank lea e ona tupe, o lau fautuaga le Minisita mo Faatoaga ma Faigafaiva, o tatou nei i Samoa, a fiu loa e finau o loa ma lima e vave lava ona tali mai i ia le aualii na e faafaigata ona faigofie mai pe a fia...aua o palagi foi na e omai e fiu e talanoa atu ai ae finau mai lava e fai le mea e mananao ai ma faigata mo tatou tagata, fai ma tui i ai sina au mea malosi e vave ai ona....

FOFOGA FETALAI: Ia malie le sui usufono, se i tali atu le Minisita i le faatinoga o lana finau.

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai faamalo faafetai i le saunoaga a le sui usufono,

e pau lava le mea e fia faailoa atu i le sui usufono, o au nei o se tagata e aupito leaga lima, ia ae a oo i se taimi foi lele e manaomia ai lima lelei, ona ou sau lea e aami atu oe aua o oe lena e i ai lou black belt, a o au e lelei le mafauau ae leaga lima, ia.

FOFOGA FETALAI: Tulai mai le sui usufono e faaauau le saunoaga.

Afioga MUAGUTUTAGATA FAAMAUSILI AUIMATAGI PETER AH HIM: Malo faafetai, e sao foi ua fai foi sina matua o lou soifua. Ae ua ala ona ou oo i le vaega lea i le ofisa o faatoaga, ona o le tele o taimi ou te lauga ai, o lenei itumalo o Sagaga le Usoga, o lo o tumu le maketi i le aufaifaatoaga, ia e tagi lava i le malosi o le tagata ia e fai ai le faatoaga ae e le i i ai lava se isi o faapea o oi mai i le tigaina po o se mea faapena, ae pau le mea la e maua le tala fiafia, o la e tumu ai le maketi i le aufaifaatoaga mai Malie, Afeaga ma Tuanai. Na o se talosaga e faaopopo atu i sui usufono, ia ave ave ai pea, finau pea, atonu lava o le a faigofie i se taimi o i luma ona tatala mai le avanoa mai na foi tagata faigata ona tuuina mai se auala faafaigofie fesoasoani e aumai, e leai lava ma se eseese ma le mea na ou lauga i le vaega foi lea o le Ofisa o Niu Sila le Immigration, ia e ese foi le aumai o le tatou Quota, ia ae alu lava le tagata ia e sue lana galuega. O le tatalo foi lena i le Ofisa o Niu Sila, a aumai le Quota, fesoasoani mai e sue ni galuega, ou te alofa i nai o tatou tagata i Niu Sila, e le iloa po o fea le mea o le a o ai i Niu Sila e aoi i ai e sue mai ni pepa faigaluega ma ni mea faapena, pei ona fai atu foi i se taimi ua sola, ua faalogologo atu i le leitio ua faitio le isi loomatua, ua \$600 le tupe ua alu a o lea lava e le i alu lava lana tama i Niu Sila. O le mea lea, afai foi o faalogologo mai le Ofisa o Niu Sila, alofa e faafaigofie, fai po o a ni auala e maua ai ni pepa faigaluega a nai o tatou tagata, o lea ua momoli atu le faafetai faafaigofie i le aumai o le Quota, ia manaia fuafuaga, ae faafaigofie mai e aumai ma ni pepa faigaluega ia pe fesoasoani mai i se auala e faafaigofie ai ona maua ni nai pepa faigaluega, ua le lavava nai tagata i Niu Sila i nai aunty ma nai uncle ia ma nai tagata e o e fia lelei solo i o i fale faigaluega i le sueina mai o nei mea o pepa faigaluega.

Ona oo mai lea lau Afioga i le...faafetai ua faalogologo atu i le Minisita mo Fesootaiga ma Faamatalaga Tekonolosi i sana tali foi i le aso ananafi e tusa ai foi ma se tuualalo mai a sui usufono, i le tulaga lea i le taugata tele o le tafaiilagi le internet, ae faafetai o lea ua faalogologo atu i le tali mai ananafi, o le a taumafai e fai se tatou cable ina ia faaalu ai i lalo le tau o le internet, e lagona lava le aufaipisinisi le matua taugata tele o ia mea, e manaia pe a...faafetai o lea ua faalogologo atu, o le a maua foi se fesoasoani i lea tulaga.

Ma ua vaaia ma le agaga fiafia le Minisita o le Faalapotopotoga o Faalavelave Tutupu Faafuasei, o matou la e taulalata atu i le maketi fou, ia ua vaaia ma le agaga fiafia toe lava o se aga ona uma loa lea, ua vaai ua toso le uaea toe lava ina faapepa ia ato loa ma le apa, ia tatala i lalo ma le pa ae faaoga le tatou maketi, ia faafetai o la ua vaaia ata o Taulelei toetiiti lava a maea le tatou maketi lea e masani ai lea e i ina i Fugalei ia ona uma foi lea o le vevesi o le au faatau talo i le aualatele.

FOFOGA FETALAI: Toe lima minute o le sui usufono.

Afioga MUAGUTUTAGATA FAAMAUSILI AUIMATAGI PETER AH HIM: Faafetai i lau Afioga i le Fofoga Fetalai, pau na ou te talitonu o isi uma Matagaluega uma o lo o i ai le tatou Lipoti lea i a outou Afioga o lena lava e manino ma mautinoa ia fautuaga a le Komiti e ona le Lipoti o le Tupe, e leai se matou tala tele i isi Matagaluega, ae o se matou sao lena Sagaga le Usoga e tusa ai foi ma le Tala Faatatau o le Tupe. Manuia tele lau Afioga i le Fofoga Fetalai ma le paia o lenei Maota.

FOFOGA FETALAI: Malo faafetai saunua i le sui usufono mamalu mo Sagaga le Usoga, e talitonu ua taua lou sao i le tatou Tala o le Tupe i lenei vaega o le afiafi.

Ia o le a tatou see atu i le Afioga i le sui usufono mo Falelatai ma Samatau, tulai mai lau Afioga i le sui usufono.

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai, malo le usufono i le paia o le Maota, e faafetai atu e faatalofa atu foi i le Afioga i le Fofoga Fetalai ma le paia o le Palemene, le Afioga i le Palemia, Kapeneta aemaise foi o le tatou vaega i le itu a le Malo, lau Afioga i le Taitai o le Itu Agai, aemaise foi o lena vaega o le tatou galuega i faauluuluga o Matagaluega. Ia e faafeiloai atu foi i le tapuaiga a Samoa, i Lana Afioga Mamalu, O Le Ao o le Malo lau Afioga i le Tui Atua ma lau Masiofo, e faatalofa atu foi i le Sui o le Fono a Sui Tofia lau Afioga Tuimalealiifano aemaise foi o le Masiofo, lau Afioga i le Faamasino Sili ma le vasega o le Faamasinoga, ia malo le galulue malo foi le soifua. Le paia o Samoa mai tupu ma ee, ia o Aiga ma Tama, o Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatalofa i Auauna a le Atua o lo o faafalelemalu i so o se tulimanu o Samoa i lo outou fai tatalo ma talosia ni manu ina ia manuia le tatou Faigamalo.

E faatalofa atu foi i si ou itumalo i le paia o Aiga Tauaana ma la outou Tama, le Falefitu o Leatitagaloa, afifio o a outou Afioga i Faaaloaloga, Anae, Lupematasila, Nanai, Afioga i le Laau na Fausia Misa, ae a le tapuaiga i le Toatolu, lau Afioga Faalavaau, lau Afioga Lealaitagomoa ma lau Afioga Taefu, o le paia o le Falefitu o Leatitagaloa. Ia e faafeiloai atu foi i lau Afioga Faasavalu o lo outou Matua Aiga aemaise lou Aiga, i le Tausoalii ma Tama a Tausala, alaalatai Galuefa ma Tula o Salogo, Falelatai ma Tagata o le Vavau.

E faafeiloai atu foi i le tatou nuu i Samatau, i le afio o le Falefa o Usoalii ma le Gafa, Fiame ma le Tamaitai, ae a le Saofaiga ia te oe Leulumoega. Talofa, talofa lava. E faatalofa i lau Afioga Patele o le Tama o le tatou Matagaluega, malo le galue, malo tauatai. Ua maua tala o le a tuua e lau afioga le tatou Matagaluega, ia o manuia na, ia alu se toa ae toe sau se isi toa, galue aua le galuega a le Atua.

E faatalofa atu foi i lau Susuga i le Toeaina Faatonu, o le Taitaifono o le Ekalesia EFKS i Samoa ma le lalolagi atoa, le paia i le aufaigaluega tofofi a le Atua i so o se fatafaitaulaga, malo le galulue, malo i lo outou soifua laulelei, aemaise o lo outou nofo tatalo aua le tatou itumalo. O le faatomatau atu lea i le paia o le tatou aso.

Lau Afioga i le Fofoga Fetalai, e faigata ona laa le lauga a o faamalumalu mai le ao pogisa i le Maota. O lea e momoli atu ai le agaga faaaloalo i le

faamaisega ma le agaga faamafanafana i le aiga faanoanoa aemaise foi o lenei Maota. Ua faia se tasi o pou o le tatou fale, ia tatou tatalo i le Atua ia maua se nofoaga mau o lana Afioga i le sui usufono mamalu i le nuu lea o lo o tatou taufai sinio uma i ai. Ia, e tatalo foi i le atua ia maua le soifua laulelei i pou e 48 o totoe o le tatou fale, le Maota o le Faautugatagi a Samoa. Afai foi e toe faia se isi pou, ia o le tatalo i le Atua, aua le sau faapea le faasologa ae ootoo solo, pe amata mai o po o le la pito.

Ia, o le talanoa lea i lenei itula o le aso, malo lava i lau Afioga i le Fofoga Fetalai, faafetai foi ua faaaaogagase le Maota aua le tatou Tala o le Tupe. Ia o le a amata sina tala i le vaega lea o le faamanatuina o le tatou Tutoatasi aua o lea foi e i ai nai vaegatupe e faamatuu atu e faatino ai lenei faamoemoe. Lau Afioga i le Fofoga Fetalai, o au sa fai lau molimau tusitusia ma tuuina atu i le Taitaifono o le Komiti o le Tutoatasi i le la tausaga, ae ua ou manatu la, ua avanoa ai foi ma au e fai sau tala i le Vaega lea, aua ua uma ona fai lau galuega muamua, ae le o faatauaina tele pe a.

Lau Afioga i le Fofoga Fetalai, o le faigalotu o le Aso Sa, sa faatinoina e le Mafutaga a Ekalesia, malo faafetai, mamalu ma maualuga, ua silamio ai le atunuu i le manaia o le mamalu Faa-Akiepikopo o lenei Ekalesia. O le mea lea e momoli atu ai le faafetai. O le valaaulia na alu atu, e alu atu i le tatou Malo i lau Afioga i le Palemia ma le Malo. E i ai le manatu e pei lava ona ou taua i lau tusitusiga na tuuina atu, a maea le sauniga, o se isi o a outou Afioga e tulai ane e faafetaia le aufaigaluega sa galulue i lena aso ma fai se faafetai i le atunuu ma le auvalaaulia sa outou valaau e omai. Aso Gafua na sisi ai le fua, na misi ato se tatalo. O lau lava lea tatalo i le tatou Malo, se aua tatou te faatuatuanai, na o sina lima lava minute. Ae a pe a fai sina tatalo puupuu na o sina lima lava minute.

FOFOGA FETALAI: Ia, malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, faafetai lava foi i fautuaga. Ua leva ona ou tali atu i le mataupu lea, e ui lava ina alu atu i le Malo ae o lo o faafoe e le Fono a Ekalesia. Ma a oo lava i mataupu tau lotu, tuu pea i le Aupaia latou te faatinoa a latou sauniga. E ui lava o lea e alu atu i le Malo le valaau ona o le Tutoatasi e alu i le tulaga lautele. A o le tulaga lava ia i le lotu, o le mataupu lena a le aufaigaluega. E leai la se mea o le a tatou laa ai fua i le matafaioi a le aufaigaluega, tuu pea e faatino le latou matafaioi. O lea lava ou te iloa o lea e saunoa mai le sui usufono i le agaga lava foi lele e fia iloa, lea e ala ai ona tele mea e tau fufulu ma mea felauai. Tuu pea lava le tulaga ia i sauniga paia e faatino e latou. O le tulaga foi lea ua agai i ai le Fono a Ekalesia, o le faigalotu lea e fai i le po, o lea lava ua talosia uma ai ia sauniga, e amatamea le sauniga i le po lea, ae toe faamaea foi e latou. O le ala la lea e faatino ai le tatalo faaiu, e fai i le malae. O le iuga lena ua uma ona fai ma le Fono a Ekalesia. O le ala la lena e le toe faalavelave a i ai le Malo i la latou matafaioi.

O le tulaga foi i le faapea na o le lima minute, e le faapena le agaga o faifeau, o lea ua tele mea tatou te vaavaai i ai, leaga e fia iloa foi latou. A o le tulaga lea e i ai, o lea la ua aliali mai, na o oe lava lea e te faitio ma Palu, na o le toalua lava lea e faitio. A o tagata uma lava, o lea ua latou ioeina le

polokalame lea ua alu ai nei. O lea foi la na aumai ai nei lau fautuaga, ua manatu le Komiti, o lea lava ua lelei le mea lea e i ai nei, aua le felaaiai fua le laa atu i i i o, fai pea le galuega a le aufailotu latou, aua tatou te toe faalavelave i ai.

Lau Afioga i le Fofoga Fetalai, o le tali atu lena i le saunoaga a le sui usufono ae faafetai foi o le mea lea e sau ai, o le mea tuai, o lea ua tatou alu i le mea fou lea e i ai nei, e tasi lava le lotu e fai i le po e talosia uma ai lava faafiafiaga o le tatou Tutoatasi, e amata ai ae toe faaii foi e latou.

Lau Afioga i le Fofoga Fetalai, o le tali puupuu atu lena.

FOFOGA FETALAI: Malo faafetai saunoa.

Afioga Hon Palusalue Faapo II: Lau Afioga i le Fofoga Fetalai, ona o lea ua taua au, ae ua aoga foi sia mea se i fai atu ai se faamatalaga.

FOFOGA FETALAI: Ua e malamalama i le mea lea na saunoa ai le Palemia?

Afioga Hon Palusalue Faapo II: E matua malamalama ae matua sese lava.

FOFOGA FETALAI: Faapea ai o lena e te i valevale mai, a o lena....

Afioga Hon Palusalue Faapo II: O le Atua e faavae i ai Samoa. Afai o se fautuaga a le Fono Tuufaatasi a Ekalesia, o le matua sese lava, e tataua lava ona fai se lotu i le taeao. Lau Afioga i le Palemia, sa ou faapea e te fautua i ai pe a faapea o latou lea e... leaga o lea ou te maitauina e faatopelau lava a tatou mea. O lona uiga, e sau mai lau Afioga le fautuaga.

FOFOGA FETALAI: O lea ua maua atu Palu.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te matua teena lea taofi, ou te matua teena lea taofi, tuu ai pea i le mea ua i ai, o la e ua lelei, seia oo foi ina e Palemia oe ona e sau lea e alu e faalavelave i ai i mea faapea, ae soia tatou te faalavelave i le mea ua tasi i ai le Fono a Ekalesia. Lau Afioga o le tulaga lena. A o le mea lea ua tupu ia tatou, ua tele ina tatou fia faifeau, a o lea e matua maioio lelei lava la tatou galuega. Tuu pea mea a Kaisara ia Kaisara. O le ala lena o lea e... e oo foi i talaaga o Ekalesia ma le mea na vevesi ai, o le alai atu fua o e e pulea Malo i le galuega a Taitai o Ekalesia po o le galuega a le aufailotu, alai mai foi ma le aufailotu ia i galuega faa-Kaisara. A o le manino ia o Afioga a le Alii. Palu, o Afioga ia a le Alii, "Ave pea mea a le Atua i le Atua, tuu pea mea a Kaisara ia Kaisara.

Lau Afioga i le Fofoga Fetalai, o le faapuupuu atu lena.

FOFOGA FETALAI: Ou te manatu ua manino ma malamalama Palu.

Afioga Hon Palusalue Faapo II: Lau Afioga i le Fofoga Fetalai, ua tau soo mai lou igoa.

FOFOGA FETALAI: Ia, e le o ni ai e aveva....

Afioga Hon Palusalue Faapo II: O le upu moni lau Afioga i le Fofoga Fetalai, leaga e tuualalo maia le aufaigaluega e le gata ia au, a o lenei Vaega, ioe.

FOFOGA FETALAI: Ia, ina ne i maueseese le Maota e ese e o fautua i le Palemia ese e o fautua ia te oe.

Afioga Hon Palusalue Faapo II: O lea e fai atu lau Afioga ma le faaaloalo, o le Palemia lava lea ua taofia lotu nei.

FOFOGA FETALAI: Alaala i lalo o lea ou te fai atu. O le a see ese lau saunoaga ma le mea o lea e... e le o feagai oe ma le aufaitonu o lea e faia lotu o le Sisigafua o lea e feagai le Malo ma le... O la e foi e faafogafoga mai Ekalesia Soofaatasi ne i meaane ua tatou tuuaia ae le iloa o le latou finagalo. E ui o lea, sa tatou maitua uma, na o le Atua na te silafia lea mea o le tatou faanoanoa ia te ia i taimi uma. Na tatou vaai foi i le tatou polokalame, ua short and sweet. E uma ane le mea ua e afio lau Afioga i le fale e te malolo lelei ma e afio mai e tali lau sua i le lunch. Na ese foi lau tala na fai mai i le ta nonofoga a o lea foi ua ese lau saunoaga. E ui i lea, Taefu, o lea ua malamalama le mataupu pei ona e saunoa, tulai mai ma see ese o lea ua matagofie lau saunoaga.

Afioga TAEFU LEMI: Faafetai i lau Afioga i le Fofoga Fetalai. E tasi lava le aso na tatou Fono faaumiumi ai, aulia loa le aso fou e taofia loa le Fono ae fai sina tatalo puupuu. O le aso fou e faatauaina. O i matou ia e usu mai tua e ta le 2:00 usu mai loa e momoli mai le au savavali ma o mai e faamanatu le Fua, e leai se taimi i tua e fai ai le lotu, e mananao e lolotu mai i i. Ma le fautuaga mulimuli i le Komiti o le Sisigafua, a maea uma mea uma, manatua foi sa malotia le tatou atunuu i lea aso, le Palemia o Niu Sila, e le o le Hai Komesina o Niu Sila, saunoa lau Afioga i le Taitaifono. O le mea lava lea ou te leleiga ai le Afioga i le Taitaifono, a saunoa e i ai lana fasipepa e limataitaiina ai sana saunoaga e fai e fesoasoani ia te ia. Ae sa lagona lava i lena aso le le atoatoa o le manatu ona o le faatinoga na faatino ai le tatou saunoaga mulimuli lava on behalf o le Komiti o le Tapenaga. O lau tuualalo i lau Afioga i le Taitaifono o le Komiti, se saunoa oe, saunoa lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai o lea lava e tonu mea o lo o faatino. E pei lava ona ou fai atu, e le o se mea... o le Taitaifono lea na saunoa, o le Sui Taitaifono, o le isi foi Taitaifono. O lona uiga e te faatauagavale i le lauga a Leulumoega? O lea na saunoa ... o le Taitaifono, e lua Taitaifono, o lea la e lelei, o le matua lauga lava o lauga, ae ou te le iloa po o le a le mea lena sa faaletonu. Ae sili ia ona tuu mai le galuega o lea lava e iloa e le Komiti ia le mea e tataua ona fai, ae faafetai mo le fautuaga.

FOFOGA FETALAI: Malo. Tulai mai

Afioga TAEFU LEMI: Ona ou see atu lea i le Minisita mo Galuega, Felauaiga ma Atinae Eeseese lau Afioga i le Fofoga Fetalai. E momoli le

faafetai tele e tusa o le taligalu matagofie ua faamaea ai le galuega sa taatia ma i le tausaga ua tuanai i lo matou pitonuu lea o Sualo i Samatau. E momoli ai le faafetai i lau Afioga i le Minisita mo Galuega, Felauaiga ma Atinae Eseese. I le faatinoga ai o lea galuega, ua uma ai galuega tuua mai le la Paeaiga ua uma atu, aua o galuega lava nei sa faatino i le la Paeaiga ma taatia mai ai le mea lea e le i uma, sa talosaga foi ma mafua ai ona faaauau le galuega. O le mea lea e momoli atu ai le faafetai i lau Afioga i le Minisita mo Galuega, Felauaiga ma Atinae Eseese.

O tatou auala galue ma tulaga faapena, e tumau pea le talosaga. Ia lo tatou itumalo, o lea lava e taumafai a tatou auala galue, e tasi le auala galue i Falelatai, o Falelatai e le o se tamai nuu, ae tau atu le auala e tasi ae fai mai e faafetai, ae lelei ona ou faapea atu o Falelatai, e 12 auala galue i le nuu atoa o Falelatai e 12, e tasi ua fai, e faapasene ane faamolemole, ona e manatunatu lea i lau oe lava itumalo ia ma le aofai o auala ua fai. E faapena le pitonuu i lo matou nuu o Samatau e 4 auala galue, e 1 ua fai, ia faapasene ane e 25% o auala galue o Samatau ua fai, ia.....

FOFOGA FETALAI: Ia malie le sui usufono mo Falelatai ma Samatau, se i tuu atu le avanoa leaga o lea ua taua le Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, ona o lea e ia te au le lisi o galuega sa faatino, ae ou te manatu o le galuega tuua lea e pei ona saunoa i ai le sui usufono mamalu, ia o le auala i Samatau lea e aumai i le 2009/2010, a o isi galuega ia na faatino nei, ia e le mafai ona tuua ae ua 2014 o le a uma lenei Paeaiga, o lona uiga o galuega o la e faatino, o taligalu la e faatino i ina i Sualo ma Samatau, ia faapea foi o Falelatai, o galuega uma na sa taumafai i ai. Ona ua ou tulai atu e i ai foi isi sui usufono o itumalo ia e saunoa mai e le i oo lava i ai se galuega o lea ia te au, pei o le sui usufono mo Anoamaa Sasae, ia o la ua faatino le auala sa ou le tali atu i ai ae leaga o la e faafofoga mai, e le taugofie foi le galuega o lo o faatino e le Malo, ae se i alolofa o lena o lo o i ai galuega ua faatino, e le aoga foi le tulai soo atu e tete e a outou saunoaga, ae o le Maota lenei e tautino ai mea ua uma ona faatino ma galuega ua fitaituga i ai le tatou Pulega o Felauaiga i Luga o Aualatetele. Ia ma le faaaloalo.

FOFOGA FETALAI: Malo. Tulai mai le sui usufono e faaauau le saunoaga.

Afioga TAEFU LEMI: Faafetai i lau Afioga i le Minisita, e i ai lava le agaga leai aua e te tulai soo mai ae se i faauma atu pea ni nai manatu, e i ai lava taimi o lau Afioga ae pei o nai motugaafa lava lau Afioga e le o avatua i se tulaga a mea o faitio po o se tulaga faapena. E manatua foi o lo o i ai le auala o le matou nuu lea i Pata Falelatai, na amata mai le tatou Paeaiga o lona tolu i le lisi foi nei faataitai a tatou sa i ai. O le a le mea ua i ai i le taimi lenei? Ua lona 33. Ia o le tulaga lena o lea e i ai le tatou auala lena.

Lau Afioga i le Fofoga Fetalai, e i ai lava nai atunuu ia pei e faamatuu seleni ua faamatuu mo atinae tetele e vaevae lava i zone foi nei po o itumalo, ia e manaia foi faiga sa taua foi e nisi i a latou saunoaga o se faiga faapena, aua pau lava lena o le faiga e transparent e fair, e tofu uma lava itumalo ma sina fasi seleni mai lea tausaga faaletupe mai lea tausaga faaletupe, a lava loa, ia

faatino loa le faamoemoe o lena itumalo, a o le mea lea e i ai i le taimi lenei, e pule lava ia le faasoa lima lelei o lo o i ai i lo tatou Malo ma le Minisita o lo o nafa ma ia vaega. Ia o le tatalo e faatauanau, a o outou aao o lo o i ai le atoaga.

Lau Afioga i le Fofoga Fetalai, o le auala galue lea faamolemole lau Afioga le auala lea e alu i le kolisi o Aana Nu. 2, e faapena foi le auala lea e alu i le fale o le Toefuataiga i Oloamanu, e le taitai ona lavea na auala i mea tau auala galue, o auala o lo o faaaogaina e le Malo e agai i ai i le mea o lo o i ai lana auunaga. O le auala i Oloamanu, o le Ofisa o Faatoaga, Esetete, Leoleo, Ofisa o le Vai, o Matagaluega ia po o Faalapotopotoga a le Malo e agai e faaoga lea, lau Afioga i le Minisita, oka se faaletonu o lo o i ai le auala, se i alofa ane lau Afioga, e le tatau ona tau falo lau faasoa i auala nei ou te taua ia ma auala masani lava o auala galue, ae o auala nei o auunaga a lo tatou Malo le auala lea i Aana Nu. 2 le kolisi, faamolemole se i alofa ane i ai lau Afioga ua tuu mai le talosaga i lau Afioga ina ia oo i ai le faasoa, pe a tusa ai ma seleni ua tuuina atu i ou aao.

Lau Afioga i le Fofoga Fetalai ona ou oo mai ai lea i le Afioga i le Minisita mo Aoga, Taaloga ma Aganuu, e fia fai se tala i le tatou school grant, o le tatalo faapuupuu lau Afioga i le Minisita, e tau talatala lemu ane nai noataga o le faamatuina o seleni o i le school grant, lea ua oo i le vaega o aoga maualuluga, ae o lo o mau lava, e fai lava sina mau laitiiti. E manatua foi o seleni lea sa ao o pili aoga a le fanau, ia sa tua i ai aoga e fai o meaaoga a o fale foi ma mea faapena, o le mea lava lena sa faaoga i aoga uma lava le seleni latou te aoina. O le a le mea ua i ai i le taimi lenei? Ua fai le fesoasoani a le Malo, ia ae ua i ai ma nai aiaiga e taofiofi ai le soona faaaogaina e ese mai i a tatou meaaoga. O le tatalo faatauanau lau Afioga i le Minisita, se i silasila ane pe mafai ona tau talatala teisi ane, o le aoga a le kolisi o Aana Nu. 2, e manaia le matagofie o le hall la e i ai sa afio atu lau Afioga e tatala le hall lea, o le loan mai le Development Bank sa fai ai, a o le manatu a nai toeaiina sa i ai i lea taimi, e faamoemoe i pili o nai tamaiti, ia o sina mea mo meaaoga ia a o sina mea mo le loan, ia o le mea lea ua i ai nei, toe lava o le o atu o le bank e tala mai le hall. A o le tatalo i lau Afioga i le Minisita, se i e silasila lava i nai atinae sa faataatia e nai komiti mo le lelei o aoga, ae peitai o le suiga o le faiga ua fai ai pili o tamaiti, ua le mafai ai ona faamatu, tau lava o sina vaega, faamatu tau lava o sina vaega e fesoasoani i le togiina o aitalafu a nai aoga ma nonogatupe sa fai. O le talosaga lea i lau Afioga i le Minisita, se i alofa ane foi i le faleaoga i Siufaga i Falelatai e 130 tamaiti ae toatolu la ua i ai i lenei taimi, ae manatu a 130 ua tatau ona maua se fa o faiaoga, e le i maua se pule aoga talu mai le la fa tausaga. Ae pe mafai ona faatino lea vaega mo le matou aoga laitiiti lau Afioga.

Lau Afioga i le Minisita mo Faatoaga ma Faigafaiva, e momoli lau faafetai, e le i leva talu ai nei na ou i Niu Sila, Savaii Popo, number one, Savaii Popo o le Apa Peepee o le Savaii Popo, fai mai Saina ma Initia e ana faleloa o faatau ai, o le apa peepee lena ua numera tasi nei i Niu Sila, ia ave i ai se fesoasoani ma se faamuamua i nai ia atinae. O le talo foi a tatou sa faatau, e manaia lava le talo e tau mumu le mata-talo ia ai o le talo lea e mumu le tiapula, ae o le tulaga lena na i ai, pau lava le mea o le tulimataia ma silasila totoa le Matagaluega i le avega o le tatou talo, fili lelei le talo ma ia ave ma le mautinoa o lo o ave i le mea o lo o faulai ai talo, e faapena le tuualalo i lau Afioga i le Minisita.

Lau Afioga i le Fofoga Fetalai, o le matua manaia lava o le mea lea o le sisi Aferika i le ai, ua tatou aai ma talisua ai i le tatou malaga na o, a o lea lava tatou te feola, ona ou talitonu lea, aua e fai foi o le manaia o le matolutolu o le alili Samoa, ia a o le sisi Aferika na aumai i lena aso. Ia e leai e le o se tala e avane ai, ae o lea ua iloa nei, leai o le mea e taumafa, e ai ia le sisi Aferika pe a.....ia ae se i...pei o mea foi o lo o lafoai e tatou e i ai le pau o le sea ma tulaga faapena, vaeane le Maota, ia o lea na ave ifo lava i le tatou taumafa na avane i o. Ia se i silasila ane, fai mai foi o tatou e.....a o lea lava e tele nai ia mea e tali ai le sua.

FOFOGA FETALAI: Malie le sui usufono mamalu, se i tulai mai le fomai o taumafa, tulai muamua mai le sui usufono mo Aana Alofi Nu. 3, ia ona tulai mai ai lea o le sui usufono mo Faleata Sisifo.

Afioga Toeolesulusulu Cedric Pose Salesa Schuster (Aana Alofi Nu. 3): Lau Afioga i le Fofoga Fetalai, e manaia i le faalogologo le saunoaga a le Afioga i le sui usufono, leai e fia malamalama lelei lava i le ituaiga sisi Aferika lea leaga ou te le iloa po o le a le species lea po o fea foi na outou taumamafa ai i le sisi lea e tau o le sisi Aferika, aua leaga e ese le sisi lea le snails lea e tele ina faaoga e kuka a Vietnam ma Farani, e le o taumafaina ai le sisi Aferika lea e oo mai iinei i Samoa ae atonu la e maua ai.....atonu la e moni lea vaega, e talitonu e taua tele faafetai.

FOFOGA FETALAI: Le sui usufono mo Faleata Sisifo, se i tulai mai le sui usufono mamalu.

Tofa Lealailepule Rimoni Aiafi: Lau Afioga, o le tatou Fono lea e faafofoga mai i ai Samoa atoa, ne i te i ua tatou avatua ni faamatalaga le talafeagai, afai e faamaonia e le sui usufono e aina foi e faaoga i le fofoga taumafa lea mea, ia faamatala lelei mai, aua o lea ua talanoa atu le matou polofesa, e tele ituaiga species o le mea, e le faapea...o le mea lea e maua ia tatou e oona, e i ai le poison i totonu le mea e tau o le KR15, ioe, a e le tago la e aveese le poison lea, e le mafai ona e faaogaina le mea. O le mea lena e fai atu ai i le sui usufono, leaga o tala faalogo lea ona sau lea....ae se i vaai pe na ia aia le mea, ma le faaloalo lava.

FOFOGA FETALAI: Malo. Ia o lea o le a ou avatua le faamaoniga leaga na ou ai ma au, ina ne i meaane ua oulua...o le sisi lava ia o le sisi, e tasi lava le species o le sisi Aferika la e maua i Saina o lea foi e maua ia tatou, ae i ai lona vaega e eu ese pei o se au'ona, e pei o le au'ona o le alili, na matou matua tilotilo lelei ma le Afioga ia Papalii ma Taefu ina ua matou o atu i le breakfast i le taeao, matou te o atu o laina uma mai mea ia, sa matou fesili loa na ou alu lava i tua i le umukuka ou te vaavaai i le process ina, e saka lelei ona aumai lelei lea i fafo le aano atoa, ia ona aumai loa lea eu ese le iu lea e pei o se pulou aitu, o le iu la lena pei foi o le mea lea e oona pe a taumafa i le alili lea e maua mai i le sami. Ae ona o le tatou atunuu pei na sau le aumaiga o le sisi Aferika i le amataga, ua pei o se mea foi lea o se au'ona, pei o se sisi leaga e aia uma lau o laau ma mea uma, ona manatu loa lea o le atunuu ai e faaletonu, ae ua alu alu nei i le matou malaga ou te tautino atu leaga o lea ua saunoa Taefu, e sao sa matou...e leai lava se eseese tele na pau lava le

mea ona o le alili mai le sami, e maua lona onaona foi lea i le masima o le sami, ae pei o le alili o lea e maua i le laueleele, o lea e i ai le tulaga, ae ou te faamaonia atu lau Afioga i le alii polofesa o mea tau alili ia ma oe le polofesa o le tofo o meatausami, ia o lea ua ou faamalamalama atua.

Tofa Lealailepule Rimoni Aiafi: Faamolemole lau Afioga, manatua foi na ala ona taofiofi e tatou le mea, e tele atu le afaina o le tatou siosiomaga ma le atunuu i le sisi lea, i lo le itu lelei lea, e moni e mafai ona ai i le ituaiga atunuu na, a o le afaina la o le siosiomaga ma fua o faatoaga ma faaeleeleaga o lea e aumai e le sisi lea, o le mea lona o lea na taumafai tatou e tineia le sisi. O lona uiga la o lea pei o le a feteenai la finagalo o tatou ma le mea lea na taumafai e taofi, o lona uiga o lea ua manao e toe fofoa le sisi ae ai. O le sao lea?

FOFOGA FETALAI: E leai, o lea Leala ina ne i meaane ua e tosoa foi e matou te o atu e faafofoa le sisi, leai, o lea e saunoa le sui usufono mo Falelatai ma Samatau e faamalamalama sa taumafa le sisi i le matou malaga, ae le o i ai se agaga e agai faapea o le a agai e fai ni toga sisi, e le o le agaga lona. Tulai mai le sui usufono mo Falelatai ma Samatau e faaauau le saunoaga.

Afioga TAEFU LEMI: Faafetai i lau Afioga i le Fofoga Fetalai mo le fesoasoani mai foi e faapupula le vaega lea, afai o lea e fia maua e le sui usufono mamalu le scientific name o le sisi, ia ona ou faamalulu atu lea, masalo lava o le F150 lea e tele ina faaogaina nei e le tatou atunuu. Ae o lo o i ai lava i latou e fitoitonu ma lea vaega lau Afioga i le Fofoga Fetalai latou te siakiina po o sao atoatoa po o malu ma saogalemu le sisi lea e maua iinei, a o foliga ia ma le tofo, ia o lona sa silasila i ai lau Afioga, o lea e maua nai ata i i lau Afioga i le sui usufono mamalu mo Aana Alofi Nu. 3 pe a fia silasila i ai, ae ona o lea ou te i le Afioga i le Minisita mo Faatoaga ma Faigafaiva na ala ai ona ou taua le vala lea.

E tele foi nisi faiga sa fai ai le talo lau Afioga, o le sua o le talo na ave i o i Saina.....

FOFOGA FETALAI: Malie se i tulai mai le Afioga i le Minisita mo Faatoaga ma Faigafaiva.

Afioga Hon Le Mamea Ropati: Lau Afioga i le Fofoga Fetalai ma le faaaloalo, e faapea e le o au lea e lavea ai le sisi, a o lea la ua tau mai, o lau fautuaga la o lo o faafofoga le atunuu, aua ne i tago se isi e taumafa le sisi ne i te i ua ona, ae tape le sisi tuu i totonu o le mea o le paelo foi lea ma asu i ai le sami, o i ina e pe ai ona ave lea tanu faalelei, ae aua le taumafaina se i sailiili pea i latou e i ai le tomai i lea mea, ne i te i ua faaoga e lo tatou atunuu, afai sa taumamafa ai nisi o outou Afioga, ia masalo e ese le...ma e faapena mea o sisi e pei e foliga faatasi ae eseese mea o species. O lau soso atu lea ma le faaaloalo i le sui usufono mamalu, ne i faafofoga mai le tatou atunuu, ia ona o lea o tamaiti ao mai sisi ae te i ua afaina ai se isi, faafetai.

FOFOGA FETALAI: Ia tulai mai le Afioga i le sui usufono mo Falelatai ma Samatau e faaauau le saunoaga.

Afioga TAEFU LEMI: Ia o le agaga tonu lava lea na ou taua ai o lo o i ai lava i latou e fitoitonu i ai ma lea vaega, ia latou te siaki ma saunoa e aumai i le atunuu le tala tonu e ao ona fai ina ne i eseese foi ia se manatu, ae o le tulaga lena na i ai.

Lau Afioga i le Fofoga Fetalai e tasi se vaega lea e fia talanoa i ai o mea ia o papalagi, Saina o ituaiga tagatanuu faapena e tele le seleni o i fafo, e fia omai i totonu o Samoa e invest e teu ai a latou tupe e fai ai a latou pisinisi, e le o iloga lava ona matua maopopo lelei le tali atu a Samoa i le afifio mai o ia tagata, e aofia ai le Immigration, aofia ai ma le MCIL, o Leoleo, o le Ofisa o Tiute, o vaega uma nei lau Afioga i le Fofoga Fetalai, e tataua ona taumafai se tatou vaega foi nei mo central se vaega e one stop shop po o se mea faapena ina ia tasi lava le mea e toai i ai le investor lea e sau mai fafo ma issue foi e le MCIL lana foreign investment certificate, ae faapena ona talia gofie e le isi vaega e i ai le Immigration ma o i le mea e issue ai le business license. O le tulaga lea e i ai e pei e foliga e faamoemoe le isi Matagaluega e fai lava e le isi Matagaluega lana ia credit check, ae e pei o le agaga lena ia coordinate le auaunaga ina ia tasi lava se point e fai i ai le credit check ae mafai ona faaogaina e Matagaluega uma lava e involve i se tagata faipisinisi o fia fai sana pisinisi i lo tatou atunuu. E pei o le agaga lena lau Afioga i le Fofoga Fetalai.

Ou te momoli atu le faafetai tele i le Malo e tusa ai ma le tofa ua ae ina ia faavae le mea lea o le public enterprise, o le faateleina po o le faamalosi atili o le tamai vaega lea sa i le Matagaluega o Tupe o le SOEMD. Ou te momoli atu le faafetai i lea itu ona ua leva lava ona tataua ona fai i lau matau aua e pei o le isi lea vaega o le auaunaga a le Malo e le o iloga ona lelei ona coordinate ina ia lava tapena, aemaise ai foi o le maua mai ai o ni fesoasoani mo lo tatou Malo. Aua e i ai taimi e pei ua tau diversify laitiiti Faalapotopotoga a le Malo ina ua maua nai seleni ma laa atu ai fai isi auaunaga po o isi tautua e ese mai i le tautua na mafua ai ona faavae, ae ua fai lea vaega ma mafuaaga o le le avea ai o se dividend i le Malo ona ua faaoga tupe maua, ae ana maua lava nai polofiti ma vavae sina seleni mo lo tatou Malo – o le mea lea ou te faafetai ai lava i le faiga lea ua taatia mai ai ma o le tuualalo foi lena i le Afioga i le Minisita ua filifilia ina ia tulimataia pea a tatou Faalapotopotoga.

Sa i ai lava le galuega sa fai i ai i le vaega laitiiti lea a le SOEMD i le Matagaluega o Tupe, ae faafetai o lea ua faamalosi atili ina ia mautinoa o lo o tatou o pea i luga i le moa o le ala i a tatou Faalapotopotoga ma maua mai ai foi ni nai seleni. Aua e ala foi ona privatise ona o le i ai o le potential e maua ai nai seleni, a maua faamolemole aumaia sina mea mo lo tatou Malo.

Lau Afioga i le Fofoga Fetalai, o le cycle lava lea tatou te i ai e continue lava. O le Tala o le Tupe, faatino auaunaga, accounts, audit and annual report. O le cycle e continue faapena. O lea foi o le a uma Iuni lau Afioga i le Fofoga Fetalai e uma ai le Tausaga Faaletupe 2013/2014, ona account, audit, annual report foi lea. E fa lava masina ina ua uma le tausaga faaletupe e tuuina atu i Matagaluega ma Faalapotopotoga e fai ai a latou tala o tupe. E oo atu ia Tesema ua tataua ona uma foi ona audit, ona Ianuari loa lea i le tausaga fou aumai loa i totonu le lipoti faaletausaga. O Iuni o le tausaga lena lau Afioga i le Fofoga Fetalai, le tausaga lena 2014, a o Ianuari o le tausaga fou e amata ai loa ona sau i totonu.

Ua ou fiafia lava lau Afioga i le Fofoga Fetalai aua ua amata ona vaai e nai Komiti o lo o ou tautua ai, ua amata ona vaai le sau i totonu o Annual Report. Faafetai lava i Matagaluega ma Faalapotopotoga a le Malo ona ua amata ona tali mai aua o le tele foi lea o galuega e feagai ma le Palemene leni pe a tele Annual Reports. O lea ua sau i totonu le 13, a o lea o le a uma le tausaga faaletupe 2014, afai e le i sau i totonu lau 2013, ou te talitonu ua tuai, ae ia tautuana ma outou; account, audit, annual report.

O lau fautuaga lau Afioga i le Fofoga Fetalai i Matagaluega aemaise foi o Faalapotopotoga, e leai o outou o lo o i ai le atoaga o mea uma ma o lo o vae ma lima i ai Minisita. A o le tuualalo a lou sui usufono, ia outou alolofa, ave le fautuaga i le Minisita. Ia fautua i le Minisita, aua le fefe e fautua i le Minisita. Aua le musu e tuu le sao i le Minisita. Afai lava ua uma le paketi, saunoa sao i le Minisita ua uma le paketi ona fai lea o se isi fua aua o lea e avanoa isi faiga i a tatou supplementary ma tulaga faapena e fai i ai a tatou faasoa, a o le tuualalo lena i Faaululuga o Matagaluega ma Faalapotopotoga ina ia fesoasoani i le tele o le avega o lo o tauaveina e Minisita. A faaletonu le Minisita ona o le le lelei o lau fautua, ou te le iloa pe e te soona nofo mai o le a, ma o lau lea tuualalo.

Lau Afioga i le Fofoga Fetalai, o taimi o a tatou Fono, o Fono a le Palemene. E le i leva nei lava ona tatou pasia faatopetope e aunoa ma le silasila i se pepa e tasi o isi Annual Report e fia sefulu na tatou pasia faatopetope ona o le a lape. O lau tatalo i lau Afioga i le Fofoga Fetalai, fetuunai o tatou aso fono. Afai ua le lava aso faatulaga, tofu le masina ma aso fono. E aoga foi mo matou la e i tua e omai ai i Apia aua ua na o le fai, fai o maumaga ua tetele ua le mafai ona faatau, ae ua maua foi lea avanoa e omai ai i Apia ma fai a tatou fono. O le tatalo lea lau Afioga i le Fofoga Fetalai ma lau Komiti lea e feagai ma le faavasegaina o a tatou galuega ina ia tatou silasila i galuega ia. O lea o le a up-date mai lava Annual Reports a Matagaluega ma Faalapotopotoga, ae ia lava foi taimi o lo tatou Maota e silasila ai i ai.

Lau Afioga i le Fofoga Fetalai, o le tatalo ia fai se tatou Loia, o le Loia a le Palemene o Samoa ae soia e te faamoemoe i le Ofisa o le Loia Sili aua o le Ofisa lena e fautuaina lo tatou Malo. O tatou le Palemene lau Afioga i le Fofoga Fetalai, e tataua lava ona i ai se Loia e tutoatasi foi ia ma ia i ai le atoaga o le Palemene i lona fatu i le tapenaina o ana galuega ina ia fautuaina ai le tulaga sao e tataua ona i ai.

Ia manuia tele le tapuaiga a Samoa, manuia le tapuaiga a lou itumalo o fita faafogafoga, ia manuia le Maota ma ia manuia le Fono. Soifua.

FOFOGA FETALAI: Faafetai saunoa i le sui usufono mamalu mo Falelatai ma Samatau. E talitonu ua matagofie le tuleiga ma le saunoaga. Ia lavapapale foi le paia i lo tatou Maota e tusa ai foi ma saunoaga e agai i le Ofisa o le Fono. O lea ua faafogafoga atu, o le tulaga tonu lena o lea ua i ai. O lea ua amata ona fetuunai a tatou polokalame o aso fono ma le Malo e le gata i mataupu faale-Malo, a o mataupu faa-Palemene. O lea foi o lo o i totonu o le tatou polokalame o le Parliamentary Strengthening Program tulaga aloaia aua le fesoasoani i galuega fai a le Palemene. Ae lafo maia, e talitonu e le o tuumamaina e le Komiti o Galuega, Tulafono Tumau, Maota Fono ma Mataupu Tau Faiga Palota ma o lo o i ai foi le Palemia ma le Afioga i le

Taitai o le Itu Agai ma au nei ma e talitonu o le a taatia ai i le tulaga e tatau ona i ai.

Tulai mai le Feagaiga a Tumua ma Pule, lau Susuga Ifopo Matia Filisi, ua maua le avanoa o le itumalo o Aiga i le Tai.

Susuga IFOPO MATIA FILISI (Aiga i le Tai): Faafetai lava i lau Afioga i le Fofoga Fetalai, e faafetai foi ona o lea ua ma soo tulutulu ma lou uso Tauaana.

E faatalofa atu foi i le Palemene atoa, faatalofa atu i le tama o le atunuu, Afioga i le Palemia, le Sui Palemia ma le Kapeneta, le Taitai o le Itu Agai faapea foi le mamalu o le Palemene, le Ofisa o le Fono Aoaofa Faitulafono ma le aufaigaluega.

E fia faailoa se leo e fai ai au ma sui o le Susuga i le Faafeagaiga ma o latou faletua, le paia i Aiga, le Tofa i le Tuua ma Lautolo ma le mamalu o le Ekalesia Katoliko i Mulifanua e faamaise ma faamafanafana atu ai i lau Susuga i le Fesoasoani Lolesio ma le faletua ia Maletina ona o le valaau a le Atua i lou tama, le Tofa Tuiloa Sagata Anitelea. Ia faamafanafana foi i le tina ia Taupou ma le fanau, faafetai.

Lau Afioga i le Fofoga Fetalai, tulouna ia Samoa aua o oe lava o le ao mamala, tulouna le tapuaiga a Lana Afioga Mamalu O Le Ao o le Malo ma lau Masiofo, tulouna foi lau Afioga i le Sui o le Fono a Sui Tofia, Afioga Tuiaana Tuimalealiifano ma lau Masiofo. Afio foi lau Afioga i le Faamasino Sili ma le mamalu o le Faamasinoga, o Faauluuluga uma o Matagaluga a le Malo ma Faalapotopotoga Tumaoti, Kamupani ma le Aufaipisinisi uma o Samoa; talofa lava. Le paia i le afifio o Aiga o Tupu, Aiga o Nofo, Aiga o Papa ma Aiga na Tafai. E malu le lauga i le Usoga a Pule ma Tumua, Tula o Aiga ma Faleupolu totofi o Samoa.

Ou te faatulou foi i le paia o le Aufaigaluega totofi o le Tala Lelei ma le Aiga Sa Levi, tulouna lava. Lau Afioga i le Fofoga Fetalai ma le mamalu o le Palemene, ua tu mai lagi le lagaali o Tamafaiga. O upu ia o lenei itumalo o Aiga i le Tai, ae se i ou liliu ane e faatalofa i le tapuaiga a lou itumalo.

Talofa Aiga i le Tai lou itumalo pele, ou te faatalofa atu i le paia o Luatimu i Faleu o le malae e lua i ai taeao o le Tala Lelei i Samoa, a o le uluai pou foi o malo na totofi ai upu o le atunuu i le Susu o Leiataualesa ma le Aiga Sa Leiataua, lau Fetalai Futi o le moa vini mua, Aiga Sa Mutimuti faapea le Matua ia Vaisagone, talofa lava. Ua mamalu foi Malaetuli i le Susu o Leiataualetaua ma le Aiga Sa Leiataua, le Falelima o Alo o Sapapa ma lau Fetalai Vai ma le Faletolu, talofa.

Tulou Atiga i le Susu o Taupau ma le Aiga Sa Taupau, tulou Falemai i le Susu o Mulipola ma le Aiga Sa Mulipola. Eetai lau Fetalai Auapaau ma le Falefa o Salua ma Satuilaigi.

E faatalofa atu foi i le Ana o le Maile ia Luatutu ma le Aiga Sa Luatutu, tulouna Falemanono le Maota e Susu ai Tuilaepa o le Alo o le Malietoa, Susu le Usoalii, Afio le Matua ia Finau ma le mamalu i le Ologama.

Ou te faatulou atu foi i le paia o Lalotoa aua le Susu o Sau ma le Aiga Sa Sau, Afio Lilo ma Tumanuvao, le mamalu ia te oe Sauma, talofa lava.

Ou te saga faatalofa atu pea i lo tatou nuu i Mulifanua e ui lava ina tatou nonofo faatasi ma tatou momoe faatasi, ae ua faamalo. O le a se i taumafai lo outou sui usufono na outou totofi faapea le itumalo e fai so tatou sao.

E faatalofa i le Susu o lo outou Aiga, Alo o le Malietoa lau Susuga i le Faaaloaloga Moananu, Susu foi Taulapapa, Mauinatu ma Tauti. E faatalofa i le Faaaloaloga lau Susuga Fualefau Lote Naseri, le Susu o Fuaolefau ma le Pouli, Afio Lilomaiava. E faatalofa atu foi i lo tatou aiga i le Usoalii, le Susu o Togialelei Ioapo le Faaaloaloga, Susu Togialelei ma Ifopo ma Togiailevaimoa ma outou Aiga.

Ou te faatalofa atu foi i le alaalatai o Falute ma Maoso, Faatei ma lo outou aiga, le paia i le Lautinalaulelei, Susu Mulipola ma Taupau ma lo outou aiga.

Ou te saga faatalofa atu foi i le Tofa i le Tuua ia Vaatiuola ma Lautolo ma lo outou Faleupolu. E manatua foi le sao taua o faletua ma tausi, Sa Tooa ma saoa, le malosi o lo tatou nuu ma le itumalo ma le 21 tausaga, talofa lava.

E le mafai foi ona galo le sao taua o le Aufaigaluega Paia a le Atua ma aiga e le gata e auala mai ai faamanuiaga a o le faaloto tele, talofa lava.

Lau Afioga i le Fofoga Fetalai, faafetai i le tapuaiga a lou itumalo ae se i alo atu e faamanatu nisi o a tatou talosaga i Afioga i Minisita o Matagaluega taitasi.

Lau Afioga i le Minisita mo Leoleo ua faamalo, faafetai lava. E ui lava ina ou faalogologo o saunoa lou uso nei le Tauaana i le falepuipui, ae e talitonu lava o lena ua i ai talosaga ua i ina. E moni foi o galuega nei o galuega lava e tatau ona aua ne i aafia ai auala galue aua o galuega lava mo le Malo ona o o tatou ofisa o lo o i ai i le mea lea e tau o Olomanu. Ia aua ne i galo foi i lau Afioga i le Minisita, o Olomanu o le igoa lena na faaigoa ai e le tamaloa ma le loomatua Mulifanua. Aua ne i faagaloina lo matou nuu aua e o faatasi lava le Tulafono ma le faiga o pulega a matai po o alii ma faipule. E i ai lava le taimi e manaomia ai lo matou nuu e vaavaai ma leoleo lo tatou auala lea e agai i uta i le falepuipui.

Ou te fia talanoa foi i le station lea i Faleolo, ua faamalo faafetai. O lenei auaunaga o lo o fai e Leoleo po o sui o le Malo e le gata i le malae vaalele, o le uafu, e faapena foi i faletalimalo uma o lo o i ai i lo matou itumalo, le nuu, e tele tele le coverage lea. Ae na pau le tuualalo ma le talosaga atu, e i ai le taimi e vili mai ai e le lava a latou taavale, ae faamalo lava i lau Afioga i le Minisita ma le Ofisa, malo faafetai mo galuega o lo o gapatia ai le mamalu o le Malo.

Lau Afioga i le Minisita mo Galuega, Felauaiga ma Atinae Eeseese, na o le faamanatu atu lava o nai talosaga lava nei sa avatu i le amataga o le Paeaiga lenei, ae i ai foi le talitonuga, e tau foi ma oe i alofa tele i ai. O le Minisita aupito sili lava lea ona ou iloa e au i le tele o le tau faasoasoa, ona o naunautaiga lava o sui usufono o itumalo taitasi. Ou te talitonu foi e leai lava se mea e le mafai ona e faia leaga o oe o le Tiakono Toeaina, a o oe foi o le tagata lotu. Faamalo lava i lau Afioga. Na pau lava lea o le mea ou te faamanatu atu, muamua o le vai, ua matua pagatia lava si ou nuu i Manonotai i le suavai. Na pau lava le talosaga faamolemole, pe mafai nisi o le Ofisa ona asiasia le mea tonu lava lea e taunuu atu ai le vai i tai i Salua pei lava o i ina e faaletonu, pe faaletonu foi le pamu lea e i uta mo le tuleiga o le suavai i tai i Manono. O le vai lava o se mea taua.

O le vai foi lea e i Apolima ua oo i ai lau asiasiga, o le fesili; faamolemole lava i lau Afioga i le Minisita ma le mamalu o le aufaigaluega po o le Matagaluega, po o le a le mea e ala ai ona pe le paipa lea a si ou nuu o Apolima faavaitaimi, pei e uma loa le 8:00 pe i le 9:00 faatoa toe sua mai po o le 3:00 po o le 2:00. Na pau lava lea, e le o se mea foi e afaina tele, ae se i

asiasia ia tutusa uma ai ma isi foi alaafaga pei ona molimau atu, o le matua tele lava o le suavai lea e i gauta o Aiga i le Tai.

O le vai i Mulifanua na ona toe faamanatu atu faamolemole i le tatou nuu fou foi lea i le poloketi lava lea o le auala, o le vai, o le uila, le EPC. Malo faafetai lava mo le galuega a le EPC, malo lava. O la e ua i ai pou ae le i faapipiia a tatou transformers. Ae ou te iloa lava o lena ua faasolosolo atu galuega, faafetai lava i le Matagaluega, faafetai i lau Afioga i le Minisita.

Ia, ona ou oo mai lea i auala, faamolemole lau Afioga i le Minisita, o auala aupito sili lava ona taua ou te iloa e tataua ona faailoa atu i lau Afioga po o le Matagaluega foi a le LTA faapea foi le Minisita mo Aoga lea na taumafai atu ai si ou uso lea, na ou talanoa ai foi muamua. O le aoga lea i le Kolisi o Aana Nu.2 lea e i Apolima, ua matua leaga faia lava le auala, ae toetiiti lava a tolu itumalo lea e taufai aoga uma i totonu o lena aoga, o Falelatai ma Samatau faapea foi ma Aiga i le Tai, ae taloto atu ai foi ma Satuimalufilufi mai Aana Nu.2. O le mea lea e tatalo atu lava, o aoga, o le aoga i Mulifanua i le primary school, o le aoga i Satuimalufilufi, o le aoga i Apolima, e le atoa se ½km po o le a ea le tauga o le mea, pe uma i ai se 2km. O le agaga lena e toe faamanatu atu ai auala ia.

Lau Afioga i le Minisita mo Tagata Tafafao Maimoa Mai Fafu, po o lau Afioga foi i le Palemia, o le aoga lea i tai i lou nuu lea i Manono, e matua matautia le tele o talafaasolopito, faapena foi faletalimalo ua faia i tai i le nuu lea. O lo o tele lava ni fuafuaga i tai i Manono. Ou te iloa foi, e le o itumalo po o Puleono ma Tumua lea e tataua i ai le upu lea, o le mea e manaia i Apia, e manaia foi i tua. E leai, e tataua ona manaia i Apia ae manaia foi i Manono. O lau tatalo atu lea, faamolemole, faaoo atu pea i ina, o le faamanatu atu lava ma tatalo atu, ae o lo o silafia lelei lava e le tofi o Aiga i le Tai, e le faigofie. E ave lava le faamuamua i se mea e i ai le faamuamua, e faapena foi ona onosai ma faatalitali i se taimi e fai atu ai le auala.

Ou te faafetai faapitoa lava ae ou te le i alu ese ma le Minisita mo Galuega, Felauaiga ma Atinae Esee, faafetai lava i tusi valaau foi nei e valaau mai ai le LTA matou te o i le tatalaga o lea auala ma lea auala, faafetai lava. E ese le manaia, na o le o lava e tatala auala o isi itumalo, ae se i tatala tasi se matou auala ona manaia lea. Ua le manaia foi lea mea o le ai fua mai isi itumalo i lena mea o le tatalaga o auala. Ma lou faaloalo lava.

O le Minisita mo Punaoa Faalenatura ma le Siosiomaga, o lau uo lelei le toeaina lea. E leai foi ni au mataupu se tele e toe faamanatu atu. Na pau lava le mea ou te tatalo atu i lau Afioga i le Minisita pe mafai lava ona faaavanoa mai se avanoa i lou Ofisa se i tatou toe talatalanoa lelei ai i seawalls a Aiga i le Tai. O nuu lava nei e matautia le pagatia i le mea lea o le tau avatu e le sami o ona matafaga. O tatou eleele, e fia feiloai atu foi le itumalo i eleele o le STEC pe afai e mafai ona faamatuuina mai e auala i le lisi ma mea faapena, e fia maua i ai se tatou feiloaiga. O se faamatalaga lea i lau Afioga ae malo faafetai lava mo le tali mai foi i seawalls muamua, o la e lava e le i faatinoina lava i Mulifanua, lea faapea na o le sefulu ni fale agai atu. E faapena foi i Salua Manono i taligalu, ua osofaia lava e le galu ma agai i luma. Faafetai foi i le LTA ua uma ona latou faia taligalu e pupuni ai le auala, ae na o maota ma laoa o nai aiga lena e i Manono ua mafai ona oo atu i ai se asiasiga. O le tatalo atu lea ma le agaga vaivai.

O lau uo le Minisita mo Faatoaga ma Faigafaiva, na ou faalogologo lava ananafi i le taumafaiga mai o le mea lea o le stimulus package ma le SACEP,

uma lea, ua ou fiafia i le faamavae o nisi o sui usufono mamalu lea ua faamavae ma le SACEP latou te le mafaia. Ae o tua i le matou itumalo, leai e lava a le onosai e faatalitali ai le taimi e faatino ai, ae o la e ua amata lava i a latou tupe. Na pau le mea faamolemole ia iloa e le Matagaluega o lo o moomia lava le fesoasoani i mea nei i tua.

O le isi mataupu aupito sili lava ona taua faamolemole lau Afioga i mea tau faatoaga, o le Kamupani lea o le Sea Cucumber lea ou te iloa o lo o ban mai le 2008 agai mai i le taimi lenei, a o lea ua saunoa foi le Palemia, e taga mea nei o faatoaga e faafofoa ai le mea lea, e maua ai pisinisi. Ua toe lava o se tali mai a le Ofisa ma lau Afioga i le Minisita ona faagaioi loa lea e maua ai foi ma galuega. E leai lava se eseese foi o ia poloketi po o ia foi atinae e maua ai galuega a alo ma fanau o itumalo e faatino ai lea mataupu. O le mea lea e tau o le sea cucumber. Ou te talitonu foi, a vave mai lava ua faapena foi ona faatino ma maua ai galuega a tagata. Afai foi e faaletonu i se fall back, e faapena foi ona toe tapena ma aveese a o le mea sili ua maua ai ni galuega, a ua i ai la le talitonuga o lo o lava tapena nei tagata mo le faatinoina o lenei mataupu, o le farming, o le sea cucumber, ma ou te iloa foi ua e silafia le toatele o nisi o lo o taumafai i ai.

Ia, o le Minisita mo Aoga, e toe faamanatu atu lava faamolemole lau Afioga, e pei e manaia le ui atu ia te oe toe ui atu i le Minisita mo Galuega, Felauaiga ma Atinae Eseese, ona oo ai lea i le Kapeneta atoa, i auala lava ia o aoga ma auala ia e i ai foi auala galue e aafia atu ai lava ma le aoga lea i le aoga i Apolima, faamolemole i le oso atu o tamaiti i le isi itu agai i le isi itu. E manaomia lava se asiasiga e faamaonia ai nei talosaga ma nei faamanatu e avatu i a outou Afioga i Minisita.

O le ta malae lakapi, o lea na ou tatalo atu ai i le 2011 lea e taaalo uma ai lava Aiga i le Tai, o Samatau, Falelatai toetiiti lava omai ai ma Lefaga. O lau molimau e avatu i le tatou Palemene faapea foi le susuga i le Taitai po o le Taitaifono o le Iuni Lakapi, ua e silafia lelei Magele o au e lelei lau taalo, na faapena ona ta taaalo faatasi i taaloga i aso ia. E tolu tamaiti o le matou Iuni, Aiga i le Tai, Falelatai ma Samatau o lea e i ai i totonu o le au taitoafitu. E leai ma se isi o tau mai le nuu o Mulifanua po o Apolima po o Falelatai ua omai taaalo i Apia, ona alu atu ai lea o igoa o isi kalapu ia e i Apia, talu ai ona o le malae ma le omai taaalo i i. O le mea lea ou te iloa ai, ma ou te fiafia foi i le faaupuga lea pei ona saunoa i ai le Taitaifono o le Iuni Lakapi, o e taaalo mai tua.

Ia o lau tatalo lea faamolemole lau Afioga i le Minisita, o le matou malae ia faaleleia ia tele ai nisi Manu Samoa e omai i le matou itumalo faapea foi Samatau ma Falelatai aua ua tuufaatasi uma matou Iuni ia.

Lau Afioga i le Fofoga Fetalai, faafetai. O le a faaii lau lauga o le Tala o le Tupe e faalogologo mai lou itumalo, o tagata nei e omai mai o o tagata atamamai uma o le tupe, e iloa faaopopo, e iloa foi toese, e iloa foi tupe maua ma tupe faaalu. A o lea ou te tilotilo atu i le Lipoti lea, o tupe faasili, ou te le iloa po o lelei lau vaai pei e foliga mai o lea e fai mai, ave uma tupe faasili lea ma tamai motu laiti foi nei o le tatou atunuu, e lavea ai tua i motu i Aleipata ma Manono ma Apolima. Pe sao au, ua pasia foi e lenei itumalo le Tala o le Tupe, e avatu ai le agaga.

Lau Afioga i le Palemia ma le Kapeneta, faamalo i lau Afioga i le Palemia le pule, ua e faasoa lava le tautai matapalapala i lau Kapeneta, ua tofusia foi Puleono ma Tumua. O le tatalo a le sui usufono mo Aiga i le Tai, ia outou

alofagia la outou feagaiga. E faamanatu atu lava, ae pule lava outou mo le faasoasoaina o a tatou galuega. O le tatalo foi a le feagaiga, e leai, e le soona gaioioi lava pe pisivale, e le manao e tagisa foi, ae faafetai lava.

Lau Afioga i le Fofoga Fetalai, faafetai lava mo lou avanoa. Ou te faafetai atu i Ofisa Sili o Pulega o Matagaluega taitasi ma afaigaluega, malo lava le fai o le faiva, malo le taumafai ma atiae, faamalo lava i Afioga i Minisita taitasi ma Matagaluega taitasi. Faafetai foi i lau Afioga i le Palemia, Sui Palemia, faafetai i lau Kapeneta, faafetai i le Taitai o le Itu Agai, faafetai i Minisita Lagolago le galulue i le la, faafetai foi i Minisita Lagolago le tutu mai i le paolo. Faafetai i lau tapuaiga Samoa mai le ao seia oo i ona iu. Faafetai i lou itumalo pele o Aiga i le Tai.

Lau Afioga i le Fofoga Fetalai, e tasi lava lau faamanuiaga ia te oe, ia alofagia e le Alii e foai pea le ola ma le malosi ia mafai ona e faatoatoa ai ma tauaveina le tatou Fono. Ia manuia ma soifua le tatou Fonotaga ma le Maota.

FOFOGA FETALAI: Malo faafetai saunoa i lau Afioga i le sui usufono mamalu mo Aiga i le Tai. Ia, e talitonu ua faafofoga ma le totoa Tumua ma Pule. Lafo laia o le faatuatuaga e manatu o le a le vale tuulima manaoga o le tatou itumalo aua e oso pea le ia o le fau ma e le uma le fai aso o le Alii, ae mau le toovae ma le tapuaiga.

Ia o lea ua avanoa le Maota le Vaa o Fonoti, e lelei lava le sootuli ma sootauau o lea ua agai mai le tatou taamilosaga mulimuli, ni a fa au, o lea e lava lo tatou taimi.

Ia tulai mai le sui usufono o le Vaa o Fonoti e saunoa aua le avanoa mo le itumalo.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai, e usitai lava le Vaa o Fonoti i le faatonuga a lau Afioga.

Faafetai lava i lau Afioga i le Fofoga Fetalai e faamalo atu foi i le paia ma le mamalu o le Maota Fono nei, o le a ou le toe talavaleina faalupe lavelave mamalu o le aso, e le toe ta foi Tapaau ou paia aua ua uma ona laumanuula le aso, e muamua ona sii le faafetai i le Atua ona o lea ua tatou aulia mai lenei ituaso.

E faatulou atu i le paia ma le mamalu o le Palemene nei, tulou foi i le paia ma le mamalu o Samoa o lo o faafogafoga mai i lenei Fonotaga, Lana Afioga Mamalu, O Le Ao o le Malo ma lana Masiofo, le Sui o le Fono a Sui Tofia ma lau Masiofo, le Afioga i le Faamasino Sili ma lou faletua, afio i alii ma tamaitai o le Faamasinoga o Fanua ma Suafa ma le Ofisa o Faamasinoga, e faapea foi le Faafeagaiga o lo o tauasuina le vai o le ola i le tatou atunuu.

Lau Afioga i le Fofoga Fetalai, ae ou te le i oo atu i le Tala o le Tupe, e tatau lava ona fai sina faatalofa i lou itumalo pele le Vaa o Fonoti, le afio o Ulualofaiga ma Aiga e lua le Usoalii le toafa ma le matua o Talamaivao, o e na taitai ma le Atuaolefauono, tainane foi lea itu o le vai i le afio o Gafa ma Alo o Sina, afio le Suafa alaalatai Molioo ma le aiga sa Molioo, o oe le Ailaoa faapea le Fofoga Malepeai, alaalatai le Vaa o Fonoti o le mamalu o Maauga ma Lalogafuafua, ia ae tainane le Afifio ma le Susu o Faafeagaiga Taulagi i Ekalesia e fia o lou itumalo, faafetai i le tapuai mai.

E muamua se faamatalaga i le Tala o le Tupe e talitonu ua lava ma totoe le taimi sa matou soalaupuleina ai le Tala o le Tupe i le oo mai o Faauluuluga o

Matagaluega ma Faalapotopotoga a le Malo, ua lava ai foi se malamalamaaga i le tulaga o lo o i ai le tatou tamaoaiga ma le faatinoina o galuega. Ae tatau lava ona avatu ni manaoga o le itumalo, e talitonu e le o po se lilo e momoli atu ai le faafetai i le tele o Matagaluega sa matou talanoaina le latou Tala o le Tupe ia ma faamalieina ai le matou Komiti.

Le Minisita mo Galuega, Felauaiga ma Atinae Eseeese, ia e momoli atu le faafetai i lau Afioga i le Minisita aemaise o le paia o le aufaigaluega e tusa ma galuega ua faatinoina i lo matou itumalo. E pau lava le agaga i lau Afioga e talitonu ia, o lea e faalogologo ma le totoa i le tele o saunoaga a sui usufono o lo o tagisia auala galue, o auala galue e tai tolu tai fa, ia a o au lea ou te tagisia le aualatele o le Malo mo lo matou itumalo. Na ona tuu atu i tafatafa e talitonu o lo o i ina le faasoaa, e ui ina laitiiti le tatou tupe maua, ae taatia atu i ina i lau Afioga ma le Matagaluega.

E talitonu leni sui usufono e tatau foi ona i ai nisi auala e suetupe ai le LTA e ono mafai ai ona....a maua ai se tupe ia avatu e fai ai ia galuega o le matou itumalo i Fagalooa. E vaai i totonu o le taulaga i pakaga o lo o i ai, o le matua tele o le space o lo o faaoga e taavale e paka ai mo le aso atoa. Ae le pe ua tatau ona fai se tulafono e faamita ai e fai ai ni mita e tutu ai taavale ia....ma isi seleni a le LTA e fesoasoani i le limavaivai o lau Matagaluega. Ae talitonu e tele lava auala e mafai ai pe a i ai se tulafono e pasia aua le faamitaina o paka nei ia maua ai se isi tupe maua.

E talitonu foi i le anavatau a le HRPP i le tatou Paeaiiga leni, o lea e i ai i totonu se uafu faapea e fai i Fagalooa, ia e talitonu i le Minisita o le gataifale, e talitonu e le mafai ona taunuu lena mita i leni vaitau i le agai atu i luma, e talitonu e mafai ona faatinoina. E faalogologo foi ma le totoa leni sui usufono i le tele o Fale I'a o lo o fuafua mo tai le uafu pei e muliga ai le uafu i Apia i le loloto toe lautele aua le feoai o vaa tetele. Ona pau lava vaa o lo o ou vaai ai i tua na o vaa tau a Amerika ma Niu Sila e omai ma o atu taula ai ae lipea (repair) ona o le tele o le Bay o lo o i ai. Ou te talitonu e faapena se lagona a avatu foi ae fai i le itu mai se Fale I'a ou te talitonu a i ai se manogi e gata lava i tua i lo matou Itumalo ona e mamao ese le vaega e tu ai mai le alaafaga ae latalata. Afai foi e faigata ona o le auala, e manaia foi ae fai se tanu e oso atu i Falevao ae ea ane i Musumusu, e puupuu lava le auala pe afai se tanu e faigofie ai ona femalagaai Fagalooa.

Faafetai atu i le Matagaluega a le EPC e tusa ai o la latou galuega o le a faatinoina po o le toe taumafai e faamama le gataifale o Taelefaga i le tulaga o lo o i ai le vai o lo o tafe mai luga mo le faaogaina o le afi. E i ai foi nai manatu ua uma ona talatalanoa atu i lau Afioga mo se isi tulaga e faatino ai lea galuega aemaise o aseta a le Malo o lo o i ai i tua aua e tele lava le mika uati, e fa mika uati o lo o maua mai i Lefaga. E talitonu le faamoemoe i lau Afioga o le a taatia atu i ina ae faamoemoe mea uma i le lava o seleni.

O le Minisita o Tupe po o lau Afioga i le Palemia, e au foi leni sui usufono i letele o manatu o nisi o sui usufono ona o le vaitau leni e manaomia le tele o seleni e fai ai a tatou galuega. O le a le mea tatou te le nono mai ai ni tupe se tele e faatino ai nei galuega. E talitonu lou nei sui usufono a lava galuega fai a le Malo o le tele foi lena o le tamaoaiga e alu atu i aiga i nuu i tua. O le taimi lava e faalaitiiti ai galuega a le Malo ua laitiiti foi le seleni e alu atu i tua i aiga. E mautinoa lava e tatau ona i ai ni galuega a le Malo aua le faasoasoina o le tamaoaiga i nuu i tua. Ae manaia le \$2pilonia a Saina o lo o float nei i le pasefika e amata ona tatou eli ma maua mai ai tupe e faatino ai a

tatou galuega. O le tau i lenei vaiata e taugofie atu na i lo le tau o le isi 20 tausaga o i luma, ia fai se poloketi e fai i le \$100miliona i lenei tausaga e i ai le talitonuga o le isi 20 tausaga ua \$140miliona, tatou te le iloa foi seia vagana lava le silafaga a le Alii ae oo atu i ai nei fesoasoani e mafai ona maua mai ai ni nonogatupe i le tului maualalo. Ou te talitonu o le tele o le alagatupe lenei a Saina, o lo o fai lava ma faamagalai mai e Saina a tatou nonogatupe i lea vaiata ma lea vaiata e faapena pe a tatou galulue faatasi i le faaogaina o lea fesoasoani mo le Pasefika. O le a tuu atu pea i lau Afioga i le Minisita o Tupe.

Lau Afioga i le Minisita o Leoleo ma Falepuipui, best Minister. E talitonu le faamoemoe ua saunoa foi nisi o le Komiti i le auala o lo o agai i le Falepuipui o Oloamanu. E moni lava o le tatou Matagaluega a o le fanua lea na tatou faatauina mai le WESTEC, sa tatau ona fai e se isi o le WESTEC lea auala - le \$9miliona lea na faatau ai e le Matagaluega o Leoleo lea fanua, o lea foi ua o atu i ai ma le Matagaluega o Faatoaga, e tatau ona i ai sina vaega e fai ai le auala. Sa alu i ai le asiasiga a la matou Komiti o le matua leaga lava o le auala o lo o faaoga i aso uma e le Malu o le Malo aemaise o le Matagaluega o Faatoaga i le latou 200 eka o lo o i ai e sosoo ma le Falepuipui.

Lau Afioga i le Minisita mo le Soifua Maloloina, faamalo mo le galuega fai e auala atu i lau Afioga i le Fofoga Fetalai le faafetai e tusa ai o le galuega o lo o faatinoina i le falemai fou. O la matou asiasiga atonu o se tasi lenei o Falemai e iloga lona tulai mai i le Pasefika pe a uma ona faafausia i le meaaloa a Saina aemaise o le Konekarate o lo o latou fausia. E faamalo atu ai i lau Afioga e auala atu i le Afioga i le Fofoga Fetalai le faafetai faapea le afaigaluega o lo o galulue ai.

Ou te talitonu o mataupu uma lava na o lou Itumalo ua uma ona avatu i lau Afioga i le Minisita mo Galuega, Felauaiga ma Atinae Eseeese, e pei ona fai atu e leai se auala galue i lo matou Itumalo. E oo foi i le auala o Faleapuna e le o se auala galue a o le auala tele o le Malo ona e taamilo lea auala i totonu o lo matou nuu, a faapea foi e faaoga ua sauni lava lo matou nuu e tuuina uma mai fanua mo le fausiaina o lea auala.

Lau Afioga i le Fofoga Fetalai, e lagolagoina e lenei sui usufono le Tulafono Tau Faaofi o le Faatatauina o Tupe 2014/2015. E pei lava ona fai atu se faamatalaga i le taimi muamua, ua lua vaiaso o matou soalaupuleina le Tulafono Tau Faaofi o le Faatatauina o Tupe 2014/2015 ma ua taliaina ma le fiafia e lenei Itumalo.

O isi Matagaluega uma a le Malo faamalo le galulue, Minisita aemaise o Ofisa Sili o Pulega o Matagaluega ma Faalapotopotoga Tumaoti a le Malo, o outou o lo o mafatia i le faatinoina o galuega a o matou o lo o nonofo atu i nei ma fai Tulafono. E momoli atu ai le faafetai e auala atu i lau Afioga i le Fofoga Fetalai.

O le tatou Maota nei i le afio o lau Afioga i le Fofoga Fetalai, e momoli atu le faafetai mo le faafetai o la tatou galuega aemaise o lau Afioga i le Palemia, Afioga i le Sui Palemia ma le Kapeneta aemaise Minisita Lagolago. O lona foi Itu o le Maota i le Taitai o le Itu Agai ma Shadow Ministers, faamalo le galulue aua se fautuaga mo le Malo ae ola le sui usufono mo le Vaa o Fonoti.

FOFOGA FETALAI: Malo faafetai saunoa i le sui usufono mo le Vaa o Fonoti. E momoli atu le faafetai a le Maota e ala i lou faamaopoopo i a tatou

Fonotaga, e maitauina pea lou maau ma lou milomilosia e uunai mai i totonu sui usufono aua le faatinoina o le tatou taimi amata ma le tatou taimi malolo.

Ia ua ou maitau atu toe o le Komiti o Tupe o lo o totoe ae ua tatou tu lalata foi i le taimi malolo ma o le a vavae foe e faigata foi ona toe soo ula le saunoaga ua amata ae toe vavae ma toe amata foi.

Ua toe 5 minute ona oo lea i le tatou malologa ae lelei foi ona tatou vave malolo ma toe vave mai ai ona lafo atu loa lea o le avanoa e faasolo mai ai le Komiti o Tupe Maua ma Tupe Totogi ona agai loa lea i le Tali a le Malo e tataua ona tali nei.

Ou te faasilasila atu o le a faataatia ese Taulumaga a le Fono Aoa mo lana malologa masani o le afiafi

Na faataatia ese Taulumaga a le Fono Aoa mo lana malologa masani i le itula e 04:40 i le aoauli ma toe faaauau i le itula e 5:21 i le aoauli.

FOFOGA FETALAI: Ou te faasilasila atu ua toe amataina nei Taulumaga a le Fono Aoa Faitulafono.

Ou te talitonu o lea tatou taunuu tonu i le tatou taimi amata talu le tatou malologa, ia ua faliu foi le la i lona tauafiafi, ae lavapapale mai pea lo tatou Maota o lo o faagasolo pea le tatou galuega. E faamalulu foi i sui usufono mamalu o lo o taumafai mai foi le aufaigaluega i se paolo aua lea itu o le Maota, ia ae talitonu e aoga foi le la mo gasegase o le pau o le tino, a o lo o taumafai mai le tatou aufaigaluega e ala i le taumafai o le tatou Maota Fono nei.

Ia e faia le tatou malologa ua maea le toatele na saunoa i lenei aso ua toa 8, ae ua avanoa le taimi lenei mo se sui usufono e fia saunoa.

O lea ua tulai mai le sui usufono mo Gagaifomauga Nu. 2, ua avanoa le Maota mo le saunoaga.

Tofa SOOALO MENE (Gagaifomauga Nu. 2): E faafetai atu i lau Afioga i le Fofoga Fetalai, atonu foi o lea ua maua se faasiliga malosi i sui usufono mamalu uma o le Palemene e tusa ai foi ma le taumafagati mama e saga uunaia ai pea le soifua maloloina lelei.

Ou te faafetai i lau Afioga i le Fofoga Fetalai mo le avanoa ua tuuina mai e fai ai foi se sao o lenei itumalo i le Tala Faaopoopo o le Tupe 2013/2014, ma le Tala Faatatau Autu o le Tupe 2014/2015 ua taoto mai nei i le Laulau a Fono. Ou te manatu ua le o se foe na faatafea i le auau po o se lafo ua muli, aua e talitonu o lea lava na e alausu i le taeao e fai ma o tatou sui e sufi ma sula le alofa ma le agalelei o lo tatou Matai i le lagi i Lona alofa matagofie le faatuaioia ina ua tatou pale fiafia mai foi i lenei aso se i oo mai i lenei itula, o tai o lomalomama ia a ua le o tai o soua. E auai faatasi la le agaga faafetai i le taulaga na osi, ia aua lo tatou gafa lea i le Atua, lea ua paia ma mamalu ai Tiafau nei. E leai se toa e na te toe tofi Samoa o le atunuu ua uma ona tofi, ua taoto lava a ua ai o feia ona tulaga masani, ae tau lava ina ou see faatautai o le gataifale e asaasa le oo'oo tutu o le tai, aua o lenei ua malu maunu le tupua i Tiafau nei, aua o lea e faalepa le sa o le Afioga i le Palemia o le Taitai o le Malo ma lau Kapeneta, afio lau Afioga i le Fofoga Fetalai, afio foi lau Afioga i le Taitai o le Itu Agai, ia lenei itu o lo o agaia le tatou Faigamalo.

E faatalofa atu foi i failautusi o faauluuluga o Matagaluega ma Faalapotopotoga a le Malo ua tatou faatasi i lenei afiafi. Ou te faatulou atu foi i le tapuaiga mamalu a Samoa a o alofaiva lau Palemene, tulouna Lana Afioga Mamalu, O Le Ao o le Malo ma lau Masiofo, lau Afioga i le Sui o le Fono a Sui Tofia ma lau Masiofo, le Afioga i le Faamasino Sili ma le mamalu o le Ofisa o Faamasinoga. Ou te faatulou atu foi i le faafogafoga tapuai mai a Taitai o Ekalesia ma Ositaulaga o Suli ma Feoi o le Talalelei o lo o faafalelemalu ma faatunapaulia i itula malae e fia o le atunuu. O la outou faiva o le tautua tatalo o lo o see ai i le malu le sa folau o Samoa.

Ou te faatulou atu foi ia Samoa ma lona vavaloloa, i le Usoga a Tumua ma Pule, Ituaa ma Alataua i Aiga, o Aiga o Nofo, Aiga o Papa ma Aiga o Ee, Aiga o Tupu ma Aiga o Tafaifa, ae tainane foi le faafogafoga tapuai mai isi o tatou motu i sasae aua le susu o Sua ma le Vaifanua, o Fofu ma Aitulagi, Saole ma Saleaamua ma le Launiu na Saelua, Tootoo o le Faleula ma le mamalu i le Faleagafulu, o paia na o Samoa e mai le Taisamasama seia paia Fili ma Puletuu na tauilo ai malo.

Se i oo ane se faamatalaga i lenei itumalo e le faagaloina lava le tapuaiga a Safune ma Samauga, faafetai tatalo, faafetai i lau tapuaiga, ia po maia le fala ma tui mai le mulipapaga e talosia so tatou sao o le a faaleoina i lenei foi Tala o le Tupe. E le faagaloina foi le tuumumusu ma le memumemu o le Aufaigaluega paia a le Atua i lo tatou itumalo, e faasifo i le ao ma le po, e faanoinei ni manu ma faautuututagi i le Atua, ina ia manuia faiva o lo tatou itumalo, aemaise foi Samoa.

E fia alu loa se faamatalaga, ae paga lea, ia ua le nofoia le nofoa o Tavita, ona i ai lea o se lagona, e tau lava ina faamaalo iuofe sa matou tala. E faamaise ai ma faamafanafana e ala i le valaau paia a le Atua i se tasi o sui usufono o lenei Palemene, ua valaau i ai lo tatou Matai. E avea ai le leo faatauvaa e fai ma fofoga o le tatou fale Gagaifomauga mai Finao seia paia masina afiafi, e avea ai lou leo vaivai ia e fai ma leo o le tatou itumalo e faamafanafana ma faamaise ai le tina o le aiga ma le nofo a alo, aemaise foi o le aiga potopoto e ala i le valaau paia a le Atua i le tama. E tatalo foi ia tumau le faamafanafanaga ma le faamaisega a le Atua i le itumalo i le afio o le Sao e fa, le Aiga sa Ulumalau le Pouniu ma le Faasau, ma upu ia te oe Safotu. Afio foi Taito ma lau fetalaiga Tauasa, ona o le usugafono a le ati Pouniu ma le Faasau. E avea foi le leo e faamafanafana ma faamaise atu ai i le tatou fale Gagaifomauga lau tofa Lavea o oe o le tupu o le itu, ia e te tausi vaatele aua tupu o le itu ma tootoo o Finao, o lea ua tuua ma amia e le Atua se tasi o toa manumanu o le tatou fale Gagaifomauga. E leai se mea e tatou te popole ai, tatou lototetele aua e leai lava se isi e tu ma tetee i le finagalo o le Atua, o Ia na aumai Na te toe aveeseina, ia faamanuina pea le suafa o le tatou Matai.

Lau Afioga i le Fofoga Fetalai, ona ou oo atu lea i le Tala o le Tupe tala tuu lenei tausaga 2014, ina ua tatou see ese mai mai le faatulagaga o atunuu e vaivai le tamaoiga ae ua tatou see atu i atunuu e feoloolo lo latou tamaoiga, a o le fesili, Aisea? Ou te talitonu, o lo o taoto i totonu o tusi nei le tali o le fesili, a o lau foi lea mau, o le lelei o faiga faavae o lo o limataitaiina ai le faatinoga o lenei Tala o le Tupe.

Ou te fia faafetaia ai i latou uma o taitai o le atunuu lenei sa latou asaina mai le gasu o le taeao, e fatufatu lo outou pale ma sui lo tatou titi, ae aoao ni manogi, aoao ni manu aua Samoa ma lana tapuaiga. Oo mai i le taimi nei i le Taitai o le Malo ia ma le Faigamalo, faamalo faafetai, o lea ua see manuia le

sa o le tatou atunuu e ala i lenei foi matatia taua ua tatou ausia i lenei tausaga, ia malo tautua malo e le faalogologo tiga, ua outou faia mea sili e mitamita ai lo tatou atunuu.

Ou te faafetai i lau Afioga i le Minisita o Tupe lau Afioga i le Palemia, o le Tala muamua lenei o le Tupe talu ona faapaleina tatou i le tulaga lea o atunuu e feooloo lona tamaoaiga, ae tele foi ni perofetaga sa i ai a o sauniuni ia lenei faamoemoe, o le a matua faaletonu le tamaoaiga pe a tatou see ese mai i le tulaga vaivai o le tamaoaiga sa tatou i ai, peitai, lau Afioga i le Fofoga Fetalai, a silasila i lenei Tala o le Tupe, o se Tala o le Tupe ua faavae i se tamaoaiga ua matua lelei atoatoa. O mau ia e i totonu o le tusi lea, a silasila i ai, e i ai le ata lena e i totonu o le pusa tolu o lo o matua maioio lelei mai ai le tulaga e pei ona ou taua, le tamaoaiga i sini autu o le tamaoaiga faatulagaina 2014/2015 ua siitia foi, pe a fua i ai i le tausaga o lo o faagasolo nei, tau o le soifuaga po o le inflation, o lo o matua sologa lelei pe a fua i ai i le sini autu o lo o i ai. Ua tatou oo mai i le paleni o le Tala o le Tupe po o le pasene o le tamaoaiga o le faasiliga o tupe faaalu i tupe maua, ua alualu foi i lalo e 4.2% e faatusa i le 4.8% la e i ai i le taimi lenei. Tupe mo galuega fai po o current expenditure o lo o i totonu lava o sini autu pei ona i ai o lona uiga, o lo o lelei fuafua ma o lo o lelei le faatinoga o lenei Tala o le Tupe. O au foi.....

FOFOGA FETALAI: Malie le sui usufono mamalu, se i tuu atu le avanoa, saunoa lau Afioga i le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama. E faamalulu atu i le sui usufono i le saunoaga matagofie, aemaise o lona taumafai e aumai se ata e taoto ai faapea po o le tamaoaiga ua malosi, lea foi ua saunoa i tupe faasili. Ae na ona ou faatepa lava le sui usufono lau Afioga i le Fofoga Fetalai, pe faapefea ona maua au tupe faasili? Ioe, o le tatou aitalafu lea ua aumai maua ai le tupe faasili, ona e le lava a tatou tupe e fai ai a tatou atinae. E pei o le mea lea e faapupula e le sui usufono, leaga o lea ua see malie ai ma foliga mai, o lea e i ai se tatou tupe faasili, mama, ae ala ona maua le tupe mama, ona o le aitalafu lea na fai.

FOFOGA FETALAI: Ia o lea ua maua le finagalo o le sui usufono mamalu le Afioga i le Taitai o le Itu Agai, e pei lava ona ou....Ia se i tulai atu muamua le Afioga i le Palemia, tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faasaoga o la e sao lelei lava le saunoaga a le sui usufono, e faapena le faataotoga o Tala o le Tupe, e le faapea foi o se mea o faaliloina. A o lena e malamalama lelei ma faataatia atu ia le tulaga o tatou atinae ma le tupe maua ma le faatupega o le mea ua sili ai a tatou tupe faaalu, nai lo tupe maua. Ua uma ona saunoa le toatele, o uiga ia masani faatinoga o mea o malo ma pisinisi uma lava. E te le tau faasinosino ma faapea, ana leai lava lea e le faapea, e leai, na o le vale e na te faia le mea faapena. Ae e vaai le atunuu i le faatulagaga o ana tupe, o tupe e lagaia lava i tatou tupe masani ma tupe e maua e tatou mai foai a malo, ma tupe o lo o mafai ona tatou maua i nonogatupe e mama le tului. A silasila foi la i le faatulagana, o le tele lava o mea nei, o mea na leaga o lea e faagasolo, ma mea o atinae o vaega o lea e talatala mai faatoa faaoga. O lea sa fai lau

tautalaga ma fai atu, o le fale lea pe tolu ea tausaga o faatino, ia ona faasau lea o lea vaega faaalu i lenei tausaga, sau lea vaega faaalu i le tausaga lua, a o le nonogatupe lava e tasi, ia e le o se nonogatupe fou o lea e auu mai. E faapena le faatulagana o mea o Tala o le Tupe i luga o le faautautaga tatau.

O le isi lea lauga e matua maoae i le aso, o Tuileutu, ou te fautuaina atu le Taitai o le Itu Agai, se i fai ma e fesili i lau vaega o lea e i ai le tofa e tau ane ia te oe, tuu le mea sese lena e te sau ai, ae o le matua maoae lava o le lauga lea e atagia ai le tagata e malamalama le sui usufono e malamalama i le faagaoiaina o tupe a lo tatou Malo. Lau Afioga, o la e saolele lava le saunoaga a le Afioga i le sui usufono.

Afioga Hon Palusalue Faapo II: Lau Afioga, ou te tulai atu lava....

FOFOGA FETALAI: O le a se isi mea Palu o la e.....

Afioga Hon Palusalue Faapo II: I le saunoaga a le Afioga i le Palemia la e fai mai, seiloga o le vale e vaai i ai ae le malamalama, ae seiloga foi o se vale e vaai i ai, ana leai le nonogatupe lea, e le lava le seleni e faagaoioi ai a tatou tamaoiga ia, o le Tala o le Tupe lea?.....toese le mea lea, ia ona maua ai lea o le tupe mama lea e i ai nei.

FOFOGA FETALAI: O lea ua maua lou finagalo, o lea ua maua, Palu o lea ua maua lou finagalo, o lau lava na interpretation.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Ia? Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o lea ma te femusuai ma le Afioga i le sui usufono ia Tuileutu, faapea mai le tama matua, o la e fiafia e aumai le loan pe a faapea e fai ai ma auala, ae afai e le lavea maua i le lisi, o lea la ua toe musumusu mai si toeaina, toe faasao la i o i le Palemia... E pei o le mea lena.

FOFOGA FETALAI: Taatia ia Lealailepule.
Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ana faapea o au o le sui usufono e sau i totonu ae faaoso e le isi sui usufono, oi sole, matua mataga tele lea mea? O lona uiga o le tama faigaluega a Tuileutu Leala? Matua mataga tele lea mea. O lona uiga, e leai lava sana ia tofa. O lona uiga la o lauga uma lava a Leala o lea e utu mai e Tuileutu pulu.

FOFOGA FETALAI: Ia, e manatu ua manino ma malamalama le taumafai mai foi o le Malo e faamalamalama aiaiga ma tuutuuga e mafua ai ona faatupe a tatou Tala o le Tupe. E faamalulu foi i lau Afioga i le Taitai o le Itu Agai, e le o maua le faamatalaga faapea ua lafo atu e le lava le faautautaga i lau Afioga. O le faamatalaga ina ia manino ma malamalama faiga faavae a le Malo e a ia le Tala o le Tupe e fetuunai i aiaiga uma ma mea e talafeagai ai le

Tala o le Tupe ina ia mafai ona faatino. Tulai mai le sui usufono mo Gagaifomauga Nu.2 e faaauau le saunoaga.

Tofa SOOALO MENE: Lau Afioga i le Fofoga Fetalai, se leai ua ou toe manatua le matou au lakapi. O lea e saunoa le sui usufono mo Siumu, o le tala lea a le Taitai o le Itu Agai sa fai i luga o le pasi, “Tautuana ma outou ia aua ne i pasia le Tala o le Tupe.” O lea ua ou faaluaina. Fai mai le sui usufono mo Sagaga le Usoga, e sao lelei lava le sui usufono, fai mai, “Palu, e maua lelei lava oe e Tuilaepa i i, e mautinoa lava e alu atu loa Tuilaepa e matamata faapea, “Ua e vaai ia Palu, e matua le malamalama lava i Tulafono o le lakapi.” Lau Afioga i le Fofoga Fetalai....

Tofa Levaopolo Talatonu: Lau Afioga i le Fofoga Fetalai o le mea e fia faasao. Sa ou faalogologo i le saunoaga lea a le Taitai o le Itu Agai. O le sui usufono lea e saunoa nei ma Muagutu, o laua ia na muamua ioe, “Manaia Palu le mea lea e te saunoa mai ai.”

FOFOGA FETALAI: Se i tuu atu muamua la le avanoa i le sui usufono mo Faleata Sasae.

Aveau o le a le saoga o upu ia na outou faia i luga o le pasi?

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai, ua ou tulai atu ne i te i ua tuuaina maua ma Toeolesulusulu lea na o i le Palemia e fai le au lakapi. Ne i te i ua faapea o le au lakapi o se au polokiki foi lea ia aua ai ne i pasia le Tala o le Tupe. E leai o talasua lava sa fai. O le toatele foi o matou na fai, o le au lenei ia pasia ai le Tala o le Tupe.

FOFOGA FETALAI: Ia tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e faamalo atu ia te outou sa taumafai e fai le tatou au lakapi. O lou fiafia ia ina ua toe faailoa mulimuli atu le sao o le au lakapi. O lena ia na ou fautuaina ai le Iuni e faagasolo le au a toeaiina a ia tumau pea le igoa lena o le au a le Oldies, ioe. Ia o le faasaoga la lea Levao Palu.

FOFOGA FETALAI: Tulai mai le sui usufono mo Gagaifomauga Nu.2 e faaauau le saunoaga.

Tofa SOOALO MENE: Faafetai mo le faamalamalamaina o lea mataupu. I le tusi lava lea i le pito i lalo o lena e i ai vaega o nonogatupe, ou te iloa na pau lea o se sini autu tau faafefe lena e i ai. Ae ou te momoli le agaga faafetai i le Palemia faapea foi le Matagaluega o Tupe, o lea ua i ai ma le isi ata lea e autafa ifo lena ua matua faamanino mai ai i le ata lea le tulaga o le toe togitogiina o tatou aitalafu mo le agai atu i le lumanai. Ae i ai la lou faanoanoaga e tasi, ona o le 2017/2018 faatoa ausia ai le sini autu lea e i totonu o le faavae o le Tala o le Tupe. O le uiga o lou manatu, ta fia i ai lava tatou te molimauiina, ae paga lea, leaga o le isi Paeaiga. O lea ou te tatalo atu ai, ia tatou onosai ma faamalolosi ia tatou toe omai uma tatou te molimauiina

le ausia o lenei sini autu. Ae a leai foi, tatou faatuatua ia i e o le a omai foi e faatino lea galuega i lea foi Paeaiga o lo o lumanai nei.

Lau Afioga i le Fofoga Fetalai....

Afioga Hon Palusalue Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: O le a le isi mea lea o le a faamalamalama Palu?

Afioga Hon Palusalue Faapo II: O lea o le a ou faamalamalamaina i le Minisita Lagolago le uiga tonu o mea ia e talanoa mai ai. O mea o miti, ioe, o mea fuafua agai i luma, ae le iloa pe taunuu pe leai. O le mea e ala ai ona fai lau tala lea e taunuu pe leai, leaga o lea e aeae lava i luga o aitalafu. O lea toeitiiti 80% o le tamaoaiga, o aitalafu na. Ia o le mea lea e faamalamalama ai lea mea ne i toe tu ae foi le Afioga i le Palemia toe faamamao mea ia. O mea ia o fuafuaga alualumamao, o mea o miti.

FOFOGA FETALAI: O lea ua maua lou finagalo. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e leai lava se miti o sese, o miti uma lava ia sa tatou galulue ai ae te le i mao atu i ina o e i i. E leai lava la se miti na sese, sa sao uma lava miti. Ma e leai lava se mea tele e tupu i se atunuu se i vagana ona ua i ai ni miti. E ui lava pei e taufaatauvaaina le upu miti, a o fuafuaga mamao o mea e tatau ona fai. O lea la ua saunoa le sui usufono, e sao le mea lea e saunoa mai ai le sui usufono. O le tulaga foi i lana lapataiga lea e aumai mo i tatou uma, o mea nei o mea lautetele, o mataupu e fitoitonu i le Kapeneta e malamalama ai le Kapeneta, o lea foi la e faataoto atu e le Kapeneta fuafuaga mamao, o mea lautetele ia. Ae ou te faamanatu atu i le tatou Maota nei, o tulaga masani lava, o le afa o le Maota lenei e le toe foi mai. Ou te le o tau atua i ni tulaga taumate leaga o tulaga na e masani ai faiga palota ia ua uma atu. A tilotilo i ai, o le afa e le toe foi mai. O le mea la lea, sue le mea e ola ai le tagata ia.

FOFOGA FETALAI: Ia, o le a avatu le avanoa i lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, ou te iloa lelei lau Afioga i le Fofoga Fetalai ma le paia o le Maota, o Taitai o le Itu Agai o le Aoa Fesoasoani. Sa ou faapea lava au o se tagata e loloto lana vaai i mau o la e aumai e le Tusi Paia. Ia manatua foi Iosefa o le faimiti aupito sili lena ona laititi, e 12 tausaga ae amata loa ona faimiti Iosefa. O lea na iu ina lotoleagaina e ona uso faatau ai loa, ae toe feagai ma ona uso ina ua aveva ma tagata ua taitai i le tausiga o le oloa a Aikupito, lea la na vaai i ai, i le matua tagata faimiti, faamatala miti, o miti moni ma miti lelei. O le mea la lena e tatau ona silafia e le Taitai o le Itu Agai. Aua le popole i na mea. Pe fai mai ia o le miti, ae o lea tatou te talanoa o mea o fuafuaga alualumamao a le Malo, e le mafai ona le taunuu pe a

faatuatua i le Atua ma talitonu i mea e aumai e le Atua i o outou aao ma o tatou lima, lea na saunoa i ai le sui usufono mo Faasaleleaga Nu.3. Ou te matua lagolagoina le saga faia o ni a tatou loans ma tulaga faapena ina ia faalelei le atunuu. Aua a lelei nei e lelei taeao, e lelei i ona talaatu, ma agai ai lava i le faavavau. E pei o lau fesoasoani atu lena i le Taitai o le Itu Agai. Ma le faaaloalo.

FOFOGA FETALAI: Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o le a ou fesoasoani atu i le Susuga i le Tiakono Toeaina. O le miti a Iosefa, o le miti na fai i Isaraelu, e le i miti i se Tala o se Tupe faamolemole. E ese lava le miti a Iosefa, o Iosefa na faamanuia i ai lona tama o Iakopo lea na faaigoa ia Isaraelu. O le tama lea o Iosefa na tupu mai i le tina ia Rasela, e ese le faamanuiaga na ave i ai. Na miti Iosefa i faamanuiaga a lona tama.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le faalavelave lea o le sui usufono lea, e le o se miti na faia e Iosefa i Isaraelu, na fai i Aikupito.

FOFOGA FETALAI: Ia se i tulai mai lau Afioga i le alii Aoao, sui usufono mo Falelatai ma Samatau.

Afioga Taefu Lemi: Lau Afioga i le Fofoga Fetalai, e le i faia se miti a Iosefa, na faamatala e Iosefa le miti, a o le tupu o Farao e ana le miti.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ona o lea sa ou taumafai i lau Afioga i le Fofoga Fetalai e faamalamalama, o le miti muamua lava a Iosefa na fai, o fuisaito e 11 na ifo uma i le fuisaito e 1 a o le fusi saito lava lena e ese mai. O fetu, o le masina ma le la na ifo uma lava i lana fetu. Ia, o lona uiga la e tau mai foi, e matua le malamalama lava le Katoliko lea mai Falelatai ma Samatau.

FOFOGA FETALAI: Tulai mai le sui usufono mo Falelatai ma Samatau.

Afioga Taefu Lemi: Lau Afioga i le Fofoga Fetalai, e lelei le faitau maeaea i le Tusi Paia ona iloa ai lea po o ai na faia le miti a o ai na faamatalaina le uiga o le miti.

FOFOGA FETALAI: O lea ua maua Taefu, o le a le faia se faafinauga. Ia, tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, o lea e tusitusilima mai ia au. Aua o miti lea e tatou te talanoa ai, o miti mai le Atua. A o miti lea e fai nei ma le Tala o le Tupe, o miti suavaia ia.

FOFOGA FETALAI: Faafetai i lau Afioga i le Taitai o le Itu Agai, o lea ua e tapa. O lea faatoa ou faalogo lava lea ua e talitonu i se fuafuaga

alualumamao e amata i se miti. E pei lava o tulaga uma e te tulai mai lava ma tau mai le atugaluga i le tulaga o fuafuaga alualumamao, a o lea ua e tautino nei le taua o le miti. O le miti lava o le miti. Ae tuu atu le avanoa i le Afioga i le... E tatalo atu i le Afioga i le Taitai o le Itu Agai, soia ia e te atugaluga i lauga a Minisita Lagolago. O ananafi foi na ou tapa lau Afioga e aua e te faalavelave i le lauga a Falealili, o lea foi ua e toe faalavelave i le lauga a Samauga. Ou te manatu tuupea fetalai a Afioga i Miinsita Lagolago, o nai o latou lava na finagalo, o leo na o itumalo, ae pale feagai pea lau Afioga ma le Palemia, se i vagana foi ua oo mai i le taimi e te lua pigi ai oulua, ona agai lea o le lua taaloga i le lua aga e tutusa ma oulua. Tulai mai le sui usufono mo Gagaifomauga Nu.2 e faaauau mai le saunoaga.

Tofa SOOALO MENE: Faafetai i lau Afioga i le Fofoga Fetalai mo le avanoa. O le upu moni lava ma le upu tautino, ua fiu foi e tau vaai i lenei Tala o le Tupe pe tau i ai se pona po o se ila o lenei Tala o le Tupe. O le matua... e tele mea o le miti toe alu i ai le polofeu. O le matua manaia lava o le mea lea e faasino mai i le tatou Tala o le Tupe. Ia o le a ou see ese lau Afioga i le Fofoga Fetalai.

O le Minisita mo Tupe Maua, e fia faaleoina le agaga faafetai, aua a silasila i ai le Maota i lenei Tala o le Tupe, e moni lava o lo o i ai nai siitaga laiti i lafoga e faaleleia atili ai le auaunaga, ae le o i ai se siitaga i le tulaga lea o le VAGST, aua pei o le lafoga lea e aofia uma ai pepe faatoa fananau mai seia oo lava i tatou matuatausi o lo o nonofo i le fale. Ae atagia mai foi le tulaga o lo o i ai le faanaunautaiga i lenei foi Tala o le Tupe o le a siitia ana tupe maua. O le agaga fiafia lena ma le agaga faafetai e faaleoina ai lenei itumalo i lau Afioga i le Minisita aemaise foi le Matagaluega i le faatinoina o tiute ma faiva e pei ona galulue ai.

Ona oo atu lea i a tatou taligamalo, ia, e momoli atu le faafetai i le Afioga i le Palemia i le le nofoai e sailiili manu ma sailiili manuia aua se manuia o le tatou atunuu. Aua o le mea moni lava o lenei fonotaga, ou te talitonu e le taumate o le a siitia ai foi le tamaoaiga o si o tatou atunuu i nei taligamalo, e le gata i le tausaga faaletupe o lo o lumanai nei, a o isi foi tausaga faaletupe i tua atu.

Ona tatou oo mai lea i fale fasi ia po o fale ia faapea o lea e fuafuaina o le a faatinoina i le tatou atunuu pe lata i 1000 pe ova ma le 1000 tagata faigaluega o le a maua mai. E lagona foi le agaga faafetai i nei atinae taua, aua o lea foi o lo o faamamafa mai i le tatou Tala o le Tupe, e pei o vaega tonu ia o le tatou tamaoaiga o lo o ave i ai le faamamafa ina ia mausali ma tumau ai pea le tatou tamaoaiga i le agai atu i le lumanai, aua e moni lava i isi atinae, a o atinae e tasi lava le tausaga ma toe uma. Ae pei o atinae nei o atinae faaauau, e talitonu o le a siitia ai le tamaoaiga. E faaleoina ai le agaga faafetai i lau Afioga i le Palemia ma le Faigamalo i nei foi fuafuaga lelei.

Ia ona ou oo atu lea i le mamalu o le Kapeneta e tusa ai foi ma galuega fai, ou te masalo e miliona mea ua maea ona fai, e le mafai foi ona tolaulauina, e le gata i le itumalo, a o le atunuu. O lo o molimauiina foi e le Itumalo ma o le agaga faafetai foi lea e fai ai au ma sui o le Itumalo e faafetaia ai le galuega ua maea faatino. E i ai foi nai galuega e le i faatinoina a ua taoto atu ia outou Afioga le talosaga a lenei Itumalo, talitonu o le a oo lava i ai la outou faasoa.

Ona faapea lea o sa matou faamatalaga, o le a seu i Faletagalua ma Lalotava le lauga a Safune ma Samauga. Ae ou te le i nofo i lalo ou te faamalulu atu i

le paū o le Maota, o le a se pati ua sala a o se aga foi ua le tau tamalii po o se upu foi ua laa loa, apoapo i liu o oe o le tautai matapalapala, ae aumaia le filemu o le Atua e faalava tapuia ai la tatou mafutaga ina ia atoa mea ua faaletonu.

Ia agalelei le Atua i lau Afioga i le Fofoga Fetalai ma maua pea lou malosi ma le tofa mai le Atua e limataitaiina ai la tatou Palemene. Ia agalelei le Atua i lau Afioga i le Palemia ma lana Kapeneta, onosai ma loto tetele, faatuatua i le Atua e maua ai lava mea lelei, e ui lava ina le lava la tatou faasoa ae talitonu lava o lo outou faatuatua, onosai ma lo outou loto tetele e tali mai ai i manaoga o le Atunuu e pei ona i ai.

Ia agalelei foi le Alii i sui usufono mamalu o le Palemene, ia maua so outou manatu ma se finagalo aua upufai o le Malo aemaise o le feagai ai ma le taumafaiga o le Atunuu i so o se ala ma so o se tiute o lo o auauna ai.

Ia faamanuia le Atua i Ofisa Sili o Pulega. Faamanuia foi le Atua i le tapuaiga mamalu a le Atunuu. Manuia ma ia soifua.

FOFOGA FETALAI: Malo faafetai saunoa i le sui usufono mo Gagaiforma Nu. 2, o le fofoga tau momoli lea aua le paia maualuga o le Itumalo o Safune ma Samauga, malo faafetai fetalai.

Tulai mai lau Afioga i le Sui Fofoga Fetalai, ua oo tonu lava i lau Afioga ona soo ula ai lea e faauma atu ai lea itu o le Maota i lau Afioga i le Tui Atua Faanofonofa ona lafo loa lea i lea itu o le Maota e faauma mai i le saunoaga a le Afioga i le Taitai o le Itu Agai.

Tofa AGAFILI PATISELA ETEUATI TOLOVAA (Palauli Sisifo): Faafetai tele i lau Afioga i le Fofoga Fetalai mo le avanoa. Ou te manatu o lea ua pulapula la goto le La o lenei aso, o le faailoga ua aga atu i lona nofoaga ina ua maea le tele o itula o le malamalama a o feagai le Palemene ma ana Fonotaga. Malo le onosai.

O tulaga aloaia faa-Palemene ou te faatalofa atu ai i lau Afioga i le Fofoga Fetalai, ua malo le folau, malo taupati, malo foi le faatautaiga o le Fonotaga a Samoa i lenei aso. E faatalofa atu foi i lau Afioga i le Palemia faapea le mamalu o le Kapeneta. E ofo alofa atu foi i lau Afioga i le Taitai o le Itu Agai ae a le loaloa o le mamalu o sui usufono taitasi o le Palemene o Samoa, o sui usufono o Itumalo taitasi.

E faatalofa atu foi i le Failautusi o le Fono faapea le Ofisa o le Fono, ae a Ofisa Sili o Pulega ma Matagaluega taitasi ua maua lenei avanoa tatou te auai faatasi i le talanoaina o le Tulafono Tau Faaofi o le Faatatauina o Tupe 2014/2015. Ou te manatu o le a taoto paia o Tiafau nei aua pe oo i ai sau faamatalaga pe leai, o paia lava mai le vavau e oo i le faavavau. O paia o le tatou atunuu ou te le toe tautala i ai, mai le mea e oso ae ai le la i le mea e goto ai, o paia lava ia o Samoa e tumau e faavavau. O Samoa ua uma ona tofi, e ui lava ina uliuli o le sami ae ua iloa ala o ia, e maualuga foi le vateatea ae ua iloa lava ala o manufelegele. E le oo la i ai se faamatalaga, ae ofo alofa atu i le tapuai faafofoga mai a le tatou atunuu, Lana Afioga Mamalu O Le Ao o le Malo, Afioga Tui Atua Tupua Tamasese Efi ma lau masiofo, Sui o le Fono a Sui Tofia ma le masiofo, le Faamasino Sili, alii ma tamaitai o le Faamasinoga. Lau Afioga i le Palemia, lau Afioga i le Fofoga Fetalai ma le mamalu o Samoa o faafogafoga mai i lenei afiafi.

E le mafai foi ona faagaloina le faafetai tele i le tapuaiga a Taitai ma Ulu o Ekalesia, o lo o nonomanu aua se manuia o Samoa i ona atinae faapea foi ona tagata. Ua malo le fai tatalo faafetai foi mo le tapuaiga a o alo atu le Palemene o Samoa i lana Fonotaga i lenei vaiata. E le mafai ona faagaloina lou Itumalo, Faga Sasae le Aiga Paia faapea Faiga ma Faigata, lau Tautalaga Faiumu ma upu ia te oe Salemuliaga, Faga Sisifo, le paia i Tapaau ma le nofo ituaiga ia Gagaemalae. E faapea foi lou nuu o Salailua, le afio o Lealaitafea ma le Aiga Alosina, Susu Savaiinaea faapea foi le Aiga Sa Amituanai, afio Matua ma Tamatane, Susu Leuluaiialii ma Alii o Paepae, lua Fetalai Tuato ma Tuitolovaa o Aitutagata, Susu le Aiga Sa Laulu ma le nofo a Suafa, lau Fetalai Faatoafe ma le nuu faigata. O paia na o le tatou nuu, tapuai maia sei faia se tatou faamatalaga i le Tulafono Tau Faaofi o le Faatatauina o Tupe 2014/2015. O le Tulafono Tau Faaofi o le Faatatauina o Tupe 2014/2015, o se taimi ona oo lea i ai o se faamatalaga.

O le agaga maua i lenei itula, o le agaga o le faafetai, e molimoli atu le faafetai i lau Afioga i le Palemia faapea le Kapeneta ma sui usufono o le Palemene sa mafai ona faatinoina faaaloaloga masani faale-Malo, i le tuua ai o le Malo e le fetalai Taua Faraimo faapea foi le Afioga Taulapapa Faimaala. Faafetai i le amanaia o le tautua a nei sui usufono o lou Itumalo a o galulue ai o ni sui usufono mo le Palemene o Samoa. Ona pau le mea ua ou mautinoa a umi a ona avea oe ma sui usufono e umi foi ona e ola, o lona uiga o le a ou taumafai ou te toe sau i le isi Paeaiga o lo o lumanai ina ia aua ai nei ou vave oti. Aua a na le see ese lava ma le Nofoa e le vave oo mai le valaau a le Alii, a o le a taumafai lava i ai.

Lau Afioga i le Palemia, faafetai tele lava mo lou finau i le Fono a Malo Tau Atinae Laiti ina ia usua mai iinei.

Afioga Hon Palusalua Faapo II: Lau Afioga i le Fofoga Fetalai o se mea e fia faasao a o le i see ese le sui usufono mamalu.

FOFOGA FETALAI: O le a le isi mea lea le Taitai o le Itu Agai e te?

Afioga Hon Palusalua Faapo II: Ioe lau Afioga i le Fofoga Fetalai, e faamalulu atu i le saunoaga.

FOFOGA FETALAI: Malie lau Afioga i le Sui Fofoga Fetalai se i tuu atu le avanoa i le Taitai o le Itu Agai.

Afioga Hon Palusalua Faapo II: Pau a le mea lea e faapea e te le toe sui usufono loa ua vave ona valaau le Atua ia te oe. Ona ou alofa lea i le Itu le la, o lea ua saunoa manino le Afioga i le Palemia o le 50% o outou e le toe omai. Ioe, aua e au ina toe omai uma lava le Tautua. O lona uiga e 50% e te le toe sui usufono loa e sauniuni loa e sau le valaau e sau le valaau a le Atua.

FOFOGA FETALAI: O lea e faafofoga le tiapolo ia tatou tala, ae le tatau. O upu a tagata e lafo e faaataata lafoga a o upu e mamala. O upu e fai i totonu o le Maota lenei e le o ni upu faatalasua, tatou te o foi ae i ai le mea e gata ai le tuaoi o a tatou faamatalaga. O le ala lea lau Afioga i le Taitai o le Itu Agai, aua tatou te saunoa faapea ne i mea ane ua tupu se mo i o nei faamatalaga tatou te faia. Ia seu pea le manu ma tagai i le galu, o le saunoaga lava a le Sui

Fofoga Fetalai ua na o se mea faatusa a o le 50% e le na o se Vaega e faasino i ai o le tatou Palemene atoa.

Na ona ou fautua atu i le paia ma le mamalu o le Maota, tatou te faaataata lafoaga i faamatalaga ae tatou te manatunatu lelei leaga o lea tatou te feola faatasi ma agaga. O agaga ne i i te i ua fai fai a tatou upu iinei ae tatou o atu i fafo tuia se vae o se isi pe see i se paufai ona faaletonu atu lea o tatou sauniuni aua le valaau paia a le Atua i se tasi o o tatou uso a sui usufono.

Tulai mai lau Afioga i le Sui Fofoga Fetalai, aua e te atugalua e le toe tupu le mea lena ua 50 tausaga o le Tutoatasi, ua outou vaai mai foi ua liu tino tagata le upu ma ua tatou ola faatasi ma Keriso e le toe i ai se mea e tupu. Faaauau le saunoaga le sui usufono.

Tofa AGAFILI PATISEPA ETEUATI TOLOVAA: Faafetai, ou te ava tele i lau Afioga i le Fofoga Fetalai, pau lava o lea ou te faamanatu atu i le Taitai o le Itu Agai o le Tulafono Tumau e le faasaoina e le isi sui usufono le isi sui usufono, na o mea e faamalamalama. O manatu lava nei e fai atu ma suaga faa-Palemene ae leai se mea e te atugalua ai.

Faafetai tele i lau Afioga mo lou finau ina ia usua i Samoa le Fono e pei ona alo atu i ai le tatou Atunuu. E maitauina e le i usua le Fono a o lea ua selesese tagata Samoa i tapenapenaga ma lelei ua oo i ai tapenapenaga.

Mo se faaitaiga o auala. O le auala lea e ave i autafa o le Falesa Katoliko i Siusega e agai i uta ua oo atu i Aleisa auala ua maea ona faaleleia, faafetai tele lava. Ua uma foi ona ou vaai i le fale e taua o le Media House o lea ua aafia mai ai ma le Malae Hockey e pei ua lua manu ua maua i le maa e tasi. O se fiafiaga tele lea ia te au aua a maea atu le SIDS a ua matua upgrade lava le Malae Hockey, ua i ai lona fale matamata e le toe susu ai se isi pe a timu. Ua ou vaai ua faaleleia o manuia ia ua amata ona selesese e tagata o le Atunuu a o le i amataina le Fono e pei ona finauina e lau Afioga ina ia usua mai i Samoa nei.

Ou te faafetai i le Aiga Minisita i le tele o galuega faatino i lou Itumalo. O le suavai taumafa faafetai lava. O Taga o lo o i lalo o le vaaiga a le Samoa Water Authority ua matua lelei atoatoa lo latou vai.

Salailua, faafetai tele i lau Afioga i le Minisita mo Tina ma Tamaitai, Atinae o Nuu, Afioga ma Agafesootai. O le mea lava lea na ou finau atu ai i lau Afioga a o lea ua e tali mai. O taimi nei o lo o ou fealua'i e saili ni fesoasoani mai fafo. Ua toe foi lava le vai o Salailua i le 40 tausaga talu ai aua o le suavai lea sa feinu ai e oo lava i Salega. O le taimi nei ua matua maimau lava le suavai, ua ou faafesootaiina nai fesoasoani mai fafo ou te manaomia ni tane tai 500 afe lita ina ia faaoga ai le suavai. Faafetai i lau Afioga i le Minisita mo lou talia mai o le talosaga ina ia mafai ona faaleleia le mata o le vai. Ona ua mafai ona faaleleia le mata o le vai o lena ua e molimauina ina ua e afio atu ua matua alu lava i fafo le suavai, o le mata o le vai ua pa i fafo. O le faatanoa 400 afe lita e le o mafai ona taofia le tele o le suavai i le taimi lenei. Ona pau lava le suavai i lalo o le sami water authority o le vai lea i Gagaemalae, ae talosaga atu e toe silasila pea i ai ona e pei lava o le vai lea o Fogatuli ma le vai o Faiaai o vai lelei na, o vai vili na, ae pei ua faaleagaina le sau o le vai i lalo i Gagaemalae ona o le vai la e i Sagone o le vai lena e mai, ae silasila totoa i ai pe ua tataua ona tape le vai lena e i Sagone ae faaoga pea na o vai ia e i Fogatuli ma Faiaai o vai lelei na. Lau Afioga i le Minisita o Galuega ou te le toe fai atu i lau Afioga i auala ua taoto atu i lau Afioga ma

ou te le toe fia tautala i le tele o auala galue o lenei itumalo, pau lava lau talosaga, o le aualatele lea e taamilo i le pitonuu lea o Siutu, ua silasila i ai le Minisita o Tina ma Tamaitai faapea foi sui o le Malo na afifio atu i le tuumalo o le tofa ia Taua Faraimo, ua leaga tele le auala ae o lea ou te molimau atu o se taimi o le tausaga lenei e lalaga ai le galuega a le Ekalesia Faapotopotoga Kerisiano Samoa i Siutu, o le a sii le falesa i uta i le mea o lo o i ai le fale o le faifeau, ona ua tele le faaleagaina o le falesa i le taimi lenei. O lau talosaga lava lena ma le faaloalo sei silasila ane i ai pe mafai ona fai i ai se fesoasoani. O le malosiaga faaeletise o lo o lelei lava mea uma i le matou motu i Savaii. Ua tuu itiitia foi le pe soo o le eletise, ae ou te tatalo atu e silasila pea i moli auala pe mafai ona faaopoopo nisi moli auala. Ou te talitonu o le tele o tupe alu a le Matagaluega o penisini o taavale, aua e oo loa i le afiafi gasolo uma mai lava taavale i Salelologa, ae ou te fautua atu, pe e le i alagataata i le taimi lenei ona fai ni sub-station i itumalo e mafai ai ona faagaioi ai galuega o auunaga faale-malosiaga faa-eletise. A faapea e faaeletonu se transformer i Salega i le po, e alu atu lava le taavale i Salelologa e fai. Ae a faapea e i ai se sub-station i lena itu o le motu, e mafai ona fai le auunaga i ni mea tutupu faafuasei i Palauli Sisifo, Salega ma se isi i le itu i sasae o Alataua. Ou te talitonu e tele foi se tupe e alu i penisini o taavale i le feoai i le o atu ma omai, o atu ma omai i aso uma lava.

Faafetai mo le faaleleia o auala i le motu i Salafai. Ua ou maitauina le tele o le faaleleiga ua pasi atu ma le matou itumalo ua oo atu i Alataua faapea foi le Itu Asau i alatetele ia. Faafetai atu foi i le lelei o le filifiliga o konekarate lea e moaina auala i Savaii. Ou te talitonu lava ua molimauina e lau Afioga i le Palemia faapea foi le mamalu o le Kapeneta, e ese lava le manaia o le teuina o auala i Savaii i mea ia e tau o le vaega lea o konekarate o tauau o le auala, road shoulders. O le manaia ia o le teuina o auala. Ma ou te faafetai lava i le filifiliga o konekarate nei, ae le gata foi i lea o le monitoring a le LTA i Savaii, o lo o latou faatinoina ma mulimulitai pea e faatino lelei le moaina o le vao ma le teuina o tauau o le auala.

Lau Afioga i le Minisita mo Punaoa Faanatura ma le Siosiomaga, ou te faafetai tele atu lava i lau Afioga. E molimauina nei e le Minisita mo Tina ma Tamaitai ma nisi foi, faapea le Taitai o le Itu Agai, ua amata nei ona faagaioi le taligalu i le pitonuu lea o Siutu. Faafetai tele lava i lou tali mai, ona o le laoa lea o Faatoafe na fai ai le maliu, ailoga e toe atoa se 20 mita o le taligalu, ua lata mai tele. Ae faafetai o lea ua faagaioi le konekarate i le fausia o le taligalu. Na ma talanoa ma le taiulu o le konekarate, toe pau lava se tulaga o lo o faatuai ai, o le faataliga o le ie ona o le design fou lea ua i ai konekarate, e i ai le ie e faaoga ona faatoa amata ai lea ona faaputu i luga le maa pei ona manaomia.

Lau Afioga i le Minisita o Aoga, e momoli atu lava le faafetai tele i lau Afioga faapea foi le Ofisa Sili o Pulega ma le mamalu o le Matagaluega i le filifilia o le kolisi o Palauli Sisifo e avea ma se tasi o aoga e faapitoa mo le aoaoina o le faasaienisi ma le matematika. Faafetai tele lava. Ou te iloa o lea ua tautala mai lava galuega a le matou kolisi. O lea foi e silafia e le Afioga i le Ofisa Sili o Pulega. Na ou faalogologo i lana polokalame; Salafai Sisifo, leai, Satupaitea ma Palauli e leai, ae misi matou e le taua mai matou, toetiiti lava selau pasene i tausaga ma e au mai i le Iunivesite le tausaga 13. Ae faafetai o lea ua faapitoa lava i le aoaoina o le matematika ma le saienisi. O lea foi vaiaso faatoa tuanai atu, ua filifilia ai le aoga tulagalua i Salailua, o le

aoga lea e tasi i Savaii ua faapitoa i ai le polokalame lea mo le matematika ma le faasaienisi. Faafetai tele atu lava i lau Afioga i le Minisita faapea foi le Ofisa Sili o Pulega ma le Matagaluega ina ua afea aoga a lenei itumalo mo ia polokalame faapitoa.

Lau Afioga i le Minisita mo le Soifua Maloloina, e momoli atu lava lau faafetai tele i le avanoa na tuuina mai ou te malaga atu ai i Niu Sila e faauma lou taotoga. E le mafai ona tuuaia le afaigaluega a le falemai, po o ai lava se isi e tuuaia i le le mafai ona faaumaina i inei i Samoa lou taotoga. Ona ua pau lava o masini ua gau le masini. E leai lava ma se isi e talanoa ma se gau o le masini. Ae faafetai o lea ua e silasila mai faapea foi le Palemene, o lea ua ou tulai atu e leai sau matatioata. Ae faafetai mo le avanoa na ou malaga atu ai i Niu Sila. I le taimi lea sa ou i ai i Niu Sila, sa ou maitauina ai ma ou faatusatusaina le tomai o alii ma tamaitai tausisoifua i le falemai mata lea sa ou i ai, faatusatusa i tomai ma se agavaa o tatou tausisoifua e ese mai lava i fomai faapitoa. Ua uma ona momoli lau faafetai i le tamaitai pule, le faletua ia Mau, e leai ma se eseseaga, e tutusa lelei le standard lea ua oo i ai a tatou tausisoifua faapena foi i Niu Sila i le falemai lea sa ou taoto ai o le Eye Institute i ina i Remuera. O lona uiga, toe pau lava le mea lea ia tatou, o masini. A lava a tatou masini, e leai se mea e toe ave ai fua ni mai o fofoga e togafiti i fafo. E tolu foi teams ia e omai lava i tausaga uma. O le team mai Fiti lea e faapitoa lava mo matou i Savaii. O le team mai Niu Sila, o le team mai Tasmania. O le team la mai Tasmania, e le i maea le latou galuega ona ua gau le masini. O lea la e toe omai nei ia Setema, ae o lou lava lena talitonuga, toe lava o masini ona atoatoa lea o le auaunaga ma faasaoina ai tupe a le Malo i gasegase tau fofoga.

Lau Afioga i le Minisita mo le Soifua Maloloina e tauala atu i le Fofoga Fetalai, i le taimi o fausia le falemai lea i Foalalo, o le medical sub-centre i Taga sa fai ma falemai. Ina ua maea loa ona fausia le falemai, ua toe see atu i ai le auaunaga faa-soifua maloloina. Toeitiiti lava uma ona toe faaleleia le falemai, o le fale ai ma le faamoemoe mo se polokalame lea a lau Afioga i fomai e asiasi atu ma nonofo ai. Toeitiiti lava maea lelei. Ae ou te tatalo atu, ua ou vaai lava ma le alofa i le nuu lea o Taga, ou te talitonu e silafia uma lava e a outou Afioga le mamao o Taga ma Foalalo, e le se vavalalata, o le matuai mamao lava. O le a se finagalo o lau Afioga, pe mafai ona toe silasila le Matagaluega pe mafai ona toe fai le medical sub-centre lea ina ia i ai nai vailaau mo manua ma mea faapena, ina ia mafai ai ona tali le manaoga o tagata i se taimi vave. O talosaga na a lenei itumalo.

O le Tala o le Tupe, o le a oo atu i ai se faamatalaga. Ua maea lelei ona silasila le Malo faapea foi Ofisa Sili o Pulega ma vaega taitasi i le Tala o le Tupe. E fia faamamafa lava i lou sui usufono le Lipoti a le Komiti o Tupe Maua ma Tupe Totogi, ona ou te talitonu o le tele ia o fautuaga taua o lo o i ai. Ae i ai foi Matagaluega e lagona ai le faanoanoa. I le vaega lava ia i le saunoaga a le Afioga i le Minisita o Tupe, o vaega tetele lava ia e ave i ai le faamuamua, o aoaoga, soifua maloloina, sosoo mai loa ma faatoaga.

Ae a silasila i le itulau 13, e tomua lava le faamatalaga a le Komiti i se lagona faanoanoa o le Komiti. Oo mai le isi vaega lena e i ai, “Ua maitauina foi e le Komiti le faatamala o le Matagaluega i le mataituina o taunuuga lelei o le polokalame.” Le polokalame lea o le stimulus package ona e le o i ai ni faamaumauga o le aofai o koko, kofe ma niu na toto.

O lo o i ai foi le faamatalaga faapea a le Komiti, “Na talosagaina le Matagaluega ina ia aumai se pepa o faamatalaga e faamatala ai le vaega lea.” O lau fesili lau Afioga i le Taitaifono, na aumai se faamatalaga i le tou Komiti i le tulaga lea? Se i tali mai pe a oo i le taimi e te saunoa ai. O isi vaega uma, o lo o i ai foi se vaega faapea i faigafaiva e 4,300 tone i le 2001 o le ia na maua, ae oo mai i le taimi lenei, e sili laitiiti lava i luga i le 1,000. I le 13 tausaga ua faaitiitia tane ia i le 3,000. O le fesili pe aisea, a o lea e fai mai le Lipoti, e tulaga lelei lava le faitauaofai o ia i le sami. A faapea la o tulaga lelei le faitau o ia o le sami, ae faapefea la ona pau i lalo? Ua leai nisi e fagogota. Ou te fia malamalama i le tulaga lea. Ma le faaaloalo lava.

FOFOGA FETALAI: Malie lau Afioga i le Sui Fofoga Fetalai se i tuu atu le avanoa i le Afioga i le Minisita mo Faatoaga ma Faigafaiva. Tulai mai le Minisita.

Afioga Hon Le Mamea Ropati: Lau Afioga i le Fofoga Fetalai, e faamalie atu i le sui usufono ma ana saunoaga ia e fai mai, aemaise o le Lipoti lea... Faapea lava au e le i oo i le taimi e talanoa ai Lipoti. A o le mea o le ia, e leai ni a tatou pa ia i tai i le sami. O le ia lea o le tuna e fealualuai solo lava i le lalolagi atoa lenei. A alu alu lava ua fia sau, ia sau foi i Samoa. O isi ia sa tag i Samoa ae tei ua maua e le aufaifaiva la e i Papua Niu Kini. E faapena le amio a le ia lea e i ai, e mulimuli lava le ia i le temperature o le sami, e i ai le mea lea tailo pe silafia e le sui usufono le uiga o le upu lea o le El Nino lea e pisa ai nei o le climate change lea e i ai, e faapena uma lava le mea. O lea e taumafai nai a tatou vaafagota lea e feofeoai solo nei e sue solo ia, ae a faapea e le fia omai lava ia i Samoa, ia o le a le tatou mea o le a mafai? O le a tatou o e tatai mai ia iinei i Samoa e faapefea? E faapena le ia. A o le isi mea lea e tau ai le stimulus package, tasi lenei poloketi lelei a le tatou Malo. O lea foi ua i ai nai suiga ia ua fuafua e faalelei atili ai, ae faapena lava le soifuaga lea tatou te i ai, e le atoatoa i nisi taimi, a o isi taimi ua selau pasene, o isi taimi ua le atoatoa. Ae faamalulu atu i le sui usufono ma lana saunoaga, o lea foi e faafofoga mai le matou Matagaluega. Ae le fia o foi le matou Matagaluega e lalafi i tua o se ata o se niu. E i ai foi false o le Matagaluega latou, aemaise foi o le aufaifaatoaga aua e le o se aufaifaatoaga a le Matagaluega o le aufaifaatoaga a le atunuu. Ia e fuafua lava i nai tatou faifaatoaga ma le fuafuaga o lo o faatino ai le poloketi. Ae se i ou taumafai ia e tali atu le maemaea o le sui usufono i se taimi pe a ou toe tu atu. Faafetai.

FOFOGA FETALAI: Malo faafetai i lau Afioga i le Minisita. Tulai mai lau Afioga i le Minisita mo Faatoaga ma Faigafaiva. Tulai mai lau Afioga i le Sui Fofoga Fetalai e faaauu le saunoaga.

Tofa AGAFILI PATISELA ETEUATI TOLOVAA: E faamalulu atu i lau Afioga i le Minisita, ou te le o faatauagavale i le Matagaluega, o lea ou te talanoa atu i mea ia e tusi mai i le Lipoti, e leai lava ma se mea o ou fafaua pe o fai atu i luga o sou lava iloa. O lea ou te talanoa atu i faamatalaga ia e i luga o le Lipoti.

O le fale gaosi aisa lea i Siumu, o lea ua fai mai ua lata ina faamuta. Se pe o sao lea mea? O lea ou te iloa o le fale gaosi aisa lea e i Siumu ua tatau ona uma lona faiga, ona e uma loa Siumu sosoo ma Salailua. Po o sao lea mea?

Ou te iloa e le i uma lelei le galuega lea ae ua sau i le Lipoti o lea o le a faamuta. Oi o le a faamuta o lea e le i tatala? Po o le sao lea.

FOFOGA FETALAI: Ia, o le a tuu atu ia le avanoa leaga o lea ua tele fesili ia o lo o agai i le Lipoti a le Komiti o Tupe Maua ma Tupe Totogi. Tulai maia lau Afioga i le Taitaifono o le Komiti.

Susuga Hon Papaliitele Niko Lee Hang: Lau Afioga i le Fofoga Fetalai, ou te le fia faalavelaveina le saunoaga matagofie a le Afioga i le sui usufono mamalu, ae ona o lea ua lua fesili, a o le tali i le fesili muamua e le i tuuina mai se faamatalaga i le mea sa talosagaina e le Komiti mo se faamatalaga i le stimulus package lea. Ma le lona lua, e sese faamaumauga, o la e o lo o faaauau pea le fale aisa. A o le faaupuga e tatau ona i ai, e le tatau ona faamuta. Sa tatau ona faauma pe a faapea o i ai se tulaga e le i... ae o la e ua operate le fale aisa lea i Siumu. Ma lou faaloalo lava.

FOFOGA FETALAI: Malo. Tulai mai lau Afioga i le Sui Fofoga Fetalai e faaauau le saunoaga.

Tofa AGAFILI PATISELA ETEUATI TOLOVAA: Ona ou oo mai lea i le Matagaluega mo Aoga....

FOFOGA FETALAI: Malie lau Afioga i le Sui Fofoga Fetalai se i tuu atu le avanoa i le sui usufono mo Siumu.

Tofa Hon Tuuu Anasii Leota: Faafetai mo le avanoa. E leai ou te tulai atu e momoli lau faafetai i le Afioga i le sui usufono o lo o saunoa nei i lona faamanatu mai o le mea lea o le fale aisa i lou itumalo. Faafetai o lea ua tali mai le Taitaifono, ua manino foi. Faafetai mo le avanoa.

FOFOGA FETALAI: Ia, tulai mai le Minisita mo Faatoaga ma Faigafaiva.

Afioga Hon Le Mamea Ropati: Lau Afioga i le Fofoga Fetalai, ua uma foi ona ou talanoa i le... aua sa laga mai e le sui usufono lea e saunoa nei le mataupu lea i le taimi o le malologa. Ia o lea sa ou talatalanoa lelei lava i le sui usufono mamalu mo Siumu, ai o le mea lea na ala ai ona le lavea i lana lauga le fale aisa, leaga o la e ua malie lelei lona finagalo o la e fai lava le fale aisa latou o lea e taumafai ia lelei ia o ifo uma i ai le la itu o le au fagogota ia maua ai ni a latou aisa. Ae leaga la o lea ua laga mai e le sui usufono lea mai Salailua, ia o lea foi e tau fuafua atu i ai se aisa, ae pei lava o le a ou musu e ave i ai se fale aisa. A o lea e tau fuafua atu i ai se fale aisa i Salailua e agai i ai le la faaitu i o, ae se i ou toe mafaufau ia pe ave i ai se fale aisa pe leai. O lau toe soso atu lea ma le faaloalo.

FOFOGA FETALAI: Le sui usufono mo Faleata Sisifo, e i ai se mea o e fia saunoa ai?

Tofa Lealailepule Rimoni Aiafi: Faafetai lau Afioga, se i ou fesoasoani atu lava i le mataupu lea e laga e le Afioga leaga na maua foi i le Afioga i le

Taitaifono sa faapea e...o tone ia e taua e le Afioga i ia, o tone ia o quarter, e fai quarter le mea e fai i atunuu o le Pasefika, o le quarter a lea a Samoa i tausaga taitasi e 4,200 tone e mafai ona tatou entitle i ai, e pau le tone lea e mafai ona pue e tatou i le tausaga e mafai ona maua e na o le 1,200, o lona uiga e ova i le \$20milion tala Amerika le tupe lea e misi. O lea la sa i ai le fautuaga a le Matagaluega, po o a la mea e mafai ona faatino ai aua o le taimi nei ua le toe i ai ni vaa lapopoa tetele e o e pue mai le ia mai tai. Afai foi ua faipaaga ma laisene ia e ave i atunuu i fafo, e tele foi le faigata mo tatou mo le agai i le lumanai, aua o lona uiga o le a mafatia tatou aufaifaiva laiti. Ia o le faamalamalama lea ma le fesoasoani foi i le lauga a lea sui usufono.

FOFOGA FETALAI: Malo, malo i lau Afioga i le Komiti o Tupe. Ia tulai mai lau Afioga i le Sui Fofoga Fetalai e faaauau le saunoaga.

Tofa AGAFILI PATISELA ETEUATI TOLOVAA: Faafetai, e faaauau le lauga a leni itumalo. Ia e faamalie atu i lau Afioga i le Minisita mo Faatoaga ma Faigafaiva, na ala ona ou laga le mataupu lea, ina ia sao faamaumauga a le Fono, aua a le laga, e le mafai ona faasaoa, o le a alu ai lava i faamaumauga o le Fonotaga leni le Lipoti ua faamuta, ae pei o le tulaga lena na ou lagaina ai.

Ia o le faaulavea a le Afioga i le sui usufono mo Faleata Sisifo, ia o la outou Lipoti lava, o lea e sau ai i i la outou Lipoti o lo o manino lelei, e 4300 tone o ia na maua i le tausaga e 2001, e leai se upu tau quarter po o a na mea o sau ai, o la outou Lipoti lava lea ou te talanoa atu ai, e le o se Lipoti a Agafili lea e talanoa atu ai o la outou Lipoti, ae o le a ou see ese ma lea tulaga.

Faafetai tele i le Minisita mo Aoga, Taaloga ma Aganuu e tusa ai foi ma le faatinoina o le galuega. O lea sa fesiligia e se tasi o Komiti, po o sao tonu ia le Matagaluega lea e i ai ia taaloga, o lea e i ai i le Lipoti pe le tatau ona faapulega tumaoti ia fai se pulega tumaoti o taaloga. Ia o lau lava talosaga, o lea faatoa sao, o lea ua toe foi lava taaloga i aoga i le mea e tatau ona i ai. I le taimi a o ou aoga mai au i aso la, o taaloga uma lava na faatino i aoga, o le softball, hockey, soka, lakapi, netball na faatino uma i aoga, alu ai alu ai, ona sau loa ua pei lava na o le lakapi ma le netball, e le toe i ai ni taaloga ia o le soka, hockey, netball ma taaloga faapena, o lea la ua toe taoto i i aua e mafai ona lavea i totonu o le curriculum a aoga, faafetai tele lava i le tulaga lea ma ou te tatalo atu lava, ia faatumauina pea i i le Matagaluega o Aoga, Taaloga ma Aganuu. E pau lava lau talosaga mulimuli i lau Afioga, o lea ua sau nei le faasoa o tatou malae, ia e lua malae taalo i Savaii, ia o le malae o Aopo ma le malae o Iva, ae amuia lava outou i le Faasaleleaga o lo o i ai le malae o Prince Edward, e le i leva foi ona uma ona fai le malae o Lalomalava, ia o lea foi e sau i i le Lipoti o le malae o Iva lea o le a fai....

FOFOGA FETALAI: Ia malie lau Afioga i le Sui Fofoga Fetalai, se i tuu atu le faasoa i le Afioga i le Minisita mo Aoga, Taaloga ma Aganuu, tulai mai.

Afioga Hon Magele Mauiliu: Lau Afioga i le Fofoga Fetalai, e na ona...e le o i ai sou malamalamaaga po o fai se malae o le matou nuu, o la e faasoa, ia afai o fai, ia sala ina fai, e leai se malae o Iva, e leai se malae o le itumalo e leai se malae o le Primary School, o lea e ave le faamuamua i nuu e leai ni

malae, o la e lumafale i le malae faava o malo a le Malo e totogi ona faatoa mafai lea ona faaaoga, e le mafai la ona o ae tamaiti aoga e faaaoga i aso uma, ia o le faamalamalamaga lea, faafetai.

FOFOGA FETALAI: Malo, faafetai foi i lau Afioga i le Minisita ma le Matagaluega ua afea le talosaga a lenei itumalo, pe ua tolu ea, toeitiiti fa tausaga o talosaga atu, a o lea ua maua nei o le tausaga nei o le a faatino ai le malae o si o matou nuu i Aopo, faafetai.

Ia tulai mai le Sui Fofoga Fetalai.

Tofa AGAFILI PATISELA ETEUATI TOLOVAA: Faafetai lava i le faamalamalamaga a lau Afioga i le Minisita, ia o lea ou te talanoa atu lava i luga o le Lipoti a le Komiti, o malae ia e lua, ae pei lava ona ou fai atu, amuia la outou itumalo e tele malae lelei na ua i ai.

FOFOGA FETALAI: Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o mea nei o malae faava o malo, e tasi lava le agaga e fai ai taaloga faava o malo, o lona uiga a aumai ia Au mai fafo e mafai ai ona fai ai taaloga, ae o le ala foi la lena e malupuipuia ai i le tulaga o le sio atoa o le malae i uaea maualuluga ina ia malu e leai se isi e soona alu soli. Sa i ai le faanununu sa i ai i le amataga o le polokalame lenei, ona e fai loa lea malae e manao ia lea itumalo e tau o le malae faava o malo, sa tele ina ou faamalamalamaina i totonu o le Maota lenei, e na o le lua lava malae faava o malo, o le Apia Park iinei mo taaloga ia lakapi ma isi lava taaloga la e malupuipuia e faigofie ona ao le seleni e faagaoioi ai ia galuega e tatau ona fai, ia e faapena foi la i Savaii i Iva. O malae la na, e le soona lotea, e taofiofi lava a i ai le taimi e aumai ai ia le au taalo i fafo ona o loa i Savaii fai ai se taaloga, e fai i i i totonu o le malae lea, ona e tatau ona ao le seleni e totogi ai. O le taugata ia o nei mea o le aumai o Au mai fafo e taaalo i Samoa nei. E tatau lava la ona ao se seleni e le taga ai le mea lea o le o fua, aua na o le gau aano ai o le Iuni Lakapi pe a faapea o se taaloga lakapi, e oo mai nei o le matua tele o le OD o lo o galue ai le Iuni Lakapi ona o mea nei o taaloga nei e auai, ua le tutusa le tulaga sa masani o i ai ma le taimi lenei.

Lau Afioga i le Fofoga Fetalai, ua ou manatu e tatau ona faamaioio mea ia ona o lo o tele lava le faanununu i tulaga ia o malae, e le soona faaaoga ia malae faava o malo ona o tulaga ia a i ai loa ni taaloga e fai mai iinei, o i tonu lava e fai ai e malupuipuia e mafai ai ona ao ai le seleni e toe totogi uma ai le tele o tupe alu i le aumaiga o Au tetele mai fafo e taaalo i Samoa, lau Afioga ia o le faamalamalamaga lena ina ia manino.

FOFOGA FETALAI: Malo faafetai. Tulai mai lau Afioga i le Sui Fofoga Fetalai, ua toe lima ou minute.

Tofa AGAFILI PATISELA ETEUATI TOLOVAA: Faafetai i lau Afioga i le Fofoga Fetalai, ia o le a taatia atu ia lea mataupu i lau Afioga i le Minisita mo Aoga, Taaloga ma Aganuu, ou te talitonu lava o oe o se tagata e te naunau ia lelei ia le atinae o taaloga i totonu o le tatou atunuu. Ae na ala ona ou laga le tulaga lea, o le nuu lea o Taga o lea e taaalo mai i le Iuni

Lakapi a Satupaitea ma Palauli, o Salailua o la e taaalo i le Iuni Lakapi a le Itu Asau ae fai i Falealupo, e fai i Falealupo taaloga. O le fesili, aisea? E leai ma se malae talafeagai i Salega po o Palauli Sisifo e faatino ai se matou Iuni. Sa matou talatalanoa foi ma uso a sui usufono mai Salega, e tau fai se Iuni Lakapi ona ua mamao tele le mea e feoi ai ia au a nuu, ne i te i ua i ai se faalavelave e tupu, ia ae leai se malae e talafeagai i le taimi lenei, pei o le tulaga lena na ou laga atu ai i lau Afioga i le Minisita.

Lau Afioga i le Fofoga Fetalai, e talia ma le fiafia e lenei itumalo le Tala o le Tupe, faamalo ma faafetai atu ai i lau Afioga i le Minisita o Tupe faapea foi ia lau Afioga i le Palemia e tusa ai ma le Tala o le Tupe.

O le a seu i fanua se faamatalaga a Palauli Sisifo, talosia ia le tatou Fonotaga ia faaifo mai i lagi manu i sui usufono filifilia o le Palemene, alofagia e le Atua lau Afioga i le Fofoga Fetalai faapea foi le Taitai o le Malo, le aiga Kapeneta, faapea foi ia sui usufono taitasi o sui usufono o itumalo, ia manuia foi le Afioga i le Taitai o le Itu Agai, ae faapea foi le Failautusi ma le Ofisa o le Fono, ia manuia foi ia faauluuluga o Matagaluega e faapea foi ia ofisa sinia ua mafai ona tatou faatasi, manuia foi le tapuai faafogafoga mai a Samoa e mai mauga tetele se i oo lava i maugaiti, ia maua le tatou Fonotaga faafetai.

FOFOGA FETALAI: Malo faafetai saunoa i lau Afioga i le Sui Fofoga Fetalai. Ou te talitonu ua tele le sao taua o le tatou itumalo e ala i le tatou Tala o le Tupe.

Lau Afioga i le Tuiatua Faanofonofo le sui usufono mo Aleipata Itupa i Lalo, tulai maia, o lea ua avanoa le Maota mo lau saunoaga. Tulai mai le sui usufono.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai faapea foi le paia ma le mamalu ua sasao nei o sui usufono, e faapea foi le tapuaiga a Samoa, aemaise lou itumalo o Aleipata Itupa i Lalo atoa foi ma le fale i luga o Lepa, Saleapaga, Lotofaga e faasolo mai lava i i Luatuanuu ia ma Falealili faapea foi ma Satupaitea, o nai Minisita ia o lea o lo o i ou luma, o lea e taputapuaia faiva o le lauga.

Lau Afioga i le Fofoga Fetalai, masalo o so o se Malo lava tau atiae e ona pau lava le mea e mafai ona faatino ai atinae, o nonogatupe ma tupe faameaalofa, ia atonu o le agaga lena o lea e taumafai atu ma o le mau lena a lenei sui usufono, e momoli atu ai le agaga faafetai mo le tatou Tala o le Tupe. E muamua la ona ou faafetai i le Minisita o Tupe le Afioga i le Palemia faapea foi ia Matagaluega aemaise le Matagaluega o Tupe, aua e le faigofie lenei galuega. E avea foi lenei avanoa e molimoli atu ai le agaga faafetai i sui uma o Matagaluega taitasi, o faauluuluga o Matagaluega faapea Faalapotopotoga Tumaoti a le Malo, ia faapea foi ma o latou sui lagolago, e le gata i lea a o i latou sa matou i ai mo le lua vaiaso o le taeao ma le afiafi mo le sailiiliina o le Tala o le Tupe.

O le mea muamua lava e faamanino o fesili ia sa...ia masalo o le a taatia ia o le a ou le oo i ai ma le alu ai fua o lou taimi, ae sa matou talanoaina le mataupu lea na lote nei e uiga i le fagotaina o i'a e 4000 ma ona tupu ia tane sa maua i le 2001, o lea ua saunoa mai le Afioga i le Minisita e saolele lava e faaopopo atu ai i le saunoaga a le Minisita. O le isi tulaga ia sa fesiligia le Matagaluega, pe aisea ua le ausia ai le tele o tupe maua mai le tatou vaega o le au fagogota, ia a o le tali na aumai, ia maimau pe ana toe ausia lea

vaegatupe tele e maua i lea vaitaimi, ae ui o lea, pei o le mafuaaga lava sa logo mai e le Matagaluega, o pole sa i ai e 11, ia alu ai lea i le matagi ma fagogota e gaioi e nisi o tagata ia pole foi ia e faalalata ai i'a i gatai o Upolu ma Savaii, o lea ua tele ina gaioia e le gata i lea ua tafefea. Ae maua foi lenei avanoa lau Afioga i le Minisita e fai atu ai se tuualalo ma se fautuaga, pe faamata e i ai se auala e ono mafai ai ona faapipii ai se beacon i lalo o pole nei, e faafaigofie ai ona trace pe afai e gaioia ia pe tafefea foi. Aua o lea e matau e i ai le tatou mea foi lele tai pei o le GPS System o le vessel o le a ea le igoa o le mea, e trace ina le aufaifaiva ma tulaga faapea.

A o le tulaga o le Ofisa o Faatoaga, e lelei ona faauma atu nai vaega laiti ia.....

FOFOGA FETALAI: Malie le sui usufono o lo o saunoa, se i tuu atu le avanoa i le faauilavea a le Afioga i le Palemia, tulai mai lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, mai i le 2000 faasolosolo mai ai, sa tele ina asiasia lou ofisa i le tele o le aufai vaafagota, ona ua le mafai ona totogi a latou loans, ia sa ou fesilisili i ai, pe mafua aisea ona le mafai ai? O le latou tali, ua le o toe tutusa ia le tele o i'a ua latou maua, e tele foi o isi ua faatau ese a latou vaa ona ua le o toe tele se i'a, e sao le tulaga lea o le migrant species iinei i Samoa, nei, e sue atu ua leai, ua move agai i luga o isi sone, ma o lea foi ou te le iloa po o sa mafai e nisi o tatou nei ona o e fagogota, e tele taimi na ou alu ai i vaa, e iloa loa se igafo e matua fiu e tuli le igafo, pe atoa lava le tolu itula o tuli isi igafo, o i ina na ou iloa ai le mafatia tele o mea nei o vaa e o e tuli le igafo. O le tele foi o isi vaa sa tele ina matau mea o albacore aua e matau vaa na, ua le o toe tutusa foi ia le i'a sa mafai ona latou maua. O le tele lena o lau galuega sa fai o le fautuaina o le Development Bank ina ia tau taofiofi le tele tele vave e tasei vaa o tagata ma faatau o latou fanua. Na ou fai atu i ai, e leai se mea tou te televave ai o na e i ai security. Ia tuu le avanoa i o tatou tagata faifaiva se i tau talitali pea.

O lea na saunoa manino le Minisita mo Faatoaga ma le Faleoloa o Faatoaga i le suiga o le tai e mafanafana ai ma le toe maua ni i'a iinei ae move ese i atunuu malulu. O le tulaga o i'a e sau mai lalo i le itu i Saute, pe i lava o le vaitaimi o Tesema ma faasolo mai ai nei ma agai atu ai i Matu. Sa tele foi ina fe-sasiai ai nisi ma fai mai e mafua nei mea ona o vaa tetele, e le afaina lena tulaga pe ana faapea e nonofo i'a i se mea e tasi a o le i'a eva, e eva iinei ae oo atu taeao ua eva i Iapani.

Lau Afioga i le Fofoga Fetalai, ua ala ona ou taua lea mea ona ua matua sese atoa lava le tulaga lea ou te faalogo atu i ai o lo o aumai pea, a o au lea sa ou talanoa i tagata nei e mafatia i le tulaga o le 'ia ona ua over fish, ua malosi tele le over fish le tele o vaa fagota mai fafo i zone i lalō ma faasolo ane ai i lugā.

O Samoa, o le matua laitiiti lava o le zone fagota, 5 mila i fafo e muta mai ai tatou, o le 5 maila foi lena sa faataoto ai mea ia o pole. O lea ou te talanoa atu i pole leaga o le toatele o outou e le i oo i ai, a o Au na ou maua i lalo o le pole. Ua ma o ma o ma le isi tagata maua ua toeitiiti atoa le selau futu i lalo na ma o ai ou fai atu, sole, ta toe o i luga, e tasi lava le tamai maea e tapue ifo i luga e alu i lalo ona tupu ai lea o le limu ona o atu lea o nai tamaitai i'a ma pipii ai, ona omai lea o isi i'a feoloolo ma aai ai, omai loa ma i'a lapopoa. Ou

fai atu – ta o i luga, ona ma o ae lea i luga, ou fai atu aua ta te toe o i lalō . O i e omai ai i’a tetele o le matua fiafia o i’a tetele e ai taua pe a ta toe o i lalō. E ala ona ou tau atu nei mea ona o le tele o nei mea e le i oo i ai se isi o outou, a o Au lea na mau i lalo o pole nei. O le tele foi o nei pole e masani ona omai vaa tetele mai fafo ma taula ai ma fatalitali ai ni i’a ona o ane lea o i latou ave ma o atu ai ma malepe atu ai ma pole nei. O le matua tele lava o tupe a le Malo na alu ai ona o uiga na o isi vaa tetele e omai taula ai atoa foi ma tatou vaa, a o mea nei e taula ai pole e le mamafa tele. O lea foi e taumafai le Malo e faaoga mea ia – o le tulaga lelei la lea ua vaai atu i ai i le suiga o le tau ua maua mai i ata mai satellite ua mafanafana le ala o i’a i le itu Sisifo o le atu Pasefika i luga ae o Papua Niu Kini, o le atunuu lena e tele ai le i’a. O le tele o le vaega lena ua amata ona mafanafana. O lona uiga o le mea lea i ai e ono agai mai iinei i’a i le mea lea e le i oo i ai le mafanafana. O le mafuaaga foi lena ua amata ai ona gauai mai mafafau o Falei’a e omai i le itu lenei ona e tele le lumanai lea e taaititia mai luma mo Atunuu nei o lo o i le itu i Sasae o le Pasefika.

Lau Afioga i le Fofoga Fetalai, ua ou manatu e oo i ai se upu i i ona o lea e tele lava le fenumiai ma tuuai ai fua le Matagaluega i le tulaga o faamaumauga, a o le mea moni lava a talanoa ia i latou tonu e fai vaa, o i latou tonu lava na e malamalama lelei i le mea lea ou te talanoa atu i ai. E leaga o i latou nei e o atu ma ou interview ina ma talanoa i ai i le tulaga o faafitauli o lo o feagai ma i latou ma mafua ai ona fai le laveai ina ia faaauau ai pea a latou fagotaga ma maua ai pea a latou i’a.

O le isi tulaga lelei lea o le a tulai mai nei, o Kamupani nei sa tau atu, afai e manuia le faamoemoe lea i le vaiaso fou e taunuu mai ai le isi Team e faaiu mai i inei le faatalatalanoaga e ono amata le vaega lena i le tausaga fou. E amata i le faatau o i’a a i latou nei e maua ona tele ai o a latou seleni e maua ma faatupu atili ai le agaga fia fagota ona o lea o le a mafai ona maua se auala e avatu ai a latou i’a i fafo a o le faaiuga o le tausaga e ono uma ai le latou fale ma amata ai loa le isi vaega lea o le latou gaoioiga e vavaeese ai tino o i’a ma faalele sao ai i Amerika mo le maketi o lo o i ai a le Pumple Bee. O faamanuiaga na lea ua faapepepe mai i o tatou luga a oo ina faatino e tele se manuia mo le tatou aufaifaiva e maua mai ai, e le gata i lena a o le a televave ai foi le tupu o le tatou tamaoiga mai taumafaiga o lo o fai e le Matagaluega o Faatoaga ma Faigafaiva.

FOFOGA FETALAI: Mo le faasaoina o le taimi o le sui usufono se i tulai mai le Minisita mo Faatoaga ma Faigafaiva.

Afioga Hon Le Mamea Ropati: Lau Afioga i le Fofoga Fetalai, e faamalie atu i le sui usufono mamalu, na o se faaopoopo atu lava i le saunoaga a le Afioga i le Palemia. O lena ua outou faafofoga o lea sa maua le toeaina i lalo i le mea sa i ai pole ma vaavaai ai. O au foi sa i ai lou vaa fagota i aso la, sa ou fagota ai ma tuli atu. O le mea lea ua fai i pole i le vaitaimi lenei aua o pole i taimi na ma le lata mai sa fai le tamai vaa e float i luga ona alu lea o le afa, o le tele o a tatou pole e o atu tagata – e pei ona saunoa le Palemia e o atu taula ai o latou vaa ma faatalitali i le vaveao aua o taimi na oso ai le mafua, taimi ua amata ona talu oso ae le la ona faatoa sau loa lea o le atu ma i’a lapopoa ona faatoa fai loa lea o le tuliga atu. O le mea e leai ai o isi vaa e taula ai i ina ma titipi ane ai le maea i le vaega o lo o taula ai le pole , vaeatu

le Maota ma tafea ai lava ma le pole. O le faiga la ua amata ona fai i le masina ua tuanai ua fai le faiga foi lea o le fai faa-filifili le pole lea e tuu i luga aua ai ne i mafai ona ooti e se isi le filifili, masalo po o le fa mita ona taula loa lea i le manoa i lalō le faiga o pole. E valu tatou pole ua uma ona fai ma o le a tufatufa i tua, ua tele tupe a le Malo e alu i pole a ua faaleaga e tagata e le lelei mafaufau. E faamalie atu i le sui usufono ma lana lauga, e faigata ona tuu i ai ni pigeons e uma lava ona faaleaga e le aufaifaiva, o le mea taua ia fai se pole foi lea e le mafai ona faaleagaina e se isi. O le tasi lena mea ua fuafua ina ia faa-uamea e aua ai nei mafai e se vaa ona momotu se pole.

O le season o le i'a e amata mai ia Aperila ua tele le i'a e oo atu ia Iuni, Iulai e pei ona saunoa le Palemia o le taimi lena e tele ai le tatou i'a lea o le tuna. Ona oo foi lea ia Oketopa ma Tesema ua oo foi i lalo, e pe i o le tulaga lena. Ua faigata lenei vaitaimi i tatou vaa ona o le latou molimau ua faaletele se i'a e sau i le taimi lea e fia fagogota ai. O le mea aupito sili ma matautia tailo po o tou silafia vaa nei e omai ma transit i tai a latou vaa fagota mai Saina o le matua tele o i'a o lo o i ai i totonu. O vaa na e o fagogota solo i isi atunuu ona omai loa lea transit i Asia ma ave ai i fafo le i'a.

Na fai le matou fono ma le aufai vaafagota , ou fai atu, e leaga lenei mea o lo ta alu atu i tai o la e lau lau le i'a, ae ou sau i le tatou tamai uafu lea i gatai o lo o tutu tatou vaa fagota e le o fagogota, ae faapea mai foi o le taugata o le penisini ma isi lava mau excuses. O le mea lea e i ai ua vaavaai le Matagaluega i se isi faiga e toe faaoso ai i luga le tatou interesting i le i'a, o le i'a o le isi lea mea e le pei o le faiga o le faatoaga e toto, na o le tatou o lava a lelei le faiva o le tele foi na o i'a ma tele le exports. O le a ou le fai atua se fuafuaga o lo o tau fai mo le taimi nei atonu o se taimi lata mai ona outou faafofoga lea i ai, a o le a taumafai se isi faiga e tele ai le tatou export i le i'a. E pei ona saunoa le Palemia e laitiiti le tatou zone e 200 maila ona e laitiiti lo tatou Atunuu, e tele atu ai zone o Toelau, Tuvalu ma isi Atunuu lata mai aua e tele o latou motu.

O le fesoasoani atu lea e faamalie atu ai i le sui usufono ona o le faalavelave ona sa tau faamalamalama atu nai vaega nei e lavea mai i lau lauga.

FOFOGA FETALAI: Faafetai tele i lau Afioga i le Minisita mo le faamalamalamaga, tulai mai le sui usufono e faaauau le saunoaga.

Afioga TAFUA MALUELUE TAFUA: Ua tau sola foi manatu ua umi ona motu le faiga pole ma le faiga i'a. Faafetai i lau Afioga i le Palemia ae faifai malie alii sia tatou mea ua ou vaai atu pe i ua outou faitai. E mo le silafia e le Palemene ma le paia o le Atunuu o lo o faafofoga mai, o la matou Komiti a o atu le Ofisa Sili o Pulega ma Ofisa Sili Lagolago po o le toafa po o le toalima ona matou fesili lea i ai. O a matou fesili la nei e faamaumau e le Failautusi, lea e i ai le Lipoti lenei na matou auiliiliina masalo po o le lua i le tolu aso. O mea uma nei e faamaumau o upu ma tala na aumai e le Matagaluega, e leai se mea o faaopopo i ai e matou, sa ou faamaumauina foi ma o au notes nei ou te mulimulitai i ai, ae faamalulu atu ia outou Afioga pe afai o afaina se finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o faamalamalamaga nei e avatu

e le o se faitioina o saunoaga. Na ona toe faaopoopo atu ma faamalamalama itu nei, aua o le mea moni lava e moni lava foi o i latou nei o Ofisa Sili o Pulega ma Ofisa Sili o Pulega Lagolago ailoga ua o e fagogota, ailoga foi o talanoa i le aufaifaiva. O le ala lena e toe avatu ai nai faamatalaga nei, leaga o mea nei o tagata e utia i mafatiaga e le o i ni Ofisa Sili o Pulega ae omai i Minisita aemaise o Au, aua a o atu e le maua le Minisita ona omai sao lea ia te Au. E i ai lava le talitonuga foi lea – se tatou o i luga, e i ai le taimi na telefoni mai ai Le Ao o le Malo, Malietoa ia te Au. Se se i vaai ane lava le toeaina lea. O le uiga lena e i ai taimi e faalavelave ai tagata i Ofisa Sili o Pulega ona fai le i ai, e te iloa e maua le tali mai le Palemia po o le Ao o le Malo. Ona faapea foi lea o tagata, e maulalo le Palemia ae sili ona ou alu sao i Le Ao o le Malo. Ona alu loa lea ma faalavelave i Le Ao o le Malo ma telefoni mai Le Ao o le Malo, lea o le a toe tuli au le olomatua lea ia te oe. Ou fai atu, ia toe tuli mai aua o le uiga na o o tatou tagata e le fia o i le aualii nei e tau i ai o latou mafatiaga ae o lava i luga, afai e le o maua foi e i latou o le mafuaaga lena e le o maua atoatoa ai. Ae a faaopoopo la latou molimau e tuuina atu ma le matou foi faaopoopo atu ona faatoa atoa loa lea.

Lau Afioga i le Fofoga Fetalai, o le ala lena ina ne i te i ua manatu le sui usufono ua faitioina lana saunoaga. O le aoga o lana saunoaga ua maua ai le avanoa e toe faamalamalama atili ai isi mataupu nei atonu e le i atoa ona avatu e alii o le Matagaluega sa o latou talanoa.

FOFOGA FETALAI: Malo faafetai i lau Afioga i le Palemia, tulai mai le sui usufono e faaauau le saunoaga.

Afioga TAFUA MALUELUE TAFUA: Faafetai lava i lau Afioga i le Palemia. Se ua galo lava ona tau atu, sa fai lau miti anapo, o lau miti fai mai, maumau pe ana i i Iosefa se i faitaua lata miti. Fai mai ua malilie le Kapeneta e taitai e le Afioga i le Palemia o le a faia se auala mo Aleipata e oso atu i Fagaloa e penefiti ai la oe alii... E faapea o le miti lea. O le a ou see ese ma le vaega lea o pole. Ae ou te le i see ese la, se i faasilasila atu, o pole uma nei sa i le taulaga i Apia, e leai lava ma se pole ou te le i taele ai i luga ma ou aau ai luga ma ou mau ai i lalo. O le aso faatoa 12 ou tausaga sa fai lou tamai vaa apa foi lele, e fai ma le tamai foe laupapa, ou te alu atu lava i le Vaisigano ou alu ai i lalo ae a alu ifo se meli i tai magoto ai lou vaa, toetiiti lava ou malemo ai vaeatu le paia o le Maota. O le mea foi la lea o le pole ua ta foi mai ai i le mea ta te aau ai ota oso ai i luga ma faapena. Ae aoga tele le mea lea o le pole o lea ua maua nei na o le tolu pole ia e i totonu o Samoa.

FOFOGA FETALAI: Malie lava Tafua se i tulai mai Lealailepule pe na ae foi i se pole.

Tofa Lealailepule Rimoni Aiafi: Lau Afioga i le Fofoga Fetalai, o lea tatou te talanoa i pole fagota i tai i le sami, e ese lava le pole lea e i Matautu i tua i le tamai vai foi lele e tafe ane i ina.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e sao lelei le sui usufono mo Aleipata Itupa i Luga. E leaga e faatafe mai ia i lona vaa apa ae faatafe mai au i lou vaa kalone, ona gogoto loa lea na o le lua lava futu le mea e te oo ai i

lalo e oo i lalo i le palapala, a o le mea lea o le pole, e 50 futu le maualalo e te alu ifo i le pole lea e i ai nei e tau i lalo. O mea la nei o vaa apa, na o le lua lava futu, e le taitai e oo i lalo i le loloto.

FOFOGA FETALAI: Ia, aua e te popole i le saunoaga a Lealailepule ia e gata lava ia i gauta i Vaimoso. Tulai mai le sui usufono mamalu e saunoa.

Afioga TAFUA MALUELUE TAFUA: Ona ou oo mai lea i le Minisita mo Faamasinoga, le Afioga i le Sao Faapito. O lea sa i ai le vaega o le Matagaluega o Faamasinoga na ou oo atu faapea e le aafia tagata molia uma i soligatulafono se i vagana le tagata ua au i luga i le Supreme Court. O le fesili la ma le faaaloalo i lau Afioga, pe aisea ua fai ai lea tulaga, e foliga mai e faaituau, na o le Supreme Court e totogi le legal aid a o le isi vaega foi lea e le o maua, ae atonu o latou tonu ia o lea e faasino i ai le Tulafono lea e penefiti ai mo le totogiina o latou loia. O le fesili lea ma le faaaloalo ae se i oo i le taimi e te saunoa mai ai, ona e saunoa mai lea.

Sa saunoa anapo le matou faipule, si ou uso sui usufono mai Lalomanu, le fetalaiga ia Saleaamua, e le tele ni upu o le lauga. Na pau lava le mea na ona ou faaopoopo i le saunoaga a lou uso a sui usufono e uiga i le matou kolisi i Aleipata. Faamolemole lau Afioga i le Minisita a maua foi se avanoa e te asiasi atu ai manaia ae moomia lava ni faiaoga faaopoopo i ai mo faiaoga o lo o i ai i le taimi nei.

I lea lava nota, faafetai i lau Afioga i le Minisita mo Galuega, Felauaiga ma Atinae Eeese. O lea e i lalo o galuega faatino e lua a le Pulega o le LTA, le vaega foi lea e vaia o tatou auala nai auala ia ua leva foi ona talosagaina e i ai le auala i Utufa'alalafa, o Saleaamua, talu mai ona uma le Tsunami e le i soo lava le auala lea, ae 20+ aiga e aofia ai. O le auala i Tiaveatai o lea e i ai le auala laupapa ailoga e atoa se 10 futu le lautele ua leva ona motu, na motu lava masalo po o le vaitaimi o Ofa pe a. Ae faafetai tele i lau Afioga i le Minisita o lea ua talia talosaga, o lea foi e faafofoga mai le itumalo, o lea ua i ai le lisi o galuega faatino a le Malo, e momoli atu ai le agaga faafetai ma le faamalo i lea tulaga.

Ou te lagolago atu ai foi i le talosaga na avatu i le auala foi lea o tatou lea ua maea ona fai le tumau temporary road lea e fai i le mea lea sa maliliu ai tagata e toafa i le aso 2 Ianuari i le tausaga nei. E momoli atu ai le agaga faafetai o lea ua saunoa mai lau Afioga, ua uma ona faataatia le alafua ma designs o le auala, toe o se tupe ona faatino lea. Ae faafetai mo le tulaga lea. Na pau lava le mea sa popole ai, ua lua taavale e lavevea ai talu ai ona maliliu tagata e toafa ma sa ave le isi tagata i le falemai, na tigaina lava. Ia atonu lava po o le le lava o ni faailoilo sa i ai i lea vaitau, a o la e ua i ai faailoilo e faailoa atu ai e faalemu le alu o le taavale, ma e tasi le laina o le tatou auala. Ma o le popolega lene sa i ai, masalo toetiiti fa maila i le va ma le mea na i ai le sign e faapea e tasi, one way bridge ma le mea e i ai le auala laupapa. E oo atu la le tagata ua galo le mea sa vaai ai i le sign lene lea e i le magatolu foi lea i Lotofaga, pei lava o gauta o Tiavea e i ai. Lona uiga toetiiti lava uma lelei Richardson track pe fia kilomita le umi faatoa e tau i le auala laupapa lea one way bridge, a o lene e i o le sign e mamao a. Na pau lava le mea sa talosaga atu ai i lau Afioga faamolemole, sina mea e slow down ai le taavale po o se mea faapena e reduce ai le speed o le taavale, aua e sao le auala lea

ma e tele ina saosasoa le o ai o taavale. O le talosaga lea ma le faaaloalo i lau Afioga.

FOFOGA FETALAI: Ia, ou te faamalulu atu i lau Afioga i le sui usufono mo Aleipata Itupa i Lalo, ou te talitonu o lea ua taunuu tonu le tatou taimi i le tatou taimi malolo. E i ai le talitonuga o le a tuu atu le avanoa e faamaea mai le saunoaga i le aso a taeao pe a tatou toe taliu mai i le tatou taimi masani. Ae ou te manatu le tatou Palemene, ua tatau ona fai se tatou malologa. O loo o taumafai foi le tulaga o lenei aso ma le taumafai mai o le tatou aufaigaluega ua outou silasila ua fai foi si pouli o le Maota nei ona o tulaga o le toe faaleleia ua tatau ai ona tatou malolo ae se i faatino le galuega a le aufaigaluega, aemaise ua tatau foi ona faatino se faatiliga malosi mo le tatou Palemene aua le aso a taeao.

E momoli atu le faafetai tele i le paia ma le mamalu o le tatou Palemene nei e ala i le tauavagameaina o le tatou galuega mai le taeao analeila e oo mai i lenei toe taimi o le afiafi. Faafetai le usufono, faafetai le onosai, faafetai saunoa, faafetai fetalai, faafetai foi malele. Ou te talitonu ua tele... o lea lava tatou te alu i le alafua, o lea lava e atoa le tatou fuainumera pei o le aso ananafi, e momoli atu ai le agaga faafetai tele i le paia ma le mamalu o le tatou Maota e ala i le tatou faatofalaiga i lenei aso.

E faafetai atu foi i le paia ma le mamalu o Matagaluega ma Faalapotopotoga a le Malo, malo lo outou onosai mai. Masalo a tatou alo i le apefoe lenei, masalo e oo atu i le taimi lenei taeao ua pasia le tatou Tala o le Tupe. Ia maea tali a le Malo i le aoauli ma tatou faasolo ai pei ona i ai ona vave foi lea ona tatou malolo ma faatino galuega pei o mea e tatau ona i ai.

Ae momoli atu le agaga faafetai tele i lau tapuaiga Samoa i lenei itula afiafi, malo le tapuai mai. E talitonu le faamoemoe ua tatou tulalata i le taimi o malologa ma tatou tapuaiga masani o le afiafi, tatou taufai tatalo i le Atua ia nono pea manu ma ulimasao le tatou folauga ina ia tatou aulia le aso fou a taeao.

A o le i faaiuina le tatou Fonotaga, Taefu, o Farao na miti ae faamatala e Iosefa. Ia fai sau tatalo malie e fai ai se miti malie a le tatou Palemene i lenei po ona tatou alafai lea i le taeao o muamua.

Na motusia Felafolafoaiga ina ua tolopo Taulumaga a le Fono Aoao i le itula e 7:04 i le po seia aulia le itula e 9:00 i le taeao o le Aso Tofi, 19 Iuni 2014.